


CHINESE-JAPANESE LIBRARY OF
HARVARD-YENCHING INSTITUTE
AT HARVARD UNIVERSITY
OCT 31 1940

14

T9299/8234.4(14)



五侯七貴

東吳俞允安刻彙纂 宣城柯鼎府增定

金明蕭如葉訂校

人部六

彙纂 行第 八

○彙纂

五侯七貴 漢書卷九十四

五侯七貴 漢書卷九十四

五侯七貴 漢書卷九十四

五侯七貴 漢書卷九十四

五侯七貴 漢書卷九十四

詩集類函卷六十四

東吳俞安期彙纂

宣城梅鼎祚增定

金明蕭如薰訂校

哈佛大學漢和
圖書館珍藏印

人部六

豪華

行樂

公子

隱逸

○豪華

五侯歌

漢書曰成帝河平中悉封舅大將軍王

陽侯根曲陽侯逢時高平侯五人同日封故

世謂之五侯時五侯羣弟爭為奢侈後庭姬

妾各數十人羅鐘磬舞鄭女作優倡狗馬逐

馳大治第室起土山新臺洞門高廊閣道連

屬彌望百姓歌其奢僭如此按傳稱成都侯

穿長安城引內豐水注第中大波曲陽侯第

園中土山漸臺類白虎殿則穿城引水非曲

陽與歌辭不同高都外杜皆長安里名

五侯初起曲陽最怒壞决高都連竟外杜土山漸臺
西白虎

相逢行

古辭

相逢狹路間道隘不容車不知何年少夾轂問君家
君家誠易知易知復難忘黃金為君門白玉為君堂
堂上置樽酒作使邯鄲倡中庭生桂樹華燈何煌煌
兄弟兩三人中子為侍郎五日一來歸道上自生光
黃金駱馬頭觀者盈道傍入門時左顧但見雙鴛鴦
鴛鴦七十二羅列自成行音聲何嗒嗒鶴鳴東西廂
大婦織綺羅中婦織流黃小婦無所為扶瑟上高堂

丈人且安坐調絲方未央

按樂府宋荀景梁武帝簡文昭明沈約張率庾肩吾徐防王罔皆有相逢行相逢狹路間長安有狹邪等篇皆祖此辭辭雖小異意則雷同乃悉刪之僅取此篇及篇法不同語意稍別者附之

相逢狹路間

梁劉遵

春晚駕香車交輪礙狹斜所恐帷風入疑傷步搖花
含羞隱年少何因問妾家青樓臨上路相期竟路賒

相逢狹路間

隋李德林

天衢號九經冠蓋恒縱橫忽逢懷刺客相尋欲逐名
我住河陽浦開門望帝城金臺遠猶出玉觀夜恒明
筵羞太官膳酒釀步兵營懸牀接高士隔帳授諸生

流水琴前韻飛塵歌後輕
大子難爲弟中子難爲兄
小子輕財利實見陶朱情
龍軒照人轉驥馬噓天鳴
入門俱有說至道勝金羸
出門會親友天官奏德星
大婦訓端木中婦訓劉靈
小婦南山下擊缶和秦箏
羣賓莫有戲燈來告絕纓

相逢行

唐李白盛

朝騎五花馬謁帝出銀臺
秀色誰家子雲車珠箔開
金鞭遙指點玉勒近遲回
夾轂相借問疑從天上來
感入青綺門當謁共銜杯
銜杯映歌扇似月雲中見
相見不得親不如不相見
相見清已深未語可知心

胡爲守空閨孤眠愁錦衾
錦衾與羅帷纏綿會有時
春風正澹蕩暮雨來何遲
願因三青鳥更報長相思
光景不待人須臾髮成絲
當年失行樂老去徒傷悲
持此道密意無令曠佳期

相逢行

唐李白盛

相逢紅塵內高揖黃金鞭
萬戶垂楊裡君家阿那邊
相逢行

唐崔顥盛

妾年初二八家住洛橋頭
玉戶臨馳道朱門近御溝
使君何假問夫婿大長秋
女弟新承寵諸兄近拜侯
春生百子殿花發五城樓
出入千門裏年年樂未休

長安有狹邪行

晉陸機

伊洛有岐路岐路交朱輪輕蓋承華景騰步躡飛塵
鳴玉豈樸儒憑軾皆俊民烈心厲勁秋麗服鮮芳春
余本倦遊客豪彥多舊親傾蓋承芳訊欲鳴當及晨
守一不足矜岐路良可遵規行無曠迹矩步豈逮人
投足緒已爾四時不必循將遂殊塗軌要子同歸津

長安有狹邪行

宋謝惠連

紀郢有通達通達並軒車奕奕雕輪馳軒軒翠蓋舒
撰策之五尹振轡從三閭推劔馮前軾鳴珮專後輿
長安有狹邪行

梁沈約

青槐金陵陌丹轂貴遊士方驂萬乘臣炫服千金子
咸陽不足稱臨淄孰能擬

長安有狹邪行

陳張正見

少年重遊俠長安有狹斜路窄時容馬枝高易度車
簷高同落照巷小共飛花相逢夾繡轂借問是誰家

長安有狹邪行

北周王褒

威一作透紆狹邪道車騎動相喧博徒稱劇孟游俠號

王孫勢傾魏侯府交盡翟公門路邪勞夾轂塗艱倦
折轅日斜宣曲觀春還御宿園塗歌楊柳曲巷飲榴

花樽獨有遊梁客一作倦還守孝文園

羽林郎

漢辛延年

昔有霍家奴姓馮名子都依倚將軍勢調笑酒家胡
 胡姬年十五春日獨當壚長裾連理帶廣袖合歡襦
 頭上藍田玉耳後大秦珠兩鬟何窈窕一世良所無
 一鬟五百萬兩鬟千萬餘不意金吾子娉婷過我廬
 銀鞍何煜燭翠蓋空踟躕就我求清酒絲繩提玉壺
 就我求珍肴金盤鱠鯉魚貽我青銅鏡結我紅羅裾
 不惜紅羅裂何論輕賤軀男兒愛後婦女子重前夫
 人生有新故貴賤不相踰多謝金吾子私愛徒區區

日出東南隅行

北周王褒

曉星西北沒朝日東南隅陽窗臨玉女蓮帳照金鋪
 鳳樓稱獨立絕世良所無鏡懸四龍網枕畫七星圖
 銀鏤明光帶金地織成襦調絃大垂手歌曲鳳將雛
 採桑三市路賣酒七條衢道逢五馬客夾轂來相趨
 將軍多事勢夫聳好形模高箱照雲母壯馬飾當顱
 單衣火浣布利劍水精珠自知心所愛仕宦執金吾
 飛薨彫翡翠一作繡桶畫屠蘇銀燭附彈映雞羽黃
 金步搖動檐榆兄弟五日時來歸高車竟道生光輝
 名倡兩行堂上起鴛鴦七十階前飛少年任俠輕年
 月珠丸出彈遂難追

門有車馬客行

陳張正見

飛觀霞光啓重門平日開北闕高箱過東方連騎來
紅塵揚翠轂赭汗染龍媒桃花夾逕聚流水傍池回
投一作鞭聊靜一作接電捐軫暫停雷非關萬里客自
有六奇才琴和朝雉操酒泛夜光杯舞袖飄金谷歌
聲遶鳳臺良時不可再騶馭鬱相催安知太行道失
路車輪摧

門有車馬客行

隋虞世南

財雄重交結戚里擅豪華曲臺臨上路高軒抵狹斜
赭汗千金馬繡轂五香車白鶴隨飛蓋朱鷺入鳴笳

夏蓮開劔水春桃發綬花輕裙染回雪浮蟻汎流霞
高談辯飛兔摘藻握靈蛇逢恩借羽翼失路委泥沙
曖曖風煙晚路長歸騎遠日衰青瑣第塵飛金谷苑
危弦促柱奏巴渝遺簪墮珥解羅襦如何守直道翻
使谷名愚

貴遊行

唐元稹中

漢帝外家子恩澤少封侯垂楊拂白馬曉日上青樓
上有顏如玉高情世無儔輕居含碧煙窈窕似雲浮
良時無還景促節爲我謳忽聞艷陽曲四坐亦已柔
賓友仰稱歎一生何所求平明擊鐘食入夜樂未休

風雨憊歲候兵戎橫九州焉知坐上客草草心所憂

豪家

唐劉駕晚

九陌槐葉盡青春在豪家嬌鶯不出城長宿庭上花
高樓登夜半已見南山多恩深勢自然不是愛驕奢

豪家

唐秦韜玉晚

石甃通渠引御波綠槐陰裏五侯家地衣鎮角香獅
子簾額侵鈎繡辟邪按徹清歌天未曉飲回深院漏
猶賒四鄰池館吞將盡尚自堆金為買花

貴宅

唐曹鄴晚

入門又到門到門戟相對玉簫聲尚遠疑似人不在

公子厭花繁買藥栽庭內望遠不上樓牕中見天外
自是愁人眼見之若奢泰

○行樂

攜手曲二首

原作妾命薄

魏陳思王

攜玉手喜同車北上雲閣飛除釣臺蹇產清虛池塘

觀一作靈沼可娛仰泛龍舟綠波俯擢神草枝柯想彼

宓妃洛河退詠漢女湘娥

日月既逝一作既逝矣西藏更會蘭室洞房華燈步障舒

光一作帳輝煌皎若日出扶桑促樽合坐行觴主人起

舞盜盤能者穴觸別端騰觚飛爵闌干同量等色齊

顏任意交屬所歡朱顏發外形蘭袖隨禮容極情妙
 舞仙仙體輕裳解履遺絕纓俛仰笑喧無呈覽持佳
 人玉顏齊舉一作接金爵翠盤手形羅袖良難腕弱不
 勝珠環坐者嘆息舒顏御巾衰粉君傍中有霍納都
 梁雞舌五味雜香進者何人齊姜恩重愛深難忘召
 延親好宴私但歌杯來何遲客賦既醉言歸主人稱
 露未晞

名都篇

魏陳思王

名都多妖女京洛出少年寶劍直千金被服麗且鮮
 鬪雞東郊道走馬長楸間馳騁未能半雙兔過我前

攬弓捷鳴鏑長驅上南山左挽因右發一縱兩禽連
 餘巧未及展仰手接飛鳶觀者咸稱善衆工歸我妍
 歸來宴平樂美酒十千膾鯉膳胎鰕炮鱉炙熊蹯
 鳴儔嘯匹侶列坐竟長筵連翩擊鞠壤巧捷惟萬端
 白日西南馳光景不可攀雲散還城邑清晨復來還

代堂上歌行

宋鮑照

四坐且莫一作勿誼聽我堂上歌昔仕京洛時高門臨
 長河出入重宮裏結交曹與何車馬相馳逐賓朋好
 榮華陽春孟春月朝光散流霞輕步逐芳風言笑弄
 丹葩暉暉朱顏醜紛紛織女梭滿堂皆美人目成對

湘娥雖謝侍君閑
明妝帶綺羅
箏笛更彈吹
高唱好相和
萬曲不關心一作一曲動情多
欲知情厚薄更聽此聲過

秋夜

齊王融

秋夜長
夜長樂未央
舞袖拂花燭
歌聲繞鳳梁

碧玉歌

梁武帝

杏梁日始照
蕙席歡未極
碧玉奉金杯
綠酒助花色

長歌行

梁元帝

當壚擅旨酒
一卮堪十千
無勞蜀山鑄
扶受一作采

金錢人生行
樂爾何處不留連
朝爲洛生詠
夕作據

梧眠從茲忘物我
優游得自然

永明樂

梁沈約

聯翩貴遊子
侈靡千金客
華轂起風塵
珠履竟長陌

樂未央

梁沈約

億舜日萬堯年
詠湛露歌採蓮
願雜百和氣
宛轉金

鑪前

攜手曲

梁吳均

豔裔陽之春
攜手清洛濱
鷄鳴上林苑
薄暮小平津
長裾藻白日
廣袖帶芳塵
故交一如此
新知詎憶人

賦得今日樂相樂

陳江總

綺殿文雅適玳筵歡趣密鄭態逶迤舞齊弦窈窕瑟
金罍送縹觴玉井沈朱實願此北堂宴長奉南山日

安定侯曲

北魏温子昇

封疆在上地鐘鼓自相和美人當牕舞妖姬掩扇歌

征行詩

北齊高昂

隴種千口牛泉連百壺酒朝朝圍山獵夜夜迎新婦

高句麗

六言

北周王褒

蕭蕭易水生波燕趙佳人自多傾杯覆盃濯濯垂手
奮袖婆娑不惜黃金散盡只畏白日蹉跎

短歌行

隋辛德源

馳射罷金溝戲笑上雲樓少妻鳴趙瑟侍妓轉吳謳
杯度浮香滿扇舉細塵浮星河耿涼夜飛月豔新秋
忽念奔駒促彌欣執燭遊

花月夜

唐武后

春水綠堪染春花紅欲然月華金渙漾夜氣玉暄妍
變繞迴文錦聯籠飛步仙賞心逢美景懽娛正妙年

此詩得之吳孝父詩軸上有永徽二年及昭儀印識

春日鳳樓尋勝地

開元十八年二月初令百官於春月旬休選勝行樂自宰

相至員外郎凡十二筵各賜錢五十緡或御
花萼樓邀其歸騎留飲迭使起舞盡歡而去

唐張說初

西掖持醇酒東山就白雲開軒綠池映命席紫蘭芬
舞度花為伴鶯來管作羣太平多樂事春物共氛氲

扶南曲

唐王維盛

堂上青弦動堂前綺席陳齊歌盧女曲雙舞洛陽人
傾國徒相看寧知心所親

香氣傳空滿妝華影箔通歌聞天上外舞出御樓一作

筵中日暮歸何處花間長樂宮

陽春歌

唐李白盛

長安白日照春空綠楊結煙垂裏風披香殿前花始
紅流芳發色繡戶中繡戶中相經過飛燕皇后輕身

舞紫宮夫人絕世歌聖君三萬六千日歲歲年年柰

樂何

宮中行樂辭

奉詔作○前見宮辭

唐李白盛

小小生金屋行行在紫微山花插寶髻石竹繡羅衣
每出深宮裏常隨步輦歸只愁歌舞散化作綵雲飛

其二

柳色黃金嫩梨花白雪香玉樓巢翡翠金殿鎖鴛鴦
選妓隨雕輦徵歌出洞房宮中誰第一飛燕在昭陽

其三

盧橘為秦樹葡萄出漢宮煙花宜落日絲管醉春風

笛奏龍吟水簫鳴鳳下空君王多樂事還與萬方同
其四

玉樹春歸日金宮樂事多後庭朝未入輕輦夜相過
笑出花間語嬌來竹下歌莫教明月去留著醉嫦娥

其五

繡戶香風爇紗牕曙色新宮花爭笑日池草暗生春
綠樹聞歌鳥青樓見舞人昭陽桃李月羅綺自相親

其六

今日明光裏還須結伴遊春風開紫殿天樂下珠樓
艷舞全知巧嬌歌半欲羞更憐花月夜宮女笑藏鉤

其七

寒雪梅中盡春風柳上歸宮鶯嬌欲醉簷燕語還飛
遲日明歌席新花艷舞衣晚來移綵仗行樂泥光輝

其八

水綠南薰殿花紅北闕樓鶯歌聞太液鳳吹繞瀛洲
素女鳴珠珮天人弄綵毬今朝風日好宜入未央遊

銅官山醉後絕句

唐李白盛

我愛銅官樂千年未擬還要須迴舞袖拂盡五松山

貴主征行樂

唐李賀中

奚騎一作妓黃銅連鎖甲羅旗香榦金畫葉中軍留醉

河陽城嬌嘶紫燕踏花行春營騎將如紅玉走馬捎
鞭上空綠女垣素月角咿咿牙帳未開分錦衣

夜來樂

唐李賀

紅羅複帳金塗蘇華燈九枝懸鯉魚麗人映月開銅
鋪春水滴酒猩猩沽價重一篋香十株赤金瓜子兼
雜麩五色絲封青玉鳧阿侯此笑千萬餘南軒漢轉
簾影疎桐林啞啞挾子烏劍崖鞭節青石珠白駟吹
湍凝霜鬚漏長送珮承明廬倡樓嗟峨明月孤續客
下馬故客去綠蟬秀黛重拂梳

花遊曲

并序

唐李賀

寒食日諸王妓遊賀入座因採梁簡文詩調賦花
遊曲與妓彈唱

春柳南陌態冷花寒露姿今朝醉城外拂鏡濃掃眉
煙濕愁車重紅油覆畫衣舞裙香不暖酒色上來遲

夜飲朝眠曲

唐李賀

觴酣出座東方高腰橫半解星勞勞柳苑鴉啼公主
醉薄露壓花蕙蘭氣玉轉濕絲牽曉水熟粉生香琅
玕紫夜飲朝眠斷無事楚羅之幃臥皇子

冬白紵

唐元稹

吳宮夜長宮漏緩簾幕四垂燈焰暖西施自舞王自

管雪紵翻翻鶴翎散上聲促節牽繁舞腰嬾舞腰嬾王
罷飲蓋覆西施鳳花錦身作匡牀臂爲枕朝珮撻玉
王宴寢寢醒閣報門無事子胥死後言爲諱近王之
臣諭王意共笑越王窮惴惴夜夜抱冰寒不睡

和思黯居守獨飲偶醉見示六韻

唐白居易中

宮漏滴漸閑城烏啼復歇此時若不醉爭奈千門月
主人中夜起妓燭前羅列歌袂默收聲舞鬟低赴節
絃吟玉桂品酒透金杯熱朱顏忽已醺清奏猶未闕

今日曷不樂原作古風

唐韓愈中

今日曷不樂幸時不用兵無曰旣感矣乃尚可以生
彼州之賦去汝不顧此州之役去我奚適一邑之水
可走而違天下湯湯音傷曷其而歸好我衣服甘我飲
食無念百年聊樂一日

咸通曲

唐韋莊晚

咸通時代物情奢歡殺金張許史家破產競留天上
樂鑄山爭竄洞中花諸郎宴罷銀燈合仙子遊迴壁
月斜人意似知今日事急催絃管送年華

○公子

思公子

梁費昶

公子才氣饒凌雲自飄飄東出關雞道西登飲馬橋
夕宴銀爲燭朝燔桂作焦虞卿亦何命窮極苦無聊

公子行

唐劉希夷

初

天津橋下陽春水天津橋上繁華子馬聲迴合青雲
外人影搖動綠波裏綠波清迴玉爲砂青雲離披錦
作霞可憐楊柳傷心樹可憐桃李斷腸花此日遨遊
邀美女此時歌舞入娼家娼家美女鬱金香飛去飛
來公子傍的的朱簾白日映娥娥玉顏紅粉妝花際
徘徊雙蛺蝶池邊顧步兩鴛鴦傾國傾城漢武帝爲
雲爲雨楚襄王古來容光人所羨況復今日逢相見

願作輕羅著細腰願爲明鏡分嬌面與君相向轉相
親與君雙棲共一身願作貞松千歲古誰論芳槿一
朝新百年同謝西山日千秋萬古北邙塵

張公子行

唐常建

盛

日出乘釣舟嫋嫋持釣竿涉淇傍荷花驄馬閑金鞍
俠客白雲中腰間懸轆轤出門事嫖姚爲君西擊胡
胡兵漢騎相馳逐轉戰孤軍西海北百尺旌竿沈黑
雲邊笳落日不堪聞

梁公子

唐李賀

中

風彩出蕭家本是菖蒲花南城蓮子熟洗馬走江沙

一作御戕銀沫冷長簾鳳窠斜種柳營中暗題書賜
館娃

公子行

唐顧況中

輕薄兒面如玉紫陌春風纏馬足雙鞵懸金鏤鶻飛
長衫刺雪生犀束綠槐夾道陰初成珊瑚幾節敵流
星紅肌拂拂酒光凝當街背拉金吾行朝遊瑟瑟鼓
聲發暮遊瑟瑟鼓聲絕入門不肯自升堂美人扶踏
金階月

公子行

唐于鵠中

少年初拜大長秋半醉垂鞭見列侯馬上抱鷄三市

關袖中攜劍五陵遊玉簫金管迎歸院錦袖紅裝擁
上樓更向苑西新買宅月波春水入門流

公子行

唐朱慶餘中

閑從結客冶遊時忘却紅樓薄暮期醉上黃金堤上
去馬鞭梢斷綠楊絲

公子

唐李商隱晚

一盞新羅酒凌晨恐易銷歸應衝鼓半去不待笙調
歌好唯愁和香穠豈惜飄春塲鋪艾帳下馬雉媒驕

公子

唐李商隱晚

外戚封侯自有恩平明通籍九華門金唐公主年應

小二十君王未許婚

公子行

唐雍陶晚

公子風流嫌一作輕

錦繡新裁白紵作春衣金鞭留當

誰家酒拂柳穿花信馬歸

公子行

唐韓琮晚

紫袖長衫色銀蟬半臂花帶裝盤水玉鞍繡坐雲霞

別殿承恩澤飛龍賜渥注控羅青鳥轡鏤象碧重葩

意氣催歌舞闌珊走鈿車袖障雲縹緲釵轉鳳欹斜

珠卷迎歸箔紅籠晃醉紗唯無難夜日不得似仙家

貴公子

唐韋莊晚

大道青樓御苑東玉欄僊杏壓枝紅金鈴犬吠梧桐

月朱鬣馬嘶楊柳風流水帶華穿巷陌夕陽和樹入

簾櫳瑤池宴罷歸來醉笑說君王在月宮

貴公子行

唐秦韜玉晚

堦前莎毬綠不捲銀龜噴香挽不斷亂花織錦柳撚

線妝點池臺畫屏展主人公業傳國初六親聯亂馳

朝車鬪鷄走狗家世事抱來皆佩黃金魚却笑儒生

把書卷學得顏回忍飢面

公子家

唐李山甫晚

曾是王家幾世侯入雲高第照神州柳遮門戶橫金

鎖花擁絃歌咽畫樓錦袖妬姬爭巧笑玉街驕馬索
閑遊麻衣酷獻平生業醉倚春風不點頭

寄襄陽王公子

唐馬戴晚

君馬勒金羈君家貯玉筭白雲登峴首碧樹醉銅鞮
澤廣荊州北山多漢水西鹿門知不隱芳草自萋萋

公子行

唐羅鄴晚

金鞍玉勒照花明過後春風特地生半醉五侯門裏
出月高猶在禁街行

富平少侯

唐李商隱晚

七國三邊未到憂十三身襲富平侯不收金彈拋林

外却借銀牀在此頭綵樹轉燈珠錯落繡檀迴枕玉
雕鏤當關不報此客新得佳人字莫愁

榮華樂

一作東洛
梁家謠

唐李賀中

鳶肩公子二十餘齒編貝唇激朱氣如虹霓飲如建
瓴走馬夜歸叫嚴更徑穿複道遊椒房龍裘金玦雜
花光玉堂調笑金樓子臺下戲學邯鄲倡口吟舌話
稱女郎錦袪繡面漢帝旁得明珠十斛白璧一雙新
詔垂金曳紫光煌煌馬如飛人如水九卿六官皆望
履將迴日月先反掌欲作江河唯畫地峩峩虎冠上
切雲竦劍晨趨凌紫氛繡段千尋貽阜隸黃金百鎰

賦家臣十二門前張大宅晴春煙起連天碧金鋪綴
口雜紅光銅龍齧環似爭力姪姬凝醉卧芳席海素
籠窻空下隔丹穴取鳳充行庖獲獲如拳那足食金
蟾呀呀蘭燭香軍裝武妓聲琅璫誰知花雨夜來過
但見池臺春草長嘈嘈絃吹匝天開洪厓簫聲遶天
來天長一矢貫雙虎雲肥絕騁聒早雷亂袖交竿管
兒舞吳音綠鳥學言語能教刻石平紫金解送刻毛
寄新兔三皇皇后七貴人五十校尉二將軍當時飛
去逐彩雲化作今日京華春

○隱逸

隱士

魏阮瑀

四皓潛南岳老萊窳河濱顏回樂陋巷許由安賤貧
伯夷餓首陽天下歸其仁何患處貧苦但當守明真

隱士

原作
擬古

晉陶淵明

東方有一士被服常不完三旬九遇食十年著一冠
辛苦無此比常有好看顏我欲觀其人晨去越河關
青松夾路生白雲宿簷端知我故來意取琴爲我彈
上絃驚別鶴下絃操孤鸞願留就君住從今至歲寒

逸民吟

晉潘尼

我顧傲世自遺舒志六合由巢是追沐浴洪池口迅

羽衣陟彼名山採此芝薇朝雲靉靄行露未晞游魚
羣戲翔鳥雙飛逍遙博觀日晏忘歸嗟哉四士從我
者誰

逸民

梁武帝

如壟生木木有異心如林鳴鳥鳥有殊音如江游魚
魚有浮沈巖巖山高湛湛水深事迹易見理相難尋

和趙王隱士

北周王褒

鳧鵠均長短鷓鴣共逍遙清襟蘊秀氣虛席滿風颺
斷絃惟續葛獨酌止傾瓢菖蒲九重節桑薪七過燒

奉和趙王隱士

北周庾信

洛陽徵五隱東都別二賢雲氣浮函谷星光集潁川
霸陵採樵徑一作路成都賣卜錢鹿裘披稍裂藜牀坐
欲穿阮籍唯長嘯嵇康訝一絃澗險無平石山深足
細泉短松猶百尺少鶴已千年野鳥繁絃嘒山花燭
火燃洞風吹戶裏石乳滴牕前雖無亭長識終見野
人傳

招隱二首

晉左思

杖策招隱士荒塗橫古今巖穴無結構丘中有鳴琴

白雲

一作雪

停陰岡丹葩曜陽林石泉漱瓊瑤纖鱗或

赤一作亦

浮沈非必有絲竹山水有清音何事待嘯歌灌

木自悲吟秋菊兼餽糧幽蘭間重襟躊躇足力煩聊
欲投吾簪

經始東山廬果下自成榛前有寒泉井聊可瑩心神
峭蒨青葱間竹柏得其真弱葉棲霜雪飛榮流餘津
爵服無常玩好惡有屈伸結綬生纏牽彈冠去埃塵
惠連非吾屈首陽非吾仁相與觀所尚逍遙撰一作極
良辰

招隱

晉陸機

駕言尋飛遯山路鬱盤桓芳蘭振蕙葉玉泉涌微瀾
嘉卉獻時服靈木進朝餐

招隱詩

晉陸機

明發心不夷振衣聊躑躅躑躅欲安之幽人在浚谷
朝采南澗藻夕息西山足輕條象雲構密葉承翠幄
激楚佇蘭林回芳薄秀木山溜何泠泠飛泉漱鳴玉
哀音附音附靈波頽響赴曾曲至樂非有假安事澆淳
樸富貴苟難圖稅駕從所欲

招隱

晉張華

棲遲四野外陸沈背當時循名掩不著藏器待無期
羲和策六龍弭節越崦嵫盛年俛仰過忽若振輕絲
招隱

晉張載

出處雖殊塗居然有輕易山林有悔恡人間實多累
鷓鴣翔窮冥蒲且不能視鶴鷺遵臯渚數為矰所繫
隱顯雖在心彼我共一地不見巫山火芝艾豈相離
去來捐時俗超然辭世偽得意在丘中安事愚與智
嗟哉巖岫士歸來從所欽

招隱

晉閻丘冲

招隱

晉王康琚

登山招隱士褰裳躡遺蹤華條當園室翠葉代綺牕
反招隱詩

晉王康琚

小隱隱陵藪大隱隱朝市伯夷竄首陽老聃伏柱史
昔在太平時亦有巢居子今雖盛明世能無中林士
放神清雲外絕迹窮山裏鷓鴣先晨鳴哀風迎夜起
凝霜凋朱顏寒泉傷玉趾周才信衆人偏智任諸已
推分得天和矯性失至理歸來安所期與物齊終始

擬招隱士

梁范縝

脩竹苞生兮山之岑繽紛葳蕤兮下交陰木龍藂兮
巍我川澤泱泱兮雲霧多悲援鳴噪兮嘯儔侶攀折
芳條兮聊停佇夫君兮不還蕙華兮彫殘歲晏兮憂
未開草蟲鳴兮淒淒蕭兮森兮玄澗深悵徬徨兮沈

吟紛紜兮掩曖窮巖穴兮熊窟幽林杳冥兮吁可畏
嶽崟兮嶮巖岌岌兮傾欹飛泉兮激沫散漫兮淋漓
弱蘿兮脩葛亘蔓兮長枝綠林兮被崖隨風兮紛披
猛獸兮封狐眈眈兮視余扶藤兮直上巖巖兮疑疑
罪罪兮敷敷赤豹兮文狸攀騰兮相追思慕公子兮
心遲遲寒風厲兮鷓臬吟鳥悲鳴兮離其羣公子去
兮誰與親行露厭浥兮似中人

賦得招隱

陳伏知道

招隱訪仙楹丘中琴正鳴桂叢侵石路桃花隔世情
薄暮安車近林喧山鳥驚

賦得巖穴無結構

左太冲招隱詩見前

隋王由禮

巖間無結構谷處極幽尋葉落秋巢迴雲生石路深
早梅香野徑清澗響丘琴獨有栖遲客留連芳杜心

招隱詩

唐僧曇翼

連峯數千里脩林帶平津雲起遠山翳風至蔓荒榛
茅茨隱不見鷄鳴知有人躡蹠踐其跡處處見遺薪
乃知百代下固有上皇民

贈鞏仲治詩

晉張華

君子有逸志棲遲於一丘仰蔭高林茂俯臨淥水流
恬淡養玄虛沈精研聖猷

贈周處士

梁庾肩吾

九丹開石室三徑沒荒林仙人翻可見隱士更難尋
籬下黃花菊丘中白雪琴方欣松葉酒自和遊山吟

李蕭遠有遊山九吟

留贈山中隱士

陳周弘讓

行行訪名嶽處處必留連遂至一巖裏灌木上參天
忽見茅茨屋曖曖有人煙一士開門出一士呼我前
相看不道姓焉知隱與仙

貽韋居士

北史曰韋賢字敬遠杜陵人志尚簡淡州郡徵辟並不就周文帝經綸王業側席禮聘竟不能屈時人號為居士明帝即位禮敬愈厚乃為詩以貽之夏答詩願時

朝謁帝大悅敕有司日給酒一升號曰逍遙公

北周明帝

六爻貞遯世三辰光少微賴陽去猶一作讓逾遠滄洲遂

一作去不歸風動秋蘭佩香飄蓮葉衣坐石窺仙洞乘

槎下釣磯嶺松千仞直巖泉百丈飛聊登平樂觀遙想首陽薇儻能同四隱來參余萬機

奉報窮秋寄隱士

北周庾信

王倪逢嚙缺桀溺偶長沮藜牀負日臥麥隴帶經鋤
自然曲木几無名科斗書聚花聊飼雀穿池試養魚
小村治澀路低田補壞渠秋水牽沙落寒藤抱樹疎
空枉平原騎來過仲蔚廬

寄廬山隱者

唐楊衡初

風鳴雲外鐘鶴宿千年松相見杳不見月出山重重

贈劉先生閑居

先生及第後為道士居太清宮又從戎而後歸

唐儲光羲盛

高第後歸道乃居玉華宮逍遙人間世不異浮丘公
甘寢何秉羽出門忽從戎方將遊崑崙又欲小崆峒
進退既在我歸來長安中焚香東海君侍坐西山童
善行無轍跡吾亦安能窮但見神色閑中心如虛空
期之比天老貞德輔帝鴻

贈別褚山人

唐高適盛

攜手贈將行山人道姓名光陰薊子訓才術褚先生
墻上梨花白樽中桂酒清洛陽無二價猶自慕風聲

贈別沈四逸人

唐高適盛

沈侯未可測其況信浮沈十載常獨坐幾人知此心
乘舟蹈滄海買劍投黃金世務不足煩有田西山岑
我來遇知己遂得開清襟何意闡閩間沛然江海深
送郭處士往萊蕪兼寄苟山人

唐高適盛

君為東蒙客往來東蒙畔雲臥臨嶧陽山行窮日觀
少年詞賦皆可聽秀眉白面風清冷身上未嘗染名

利口中獨未知羶腥今日還山意無極豈知世路多
相識歸見萊蕪九十翁爲論別後長相憶

寄西嶽山人李岡

唐岑參

盛

君隱處當一星蓮花峯頭飯黃精仙人掌上演丹經
鳥可到人莫攀隱來十年不下山袖中短書誰爲達
華陰道士賣藥還

滑中贈顧高士瓘

唐王季友

盛

夫子保藥命外身得無咎日月不能老化腸爲筋不
十年前見君甲子過我壽於何今相逢華髮在我後
近而知其遠少見今白首遙信蓬萊宮不死世世有

玄石采盈擔神方秘其肘問家唯指雲愛氣常言酒
攝生固如此履道當不朽未能太玄同願亦天地久
實腹以芝朮賤形仍芻狗自勉將勉余良藥在苦口

贈參寥子

唐李白

盛

白鶴飛天書南荆訪高士五雲在峴山果得參寥子
骭髀辭故園昂藏入君門天子分玉帛百官接話言
毫墨時灑落探玄有奇著作論窮天人千春秋麟閣
長揖不受官拂衣歸林巒余亦去金馬藤蘿同所攀
相思在何處桂樹青雲端

贈盧徵君昆弟

按盧徵君名鴻字顯然玄宗開元初備禮徵不至五年再詔徵

至東都謁見拜諫議大夫固辭制許還山賜
隱居服官營草堂及卒帝賜萬錢鴻所居室
自號寧
極云

唐李白盛

明王訪賢逸雲泉今已空
一盧竟不起萬乘高其風
河上喜相得壺中趣每同
滄洲即此地觀化遊無窮
水落海上清鼇背覩方蓬
與君弄倒景攜手凌星虹

口號贈盧徵君鴻

唐李白盛

陶令辭彭澤梁鴻入會稽
我尋高士傳君與古人齊
雲臥留丹壑天書降紫泥
不知楊伯起早晚向關西

贈錢徵君少陽

唐李白盛

白玉一杯酒綠楊三月時
春風餘幾日兩鬢各成絲

秉燭唯須飲投竿也未遲
如逢渭水獵猶可帝王師

贈閻丘處士

唐李白盛

賢人有素業乃在沙塘陂
竹影掃秋月荷衣落古池
閒讀山海經散帙臥遙帷
且耽田家樂遂曠林中期
野酌勸芳酒園蔬烹露葵
如能樹桃李為我結茅茨

贈丹陽橫山周處士惟長

唐李白盛

周子橫山隱開門臨城隅
連峯入戶牖勝槩凌方壺
時枉白紵詞放歌丹陽湖
水色傲溟渤川光秀菰蒲
當其得意時心與天壤俱
閑雲隨舒卷安識身有無
抱石耻獻主沈泉笑探珠
羽化如可作相攜上清都

贈張公洲革處士

唐李白盛

列子居鄭圃不將衆庶分革侯遁南浦常恐楚人聞
抱甕灌秋蔬心閒遊天雲每將瓜田叟耕種漢水濱
時登張公洲入獸不亂羣井無桔槔事門絕刺繡文
長揖二千石遠辭百里君斯爲真隱者吾黨慕清芬

寄弄月溪吳山人

唐李白盛

嘗聞龐德公家住洞湖水終身棲鹿門不入襄陽市
夫君弄明月滅景清淮裏高蹤邈難追可與古人比
清揚杳莫覩白雲空望美待號辭人間攜手訪松子

玄都壇歌寄元逸人

唐杜甫盛

故人昔隱東蒙峯已佩含景蒼精龍故人今居子午
谷獨在陰生結茅屋屋前太古玄都壇青石漠漠常
風寒子規夜啼山竹裂王母書下雲旗翻知君此計
誠長往芝草琅玕日應長鐵鎖高垂不可攀致身福
地何蕭爽

常掛一花瓠及曲竹枝醉則歌

唐許宣平狂流

負薪朝出賣沽酒日西歸路人莫問歸何地穿白雲
行入翠微

東湖送朱逸人歸

唐劉長卿中

山色湖光併在東，扁舟歸去有樵風。莫道野人無外事，開田鑿井白雲中。

贈秦系徵君

唐劉長卿

羣公誰讓位，五柳獨知貧。惆悵青山路，煙霞老此人。

過鳴臯隱者

唐錢起

礧石老紅鮮，徵君臥幾年。飛一作百泉出林下一徑過。

窮一作崖巔，鷄犬逐人靜。雲霞宜地偏，終朝數峯勝。不

遠一壺前，仲月霽。春雨香風生，藥田丹溪不可別。瓊草色芊芊。

春暮過石龜谷題溫處士林園

唐錢起

隱几無名老，何年此陸沈。丘園自得性，婚嫁不嬰心。歲計因山薄，霞棲在谷深。設罝連草色，曬藥背松陰。觸興雲生岫，隨耕鳥下林。搢頤笑來客，頭上有朝簪。

送楊綃歸隱

唐錢起

悔作掃門事，還吟招隱詩。今年芳草色，不失故山期。遙想白雲裏，采苓春日遲。溪花藏石徑，巖翠帶茅茨。九轉莫飛去，三廻良在茲。還嗤茂陵客，貧病老明時。

贈鄭山人

唐皇甫冉

白首滄洲客，陶然得此生。龐公採藥去，萊氏與妻行。

乍見還州里全非隱姓名

湖山歌送許鳴謙

并序

唐皇甫冉

中

夫子隱者也耕於湖山之田孤雲無心飛鳥無跡
伯仲邕邕家人怡怡貞白之風旁行於澆俗矣始
惠然而去又翻然而歸春田雪餘具物繁殖結我
幽夢湖間一峯酒而歌歌之以送遠

湖中之山兮波上青桂颯颯兮雨冥冥君歸兮春早
滿山兮碧草晨春暮汲兮心何求澗戶巖扉兮身自
老東嶺西峯兮同白雲鷄鳴犬吠兮時相聞幽芳媚
景兮當嘉月踐石捫蘿兮恣超忽空山寂寂兮潁陽

人日夕孤雲隨一身

荅裴處士一首

唐韋應物

中

遺民愛精舍乘犢入青山來署高陽里不遇白衣還
禮賢方化俗聞風自歎關況子逸羣士棲息蓬蒿間
二

春風駐遊騎晚景澹山暉一問清冷子獨掩荒園扉
草木雨來長里閭人到稀方從廣陵宴花落未言歸

贈殷山人

唐張籍

中

鬱鬱山中客知名四十年恹恹身獨隱寂寞性應便
世業公侯籍生涯黍稷田藤懸讀書帳竹繫網魚船

已種千頭橘新開數脉泉閑遊攜酒遠出語向僧偏
入洞題松過看花選石眠避喧長汨沒逢勝即留連
自古多高跡如君少比肩深藏報恩劍久降養生篇
憔悴衆夫笑經過郡守憐夕陽悲舊鶴霜氣動饑鷗
放逸棲巖鹿清虛飲露蟬鄭逃秦谷口巖愛越溪邊

寄紫閣隱者

唐張籍中

紫閣氣沈沈先生住處深有人時得見無路可相尋
夜鹿伴茅屋秋猿守栗林唯應採靈藥更不別營心

憶盧常侍寄華山鄭隱者

唐張籍中

獨住三峯下年深學煉丹一間松葉屋數片石花冠

酒待山中飲琴將洞裏彈開門移遠竹翦草出幽蘭
荒壁通泉架晴崖曬藥壇寄知騎省客長向白雲閒

禁中送任山人

唐李泌中

子去非常往君恩取大還補天留綵石縮地入青山
獻壽千年外來朝數月閑莫拋殘藥物切欲駐童顏

暮春尋終南柳處士

唐李端中

龐眉一居士鶉服隱堯時種苴初成畝還丹舊日師
入溪花逕遠向嶺鳥行遲紫葛垂苔壁青菰映柳絲
偶來塵事外暫與素心期終恨遊春客同爲歲月悲

贈強山人

唐郎士元中

或棹輕舟或杖藜尋常適意釣前溪草堂竹徑在何處落日孤煙寒渚西

送孔徵士

唐權德輿中

谷口山多處君歸不可尋家貧清史在身老白雲深掃雪開松徑疏泉過竹林余生負丘壑相送亦何心

贈徐山人

唐戴叔倫中

亂餘山水半凋殘江上逢君春正闌針自指南天宿皆星猶拱北夜漫漫漢陵帝子黃金盃晉代神仙白玉棺回首風塵千里別故園煙雨五峯寒

贈陳逸人

朱慶餘中

樂道辭榮祿安居桂水東得閑多事外知足少年中藥圃無凡草松庭有素風朝昏吟步處琴酒與誰同

送孫逸人

唐賈島中

衣履猶同俗妻兒亦宛然不餐能累月無病已多年是藥皆諳性令人漸信仙杖頭書數卷荷入翠微煙

寄邢逸人

唐鄭常中

羨君無外事日與世情稀地僻人難到溪深鳥自飛
儒衣荷葉老野飢藥苗肥疇昔江湖意如今憶共歸

買山吟

唐于鵠中

買得幽居屬漢陽槿籬疎處種桄榔唯有獼猴來往

孰弄人拋果滿書堂

題贈平泉韋徵君拾遺

唐白居易中

箕穎千年後唯君得古風仕留丹陛下身入白雲中
躁靜心相背高低跡不同籠鷄與梁燕不信有冥鴻

丘中有一士二首

唐白居易中

丘中有一士不知其姓名面色不憂苦血氣常和平
每選隙地居不踏要路行舉動無尤悔物莫與之爭
藜藿不充腸布褐不蔽形終歲守窮餓而無嗟歎聲
豈是愛貧賤深知時俗情勿矜羅弋巧鸞鶴在冥冥

二

丘中有一士守道歲月深行披帶索衣坐拍無絃琴
不飲濁泉水不息曲木陰所逢苟非義糞土千黃金
鄉人化其風熏如蘭在林智愚與強弱不忍相欺侵
我欲訪其人將行復沈吟何必見其面但在學其心

題王居士

唐許渾晚

筇杖倚柴關都城賣卜還雨中耕白水雲外斲青山
有藥身長健無機性自閑卽應生羽翼華表在人間

題灞西駱隱士

唐許渾晚

磻溪連灞水商嶺接秦山青漢不回駕白雲長一作空
掩關雀喧知鶴靜鳧戲識一作鷗閑却笑南昌尉悠

悠城市間

贈王處士

唐許渾晚

歸臥養天真鹿裘烏角巾茂陵閑久病彭澤醉長貧
冠蓋西園夜笙歌北里春誰憐清渭曲又老釣魚人

贈王山人

唐許渾晚

貫酒攜琴訪我頻始知城市有閑人君臣藥在寧憂
病子母錢成豈患貧年長每勞推甲子夜寒初共守
庚申近來聞說燒丹處玉洞桃花萬樹春

寄華嶽孫逸人

唐李商隱晚

靈嶽幾千仞老松逾百尋攀崖仍躡壁嗽葉復眠陰

海上呼三島齋中戲五禽唯應逢阮籍長嘯作鸞音

題玉笥山強處士

唐方干晚

酒裏藏身巖裏居刪繁自是一家書世人呼爾為漁

叟爾學釣璜非釣魚

題太白山隱者

唐項斯晚

高居在幽嶺人得見時稀寫錄扁虛白尋僧到翠微
掃壇星下宿收藥雨中歸從服小還後自疑身解飛

送華陰隱者

唐項斯晚

往往到城市得非徵藥錢世人空識面弟子莫知年
自說能醫死相期更學仙近來移住處毛女舊峯前

題華山麻處士

唐于鄴晚

貴賤各擾擾皆逢朝市間
到此馬無跡始知君獨閑
冰破聽敷水雪時看華山
西風寂寞地唯我坐忘還

贈隱者

唐于鄴晚

石室掃無塵人寰與此分
飛來南浦樹半是華山雲
浮世幾多事先生應不聞
寒川滿西日空照鴈成羣

贈隱者

唐儲嗣宗晚

盡室居幽谷亂山爲四隣
霧深知有術牕靜似無人
鶴語松上月花明雲裏春
生涯更何許尊酒與垂綸

過野叟居

唐馬戴晚

野人閑種樹樹老野人前
居止白雲內漁樵滄海邊
呼兒採山藥放犢飲溪泉
自著養生論無煩憂暮年

贈丘先生

唐鄭巢晚

雲泉心不爽垂白坐柴關
硯取簷前雨一作水圖開異

國山原僧招過宿沙鳥伴
長閑地與中峯近殘陽獨
不還

送隱者

唐杜牧晚

無媒徑草路蕭蕭自古雲
林遠市朝公道世間唯白
髮貴人頭上不曾饒

溪叟

唐僧景雲

溪翁居處靜溪鳥入門飛早起釣魚去夜深乘月歸
露香菰米熟煙煖荇絲肥瀟灑塵埃外扁舟一草衣
尋隱者不遇

唐僧貫休

晚

松下問童子言師採藥去只在此山中雲深不知處

紫溪翁歌

唐陸龜蒙

晚

一丘之木其棲深也屋吾客不辱一溪之石其居平
也席吾勞以息一竇之泉其音清也絃吾方在懸得
乎人得乎天吾不知所以然而然先生側弁而賢之
曰采江之魚今朝船有鱸采江之蔬今暮筐有蒲左
圖且書右琴與壺壽歟天歟貴歟賤歟歌闋而去

丁隱君歌

唐陸龜蒙

晚

華陽道士南遊歸手中半卷青羅衣

一作皮

自言逋客

持賜我乃是錢塘丁翰之連江

一作更

大抵多奇岫獨

話君家最孤秀盤燒天竺春筍肥琴倚洞庭秋石瘦
草堂暗引龍泓溜老樹根株若蹲獸霜濃果熟未容
收往往兒童雜猿狖

詩雋類函卷六十五

東吳俞安期彙纂 宣城梅鼎祚增定

榆林杜文煥訂校

人部七

老人 賢婦 貞烈 宮人 戍婦

○老人

詠老

魏阮瑀

白髮隨節墮未寒思厚衣四支易懈倦行步益疎遲
常恐時歲盡魂魄忽高飛自知百年後堂上生旅葵

詠老

晉陸機

軟顏收紅蘂玄鬢吐素華冉冉逝將老咄咄奈老何

詠老

氣力盡衰損鬢髮終以皓昔為春月華今為秋日草
詠老

宋范泰

枉生竟何豫未云倏已老華髮飄悴容苦慮栖懷抱
疇昔少年時皆以歸大造

詠老贈夢得

唐白居易中

與君俱老也自問老何如眼澀夜先臥頭慵朝未梳
有時扶杖出盡日閉門居懶照新磨鏡休看小字書
情於故人重跡共少年疎唯是閒談興相逢尚有餘

三叟

魏應璩

古有行道人陌上見三叟年各百歲餘相與鋤禾莠
住車問三叟何以得此壽上叟前致辭內中嫗貌醜
中叟前致辭量腹節所受下叟前致辭夜臥不覆首
要哉三叟言所以能長久

擊磬老人

唐王昌齡盛

雙峯褐衣久一磬白眉長誰識野人意徒看春草芳

贈山老人

唐李端中

白首獨一身青山為四隣雖行故鄉陌不見故鄉人

贈柏巖老人

唐錢起中

日與麋鹿羣賢哉買山叟龐眉忽相見避世一何久

晉張載

余未何

宋范泰

余未何

唐白居易

中

唐白居易

中

魏應璩

魏應璩

林棲古崖曲野事佳春後瓠葉覆荆扉栗苞垂甕牖
獨歌還獨酌不耕亦不耦磽田隔雲溪多雨長稂莠
煙霞得情性身世同芻狗寄謝營道人天貞此翁有
柏崖老人號無名先生男削髮女黃冠自以雲

泉獨樂命予賦詩

唐錢起

古也憂婚嫁君能樂性場

一作道場

長男棲月宇少女炫

霓裳問爾餐霞處春山芝桂旁鶴前飛九轉壺裏駐
三光與我開龍嶠披雲靜藥堂胡麻兼藻綠石髓隔
花香帝力言何有椿年喜漸長窅然高象外寧不傲
羲皇

贈太白老人

唐張籍

日觀東峯幽客住竹巾藤帶亦逢迎暗修黃錄無人
見深種胡麻共犬行洞裏仙家常獨往壺中靈藥自
爲名春泉四面遶茅屋日日唯聞杵臼聲

代園中老人

唐耿湜

傭賃難堪一老身皤皤力役在青春林園手種唯吾
事桃李成陰歸別人

路旁老人

唐耿湜

老人獨坐倚官樹欲語潛然淚便垂陌上歸心無產
業城邊戰骨有親知餘生尚在艱難日長路多逢輕

薄兒綠水青山雖似舊如今貧後復何爲

山老吟

唐孟郊中

不行山下地唯種山上田腰斧斫旅松手瓢汲家泉
詎知文字力莫記日月遷蟠木爲我身始得全天年

洛陽有愚叟

唐白居易中

洛陽有愚叟白黑無分別浪迹雖似狂謀身亦不拙
閑將酒壺出醉向人家歛野食或烹鮮寓眠多擁褐
抱琴榮啓樂荷插劉伶達放眼看青山任頭生白髮
從此到終身盡爲閑日月

示鄉叟

唐方干晚

暮齒甘衰謝逢人惜別離青山前代業老樹此身移
買藥將衣盡尋方見字遲如何鑷殘鬢覽鏡變成絲

馮叟居

唐劉駕晚

天作馮叟居山僧尚嫌僻開門因兩樹結宇倚翠壁
溪南有微徑時遇採芝客往往白雲生對面千里隔
機忘若僮僕常與猿鳥噓曬藥上小峯庭深無日色
自忘歸鄉里不見新舊戚纍纍子孫墓秋風吹古柏

在江陵歎年傷老

宋鮑照

五難未易夷三命戒淵抱方瞳起松髓頰髮凝桂腦
役生良自休大患安足保開簾窺景夕備屬雲物好

翩翩燕弄風嫋嫋柳垂道池瀆亂蘋萍園援美花草
節如驚灰異零落就衰老

秋夕嘆白髮

梁何遜

絲白不難染蓬生直易扶唯見

此一作

星星鬢獨與衆

中殊昔年十四五率性頗廉隅直是安被褐非敢慕
懷珠何言志事晚疲拙嬰殊軀逢時乃倏忽失路亦
斯須郊郭勤二頃形體憇一廡涸蚌困魚目籠禽觸
四隅宵長壁立靜廓處謝歡愉月色臨牕樹蟲聲當
戶樞飛蛾拂夜火墜葉舞秋株逐物均乘鶴違俗等
雙鳧故人倘未棄求我谷之嶠

白頭吟

唐劉希夷

初

洛陽城東桃李花飛來飛去落誰家洛陽女兒惜顏
色行逢落花長嘆息今年花落顏色改明年花開復
誰在已見松柏摧爲薪更聞桑田變成海古人無復
洛城東今人還對落花風年年歲歲花相似歲歲年
年人不同寄言全盛紅顏子須憐半死白頭翁此翁
白頭真可憐伊昔紅顏美少年公子王孫芳樹下清
歌妙舞落花前光祿池臺文錦繡將軍樓閣畫神仙
一朝臥病無知己三春行樂在誰邊宛轉蛾眉能幾
時須臾鶴髮亂如絲但看古來歌舞處唯有黃昏鳥

雀悲

歎老三首

唐白居易

中

晨興照清鏡形影兩寂寞少年辭我去白髮隨梳落
萬化成於漸漸衰看不覺但恐鏡中顏今朝老於昨
人年少滿百不得長歡樂誰會天地心千齡與龜鶴
吾聞善醫者今古稱扁鵲萬病皆可治唯無治老藥
我有一握髮梳理何稠直昔似玄雲光今如素絲色
匣中有舊鏡欲照先歎息自從頭白來不欲明磨拭
鷗頭與鶴頸至老長如墨獨有人鬢毛不得終身黑

三

前年種桃核今歲成花樹去歲生嬰兒今年已學步
但驚物成長不覺身衰暮去矣欲何如少年留不住
因書今日意徧寄諸親故壯歲不歡娛長年當悔悟

漸老

唐白居易

中

今朝復明日不覺年齒暮白髮逐梳落朱顏辭鏡去
當春頗愁寂對酒寡歡趣遇境多愴卒逢人益敦故
形質屬天地推遷從不住所怪少年心銷磨落何處

昨日復今日

唐白居易

中

昨日復今日悠悠七十春所經多故處却想是前身

散秩優游老閒居淨潔貧螺盃中有物鶴髦上無塵
解佩收朝帶抽簪換野巾風儀與名號別是一生人

不與老為期

唐白居易中

不與老為期因何兩鬢絲纔應免天促便已及衰羸
昨夜夢何在明朝身不知百憂非我所三樂是吾師
閉日常閑坐低頭每靜思存神機慮息養氣語言遲
行亦攜詩篋眠多枕酒卮自慙無一事少有不安時

九老會

唐白居易中

胡吉鄭劉盧張等六賢皆多年壽予亦次焉偶於
弊居合成尚齒之會七老相顧既醉甚歡靜而思

之此會稀有因成七言六韻以紀之傳好事者懷
州司馬安定胡杲年八十九衛尉卿致仕馮翊吉
皎年八十六右龍武軍長史滎陽鄭據年八十四
慈州刺史廣平劉真年八十二御史內供奉官范
陽盧貞年八十二永州刺史清河張渾年七十四
刑部尚書致仕太原白居易年亦七十四已上七
人合五百七十歲會昌五年三月二十有一日於
白家履道宅同宴宴罷賦詩時秘書監狄兼謨河
南尹盧貞以年未七十雖與會而不及列
七人五百七十歲拖紫紆朱垂白鬚手裏無金莫嗟

歎樽中有酒且歡娛詩吟兩句神還王酒飲三盃氣
尚麤嵬峩歌狂教婢拍婆娑醉舞遣孫扶天年高過
二疎傳人數多於四皓圖除却三山五天竺人間此
會更應無

九老會

唐胡杲中

閑居同會在三春大抵愚年最出羣霜鬢不嫌盃酒
興白頭仍愛玉爐薰徘徊玩柳心猶健老大看花意
却勤鑿落滿斟判酪酏香囊高挂任氤氳搜神得句
題紅紙望景長吟對白雲今日友情何不替齊年同
事聖明君

九老會

唐吉皎中

休官罷任已閑居林苑園亭興有餘對酒最宜花藻
發邀歡不厭柳條初低腰醉舞垂緋袖擊筩謳歌任
褐裾寧用管絃來合雜自親松竹且清虛飛觥酒到
須先酌賦詠成詩不住書借問商山賢四皓不知此
後更何如

九老會

唐劉真中

垂絲今日幸同筵朱紫居身是大年賞景尚知心未
退吟詩猶覺力完全閑庭飲酒連三月在席權豪象
七賢山茗煮時秋霧碧玉盃斟處彩霞鮮臨堦花笑

如歌妓傍竹松聲當管絃雖未學窮生死訣人間豈
不是神仙

九老會

唐鄭據中

東洛幽閒日暮春邀歡多是白頭賓官班朱紫多相
似年幾高低次第勻聯句每言松竹意停盃多說古
今人更無外事來心肺空有清虛入思神醉舞兩迴
迎勸酒狂歌一曲會余身今朝何事偏情重同作明
時列任臣

九老會

唐盧貞中

二春已盡洛陽宮天氣初晴景象中千朵嫩桃迎晚
日萬株垂柳逐和風非論官位皆相似及至年高亦
共同對酒歌聲猶覺妙玩花詩思豈能窮先時共作
三朝貴今日猶逢七老翁但願綠醽常滿酌煙霞萬
里會應同

九老會

唐張渾中

幽亭春盡共爲歡印綬居身是大官遁跡豈勞登遠
岫垂絲何必坐溪磻詩聯六韻猶應易酒飲三盃未
覺難每況襟懷同要會共將心事比波瀾風吹野柳
懸羅帶日照庭花落綺紈此席不煩鋪錦帳斯筵堪
作畫圖看

覺衰

唐柳宗元

久知老會至不謂便見侵今年宜未衰稍已來相尋
齒疎髮就種奔走力不任咄此可奈何未必傷我心
彭聃安在哉周孔亦已沈古稱壽聖人曾不留至今
但願得美酒朋友常共斟是時春向暮桃李生繁陰
日照天正綠杳杳歸鴻吟出門呼所親扶杖登西林
高歌足自快商頌有遺音

賢婦

女娟

原作河激歌○列女傳曰女娟者趙河津吏之女也簡子南擊楚津吏醉臥不能渡簡子怒欲殺之娟懼持楫走前曰願以微軀易父之死簡子遂釋不誅將渡用楫者少一

人娟攘臂操楫而請簡子遂與渡中流為簡子發河激之歌簡子歸納為夫人

升彼河兮而觀清水揚波兮冒冥冥禱求福兮醉不醒
誅將加兮妾心驚罰既釋兮瀆乃清妾持楫兮操其維
蛟龍助兮主將歸呼來擢兮行勿疑

老萊妻賢名

魏嵇康

不願夫子相荆相將避祿隱畊樂道閒居採萍終厲
高節不傾

秦女休

魏左延年

步出上西門遙望秦氏廬秦氏有好女自名為女休
休一作始年十四五為宗行報讐左執白楊刃右據宛

魯矛讐家便東南什僵秦女休女休西上山上山四
 五里關吏呵問女休女休前置一作致詞平生為燕王
 婦於今為詔獄囚平生衣參差當今無領襦明知殺
 人當死兄言怏怏弟言無道憂女休堅詞為宗報讐
 死不疑殺人都市中徼我都巷西丞卿羅一有東向
 坐女休悽悽曳梏前兩徒夾我持刀刀五尺餘刀未
 下臃臃擊鼓赦書下

秦女休

晉傅玄

龐一作秦氏有烈婦義聲馳雍涼父母家有重怨讐人
 暴且強雖有男兄弟志弱不能當烈女念此痛丹心

為寸傷外若無意者內潛思無方白日入都市怨家
 如平常匿劍藏白刃一奮尋身僵身首為之異處仗
 屍列肆旁肉與土合成泥灑血濺飛梁猛氣上干雲
 霓讐黨失守為披攘一市稱烈義觀者收淚並慨忼
 百男何當益不如一女良烈女直造縣門云父不幸
 遭禍殃今讐身以分裂雖死情益揚殺人當伏法義
 不苟活墮舊章縣令解印綬令我傷心不忍聽刑部
 垂頭塞耳令我吏舉不能成烈著希代之績義立無
 窮之名夫家同受其祚子子孫孫咸享其榮今我作
 歌詠高風激揚壯發悲且清

秦女休

唐李白盛

西門秦氏女秀色如瓊花手揮白楊刀清晝殺讐家
羅袖灑赤血英聲凌紫霞直上西山去關吏相邀遮
壻爲燕國王身被詔獄加犯刑若履虎不畏落爪牙
素頸未及斷摧眉伏泥沙金鷄忽放赦大辟得寬賒
何慚聶政姊萬古共驚嗟

楚妃

晉石崇

蕩蕩大楚跨土萬里北據方城南接交趾西撫巴漢
東被海涖五侯九伯是疆是理矯矯莊王淵渟嶽峙
冕旒垂精充纊塞耳韜光戢曜潛默恭已內委樊姬

外任孫子猗猗樊姬體道履信旣紉虞丘九女是進
杜絕邪佞廣啟令胤割歡抑寵居之不吝不吝實難
可謂知幾化自近始著於閨闈光佐霸業邁德揚威
羣后列辟式瞻洪規譬彼江漢百川咸歸萬邦作歌
身沒名飛

東海有勇婦

唐李白盛

梁山感杞妻慟哭爲之傾金石忽暫開都由激深情
東海有勇婦何慚蘇子卿學劍越處子超騰若流星
捐軀報夫讐萬死不顧生白刃曜素雪蒼天感精誠
十步兩跳躍三呼一交兵斬首掉國門蹴踏五藏行

音 卷之五 張文
豁此伉儷憤粲然大義明北海李使君飛章奏天庭
捨罪警風俗流芳播滄瀛志在列女籍竹帛已光榮
淳于免詔獄漢主爲緹縈津妾一棹歌脫父於嚴刑
十子若不肖不如一女英豫讓斬空衣有心竟無成
要離殺慶忌壯夫素所輕妻子亦何辜焚之買虛聲
豈如東海婦事立獨揚名

靜女歌

唐張南容

盛

靜女樂於靜動合古人則妙年工詩書弱歲勤組織
端居愁若癡誰復理容色十五坐幽閨四隣不相識
天天隣家子百花裝首飾日日淇上遊笑人不踰閭

河水自濁濟自清仙臺蛾眉秦鏡明爲照齊王門下
醜何如漢帝掌中輕

靜女吟

唐孟郊

中

艷女皆妬色靜女獨檢蹤任禮耻任妝嫁德不嫁容
君子易求聘小人難自從此志誰與諒琴絃幽韻重

蜀路石婦

唐白居易

中

道傍一石婦無記復無銘傳是此鄉女爲婦孝且貞
十五嫁邑人十六夫征行夫行二十載婦獨守孤筵
其夫有父母老病不安寧其婦執婦道一一如禮經
晨昏問起居恭順發心誠藥餌自調節膳羞必甘馨

夫去竟不歸婦德轉光明後人高其節刻石像婦形
儼然整衣巾若立在閨庭似見舅姑禮如聞環珮聲
至今為婦者見此孝心生不比山頭石空有望夫名

宋氏五女

具州宋處士若芬五女若華若昭若倫若憲若茵

唐王建

中

五女誓終養貞孝內自持兔絲自縈紆不上青松枝
晨昏在親傍閑則讀書詩自得聖人心不因儒者知
少年絕音華貴絕父母詞素釵垂兩髦短窄古時衣
行成聞四方徵詔環珮隨同時入皇宮聯影步玉墀
鄉中尚其風重為修茅茨聖朝有良史將此為女師

江陵孝女

唐張籍

中

孝女獨垂髮少年唯一身無家空托墓主祭不從人
相弔有行客起廬無舊隣江頭聞哭處寂寂楚花春

題義女亭

唐許渾

晚

身沒蘭閨道日明郭南尋得舊池亭詩人愁立暮山
碧賈客怨離秋草青四望月沈疑掩鏡兩簷花動認
收屏至今鄉里風猶在借問誰傳義女銘

○貞烈

貞女引

梁簡文帝

借問懷春臺百尺凌雲霧北有歲寒松南臨女貞樹

庭花對帷滿隙月依枝度但使明妾心無嗟坐遲暮

貞女引

梁沈約

貞女信無矯傍隣也見疑輕生本非惜賤軀良足悲
傳芳託嘉樹弦歌寄好詞

節婦吟

唐張籍中

君知妾有夫贈妾雙明珠感君纏綿意繫在紅羅襦
妾家高樓連苑起良人執戟明光裏知君用心如日
月事夫誓擬同生死還君明珠雙淚垂何不相逢未
嫁時

烈女操

唐孟郊中

梧桐相待老鴛鴦會雙死貞節貴徇夫捨生亦如此
波瀾誓不起妾心井中水

魯陶嬰

原作黃鵠歌○列女傳曰魯陶嬰者陶

明之女也少寡養幼孤無疆昆弟紡績
為產魯人或聞其義將求焉嬰聞之恐不得
免乃作歌明已之不更二庭也魯人聞之遂
不敢復求

悲夫黃鵠之早寡兮七年不雙叶宛頸獨宿兮不與
衆同夜半悲鳴兮想其故雄天命早寡兮獨宿何傷
寡婦念此兮泣下數行嗚呼哀哉兮死者不可忘飛
鳥尚然兮況於貞良雖有賢雄兮終不同行叶

韓憑妻

原作烏鵲歌○韓憑戰國時為宋康王
舍人妻何氏美王欲之捕舍人築青陵

臺何氏作烏鵲歌以見志遂自縊死

南山有烏北山張羅烏自高飛羅當奈何

烏鵲雙飛不樂鳳凰妾是庶人不樂宋王

荅夫歌

周韓憑妻

其雨淫淫河大水深日出當心

康王得書以問蘇賀賀曰雨淫淫愁且思

也河水深不得往來也日當心有死志也俄而憑自殺妻亦死○搜神記曰宋大夫韓憑取妻而美康王奪之俄而憑自殺妻乃陰腐其衣王與登臺遂自投臺下左右攬之衣不中手遺書於帶曰王利其生不利其死願以尸骨賜憑而合葬乎王怒弗聽使里人埋之冢相望也宿昔有交梓木生於二冢之端旬日而大合抱屈體相就根交于下又有鴛鴦鳥雌雄各恒栖樹上交頸悲鳴宋人哀之遂號其木曰相思樹

秋胡妻

原作秋胡行○西京雜記曰魯人秋胡娶妻三月而遊宦三年休還家其婦採桑於郊胡至郊而不識其妻也見而悅之乃遺黃金一鎰妻曰妾有夫遊宦不返幽閨獨處三年於茲未有被辱於今日也採桑不顧胡慙而退至家問妻何在曰行採桑於郊未返既歸還乃向所挑之婦也夫妻併慙妻赴沂水而死列女傳曰魯秋黎婦者魯秋胡之妻也既納之五日去而官於陳五年乃歸未至其家見路傍有美婦人方採桑而悅之下車謂曰力田不如逢豐年力桑不如見國卿今吾有金願以與夫人婦曰我採桑力作紡績紆以供衣食奉二親養夫子已矣不願人之金秋胡遂去歸至家奉金遺母使人呼其婦婦至而向採桑者也婦汗其行去而東走自投於河而死

晉傅玄

秋胡子娶婦三日會行仕宦既享顯爵保茲德音以

祿頤親韞此黃金觀一好婦採桑路傍遂下黃金誘
以逢卿玉磨逾潔蘭動彌馨源流潔清水無濁波柰
何秋胡中道懷邪美此節婦高行魏我哀哉可愍自
投長河

秋胡妻

原作和秋胡行
一云和班氏詩

晉傅玄

秋胡納令室三日宦他鄉皎皎潔婦姿泠泠守空房
燕婉不終夕別如參與商憂來猶四海易感難可防
人言生日短愁者苦夜長百草揚春華攘腕採柔桑
素手尋繁枝落葉不盈筐羅衣翳玉體回日流采章
君子倦仕歸車馬如龍驤精誠馳萬里既至一作兩

相忘行人悅令顏借息此樹傍誘以逢卿喻遂下黃
金裝烈烈貞女忿言辭厲秋霜長驅及居室奉金升
北堂母立呼婦來歡情樂未央秋胡見此婦惕然懷
探湯負心豈不慚永誓非所望清濁必異源鳧鳳不
並翔引身赴長流果哉潔婦腸彼夫既不淑此婦亦
太剛

秋胡妻

原作秋胡行

唐高適

盛

妾本邯鄲未嫁時容華倚翠人未知一朝結髮從君
子將妾迢迢東魯陞時逢大道無艱阻君方遊宦從
陳汝蕙樓獨臥頻度春彩閣辭君幾徂暑三月垂楊

蠶未眠攜籠結侶南陌邊道逢行子不相識贈妾黃金買少年妾家夫婿經離久寸心誓與長相守願言行路莫多情道妾貞心在人口日暮蠶饑相命歸攜籠端飾來庭闈勞心苦力終無恨所冀君恩那可依聞說行人已歸止乃是向來贈金子相看顏色不復言相顧懷慙有何已從來自隱無疑背直為君情也相會如何咫尺仍有情況復迢迢千里外誓將顧恩不顧身念君此日赴河津莫道向來不得意故欲留規誠後人

詠杞梁妻

宋吳邁遠

燈竭從初明蘭凋猶早薰扼腕非一代千載炳遺文貞夫淪莒役杜弔結齊君驚心眩白日長洲崩秋雲精微貫穹旻高城為隕墳行人既迷徑飛鳥亦失羣壯哉金石軀出門形影分一隨塵壤消聲譽誰共論

詠貞婦彭城劉氏八章

渤海封卓妻劉氏彭城人成婚一夕卓官於京

師以事見法劉氏在家忽形夢想知卓已死哀立不止經旬凶問果至遂憤歎而終時人比之秦嘉妻云高允念其義高而名不著乃為詩曰北魏高允

兩儀正位人倫肇甄爰制夫婦統業承先雖曰異族氣猶自然生則同室終契黃泉封生令達卓為時彥內協黃中外兼三變誰能作配

克應其選實有華宗挺生淑媛

京野勢殊山川乖互乃奉王命載馳在路公務旣弘
私義獲著因媒致幣邁止一幕

率我初冠眷彼弱笄形由禮比情以趣諧欣願難常
影跡易乖悠悠言邁戚戚長懷

時值險屯橫離塵網伏鎖就刑身分土壤千里雖遐
應如影響良嬪洞感發於夢想

仰惟親命俯尋嘉好誰謂會淺義深情到畢志守窮
誓不二醮何以驗之殞身是效

人之處世孰不厚生心存於義所重則輕結憤鍾心
甘就幽冥永捐堂宇長辭母兄

茫茫中野翳翳孤丘葛藟冥蒙荆棘四周理苟不昧
神必俱遊異哉貞婦曠世靡儔

○宮人

中山王孺子妾歌二首

齊陸厥

未央才人中山孺子一笑傾城一顧傾市傾城不自
美傾市復爲容願把陵陽袖披雲望九重

如姬寢臥內班婕坐同車洪波陪飲帳林光宴秦餘
歲暮寒飈及秋水落芙蓉子瑕矯後駕安陵泣前魚
賤妾終已矣君子定焉如

中山孺子妾歌

唐李白盛

中山孺子妾特以色見珍雖然不如延年妹亦是當時絕世人桃李出深井花豔驚上春一貴復一賤關天豈由身芙蓉老秋霜團扇羞網塵戚姬髡髮入春市萬古共悲辛

詠邯鄲才人嫁為廝養卒婦 齊謝朓

生平宮閣裏出入侍丹墀開筍方羅縠窺鏡比蛾眉初別意未解去久日生悲憔悴不自識嬌羞餘故姿夢中忽彷彿猶言承燕私

邯鄲才人嫁為廝養卒婦 唐李白盛

妾本崇臺女揚蛾入丹闕自倚顏如花寧知有凋歇一辭玉階下去若朝雲沒每憶邯鄲城深宮夢秋月君王不可見惆悵至明發

宮人原作古意 梁吳均

妾本倡家女出入魏王宮既得承瑤輦亦在更衣中蓮花銜青雀寶粟鈿金蟲猶言不得意流涕憶遼東未央才人歌 梁庾肩吾

從來守未央轉欲訝春芳朝風凌日色夜月奪燈光相逢儻遊豫暫為卷衣裳

黃門倡歌 漢書禮樂志曰成帝時鄭聲尤甚黃門各倡丙彊景武之屬富顯於世

古無名氏

佳人俱絕世握手春樓點黛方初月縫裙學石榴
君王入朝罷爭競理衣裘

賦得班去趙姬升

陳徐湛

班姬與飛燕俱侍漢王宮不意思情歇偏將衰草同
香飛金輦外苔上玉階中今日悲團扇非是為秋風

○ 盧女曲

樂府解題曰盧女者魏武帝時宮人也故將軍陰升之姊七歲入魏宮善鼓琴

至明帝崩後出嫁為尹更生妻

唐崔顥

盛

二月春來半宮中日漸長柳垂金屋暖花覆玉樓香
拂匣先臨鏡調笙更炙簧還將盧女曲夜夜奉君王

宮人

原作古興

唐李嘉祐

中

十五小家女雙鬟人不如蛾眉暫一見可直千金餘
自從得向蓬萊裏出入金輿乘玉趾梧桐樹上春鴉
鳴曉伴君王猶未起莫道君恩長不休婕妤團扇苦
悲秋君看魏帝鄴都裏唯有銅臺漳水流

宮娃歌

唐李賀

中

蠟光高懸照紗空花房夜擣紅守宮象口吹香耗毳
暖七星挂城聞漏板寒入采恩殿影昏彩鸞簾額著
霜痕啼蛄弔月鉤欄下屈膝銅鋪鎖阿甄夢入家門
上沙渚天河落處長洲路願君光明如太陽放妾騎

魚撒波去

舊宮人

唐王建中

先帝舊宮宮女在亂絲猶挂鳳凰釵霓裳法曲渾拋却獨自花間掃玉階

舊宮人

唐張籍中

歌舞梁州女歸時白髮生全家沒蕃地無處問鄉程宮錦不傳樣御香空記名一身難自說愁逐路人行

舊宮人

唐項斯晚

自出先皇玉殿中衣裳不更染深紅宮釵折盡垂空鬢凶扇口多減半風桃熟亦曾君手賜酒闌猶候妾

歌終如今還向城邊住御水東流意不通

出宮人

唐杜牧晚

平陽拊背穿馳道銅雀分香下壁門幾向綴珠深殿裏妬拋羞態臥黃昏

奉陵宮人

唐杜牧晚

相如死後無詞客延壽亡來絕畫工玉顏不是黃金少淚滴秋山入壽宮

湘宮人歌

唐温庭筠晚

池塘芳意濕夜半東風起生綠畫羅屏金壺貯春水黃粉楚宮人芳花玉刻鱗娟娟照棋燭不語兩含嚙

悲老宮人

唐劉得仁晚

白髮宮娃不解悲滿頭猶自插花枝曾緣玉貌君王寵准擬人看似舊時

宮妓

唐李商隱晚

珠箔輕明拂玉墀披香新殿鬪腰肢不須看盡魚龍戲終遣君王怒偃師

續衣詩

開元中賜邊軍續衣有軍士於短袍中得詩云云白於帥進之玄宗不罪得宮人深憫之遂以嫁得詩人且曰我與汝結今生緣

唐玄宗宮人

沙場征戍客寒苦若為眠戰袍經手作知落阿誰邊
蠶意多添線含情更著綿今生已過也重結後生緣

題葉詩

顧況在洛於苑中流水上得梧葉有詩曰一入深宮裏年年不見春聊題一片葉寄與有情人況亦題詩葉上放於波中曰花落深宮鶯亦悲上陽宮女斷腸時帝城不

唐玄宗宮人

一葉題詩出禁城誰人酬和獨含情自嗟不及波中

葉蕩漾乘春取次行

題紅葉

僖宗時于祐於御溝拾一葉有詩云云祐亦題詩一葉置溝上流宮女韓夫人拾之後帝放宮女三千韓竟嫁祐各取紅葉相示云

唐僖宗宮人

流水何太急深宮盡日閑殷勤謝紅葉好去到人間

製袍詩

僖宗自內出袍中得金鎖一枚詩一首軍馬真於袍中得金鎖一枚詩一首

唐僖宗宮人晚

玉燭製袍夜金刀呵手裁鎖寄千里客鎖心終不開

○戍婦貧女附

戍婦原作雜詩

魏陳思王

西北有織婦綺縞何繽紛明晨秉機杼日昃不成文
太息終長夜悲嘯入青雲妾身守空閨良人行從軍
自期三年歸今已歷九春飛一作孤鳥遶樹翔噉噉鳴
索羣願為南流景馳光見我君

戍婦原作柳古

宋鮑照

河畔草未黃胡鴈已矯翼秋菴扶戶吟寒婦戍夜織

去歲征人還流傳舊相識聞君上隴時東望久歎息
宿昔改衣帶朝旦一作日暮異容色念此憂如何夜長愁
更多明鏡塵匣中瑤琴生網羅

征怨

梁江淹

蕩子從征久鳳樓簫管閑獨枕凋雲鬢孤燈損玉顏
何日邊塵淨庭前征馬還

敬酬柳僕射征怨

梁丘遲

清歌自信妍雅舞空僊僊耳中解明月頭上落金鈿
雀飛且近遠暮入綺窻前魚戲雖南北終還荷葉邊
惟見君行久新年非故年

戍婦辭原作石州辭

古無名氏

自從君去遠巡邊終日羅帷獨自眠看花情轉切攬
鏡淚如泉一自離君後啼多雙臉穿何時狂虜滅免
得更留連

戍婦原作從軍行

唐喬知之初

南庭結白露北風掃黃葉此時鴻鴈來驚鳴催思妾
曲房理鍼線平砧擣文練鴛綺裁易成龍鄉信難見
窈窕九重閨寂寞十年啼紗牕白雲宿羅幌月光棲
雲月隱微微夜上流黃機玉霜凍珠履金吹薄羅衣
漢家已得地君去將何事宛轉結蠶書寂寞無鴈使

平生荷恩信本為榮華進況復落紅顏蟬聲催綠鬢

戍婦四首原作雜詩

唐沈佺期初

鐵馬三軍去金閨一月還邊愁離上國春夢失陽關
池水琉璃靜園花玳瑁斑歲華空自擲愁怨不勝顏

落葉驚秋婦高砧促暝機蜘蛛尋月度螢火傍人飛

清鏡紅埃入孤燈綠焰微怨啼能至曉獨自懶縫衣

三

妾家臨渭北春夢著遼西何苦朝鮮郡年年事鼓鞞
燕來紅壁語鶯向綠窻啼為許長相憶闌干玉筍齊

聞道黃龍戍頻年不解兵可憐閨裏月長在漢家營
少婦今春意良人昨夜情誰能將旗鼓一為取龍城

戍婦原作妾
薄命

唐劉元淑初

自從離別守空閨遙聞征戰起雲梯夜夜愁君遼海
北年年棄妾渭橋西陽春白日照空暖紫燕銜花向
庭滿綵鸞琴裏怨聲多飛鵲鏡前妝梳斷誰家夫婿
不從征應是漁陽別有情莫道紅顏燕地少家家還
似洛陽城且逐新人殊未歸還令秋至夜霜飛北斗
星前橫渡鴈南樓月下擣寒衣夜深聞鴈腸欲絕獨

坐縫衣燈又滅暗啼羅帳空自憐夢度陽關向誰說
每憐容貌宛如神如何薄命不勝人願君朝夕燕山
至好作明年楊柳春

戍婦怨

唐鄭遂初初

蕩子戍遼東連年信不通塵生錦步障花遶玉屏風
只怨紅顏改寧辭玉簫空繫書春鴈足早晚到雲中

戍婦原作
秋思

唐李白盛

關氏黃葉落妾望白登臺海上碧雲斷單于秋色來
胡兵沙塞合漢使玉關回征客無歸日空悲蕙草摧

戍婦原作學
古思邊

唐李白盛

銜悲上隴首腸斷不見君流水若有情幽哀從此分
蒼茫愁邊色惆悵落日曛山外接遠天天際復有雲
白鴈從中來飛鳴苦難聞足繫一書札寄言難離羣
離羣心斷絕十見花成雪胡地無春輝征人行不歸
相思杳如夢珠淚濕羅衣

思邊

唐李白盛

去年何時君別妾南園綠草飛蝴蝶今歲何時妾憶
君西山白雪暗秦雲玉關去此三千里欲寄音書那
可聞

戍婦原作新婚別

唐杜甫盛

兔絲附蓬麻引蔓故不長嫁女與征夫不如棄路傍
結髮爲君妻席不煖君牀暮婚晨告別無乃太匆忙
君行雖不遠守邊戍河陽妾身未分明何以拜姑嫜
父母養我時日夜令我藏生女有所歸雞犬亦得將
君今死生一作往死地沈痛迫中腸誓欲隨君去形勢反
蒼黃勿爲新婚念努力事戎行婦人在軍中兵氣恐
不揚自嗟貧家女久致羅縠裳羅縠不復施對君洗
紅妝仰視百鳥飛大小必雙翔人事多錯迂與君永
相望

開緘怨

唐朱琳盛

夫壻邊庭久幽閨恨幾重玉琴知別日金鏡識愁容
嬾寄雲中服慵開海外封年年得衣慣且試莫裁縫

孤寢怨

唐崔珪

盛

征戍動經年含情拂玳筵花飛織錦處月落擣衣邊
燈暗愁孤坐牀空怨獨眠自君遼海去玉匣閉春絃

○ 戍婦

唐劉長卿

中

鶯啼燕語報新年馬色龍飛路幾千家住層城臨漢
苑心隨明月到胡天機中錦字論長恨樓上花枝笑
獨眠爲問元戎實車騎何時返旆勒燕然

戍婦

原作古意

唐孟郊

中

蕩子守邊戍佳人莫相從去來年月多苦愁改形容
上山復下山踏草成古蹤徒言採薜蘿十度不一逢
鑒獨是明月識志唯寒松井桃始開花一見悲萬重
人顏不兩春桃色有再濃指氣入空房無慘乍從容
啓貼理針線非獨學裁縫手持未染絲繡爲白芙蓉
笑容無染汚將以表心素欲寄未歸人當春無信去
無信反增愁愁心緣隴頭君如隴頭水冰鏡水還流
宛宛青絲繩織織白玉鈎玉鈎不虧缺青絲無斷絕
迴還勝雙手解盡心中結

征婦怨二首

唐孟郊

中

漁陽千里道近如中門限中門踰有時漁陽長在眼

二

君淚濡羅巾妾淚滿路塵羅巾妾在手今得隨妾身
路塵如得風得上君車輪

戍婦原作妾
命薄

唐張籍中

薄命婦良家子無事從軍去萬里漢家天子平四夷
護羌都尉裹屍歸念君此行爲死別對君裁縫泉下
衣與君一日爲夫婦千年萬歲亦相守君愛龍城征
戰功妾願青樓歡樂同人生各各有所欲詎得將心
入君腹

征婦怨

唐張籍中

九月匈奴殺邊將漢軍全沒遼水上萬里無人收白
骨家家城下招魂葬婦人依倚子與夫同居貧賤心
亦舒夫死戰場子在腹妾身雖存如晝燭

戍婦原作續
古詩

唐白居易中

戚戚復戚戚送君遠行役行役非中原海外黃沙磧
伶俜獨居妾迢遞長征客君望功名歸妾憂生死隔
誰家無丈夫何人不離拆所恨薄命身嫁遲別日迫
妾身有存沒妾心無改易生作閨中婦死作山頭石

戍婦原作效
古興

唐施肩吾中

金雀無舊釵，綉綺無舊裙。唯有一寸心，長貯萬里口。
南軒夜蟲織，已促北牖飛。蛾遶殘燭，祇言衆口鑠。千
金誰信獨，愁銷片玉。不知歲晚歸不歸，又將啼眼縫
征衣。

戍婦原作雜詩

唐無名氏

一去遼陽繫夢魂，忽傳征騎到中門。紗幪不肯施紅
粉，徒遣蕭郎問淚痕。
無定河邊暮笛聲，赫連臺畔旅人情。函關歸路千餘
里，一夕秋風白髮生。

戍婦恨原作春恨

唐錢翊

久戍臨洮報未歸，篋香銷盡別時衣。身輕願比蘭堦
葉，萬里還尋塞草飛。

征婦歎

唐馬戴晚

稚子在我抱，送君登遠道。稚子今已行，念君上邊城。
蓬根既無定，蓬子焉用生。但見請防胡，不聞言罷兵。
及老能得歸，少者還長征。

征婦怨

唐劉兼晚

金閨寂寞罷妝臺，玉筯欄干界粉腮。花落掩關春欲
暮，月圓欹枕夢初迴。鸞膠豈續愁腸斷，龍劍難揮別
緒開。曾寄錦書無限意，塞鴻何事不歸來。

音
戌婦

原作
閨怨

唐黃滔

晚

寸心杳與馬蹄隨如蛻形容在錦帷江上月明船發
後花間日暮信迴時五陵夜作酬恩計四塞秋爲破
虜期待到乘輶入門處淚珠流盡玉顏衰

征人

唐羅鄴

晚

青樓一別戍金微力盡秋來破虜圍錦字莫辭連夜
織塞邊長是到春歸正憐漢月當空照不奈胡沙滿
眼飛唯有夢魂南去日胡鄉山水路依稀

寄遠

唐劉駕

晚

雪花豈結子徒滿連理枝嫁與征人妻不得長相隨

去年君點行賤妾是新姬別早見未熟入夢無定姿
悄悄空閨中蛩聲遶羅帷得書喜猶甚况復見君時

負薪行

以下貧女

唐杜甫

盛

夔州處女髮半華四十五無夫家更遭喪亂嫁不
售一生抱恨堪咨嗟土風坐男使女立應當門戶女
出入十猶八九負薪歸賣薪得錢應供給至老雙鬢
只垂頸野花山葉銀釵並筋力登危集市門死生射
利兼鹽井面妝首飾雜啼痕地褊衣寒困石根若道
巫山女粗醜何得此有昭君村

貧女詞寄從叔先輩簡

唐孟郊

中

人音 卷之五 三二
蠶一作貧女非不勤今年獨無春二月冰雪深死盡萬
木身時令自逆行造化豈不仁仰企碧雲仙高控滄
海雲永別勞苦腸飄飄遊無垠

○貧女

唐秦韜玉晚

蓬門未識綺羅香擬托良媒益自傷誰念風流高格
調共憐時世儉梳妝敢將十指誇纖巧不把雙眉鬪
畫長每恨年年壓金線爲他人作嫁衣裳

貧女吟

唐鄭谷晚

塵壓鴛鴦廢錦機滿頭空插麗春枝東鄰舞妓多金
翠笑翦燈花學畫眉

寒女吟

唐邵謁晚

寒女命自薄生來多賤微家貧人不聘一身無所歸
養蠶徒苦心繭熟他人絲織素徒苦力素成他人衣
青樓富家女纔生便有主終日著羅綺何曾識機杼
清夜聞歌聲聽之淚如雨他人如何歡我意又何苦
所以問皇天皇天竟無語

里中女

唐于濇晚

吾聞池中魚不識海水深吾聞桑下女不識華堂陰
貧媿苦機杼富家鳴杵砧天與雙明眸只教識蒿簪
徒惜越娃貌亦蘊韓娥音珠玉不到眼遂無奢侈心

豈知趙飛燕滿髻釵黃金

鄰女

唐劉駕晚

君嫌鄰女醜取婦他鄉縣料嫁與君人亦為鄰所賤
菖蒲花可貴只為人難見

詩雋類函卷六十六

東吳俞安期彙纂

宣城梅鼎祚增定

關中來復訂校

人部八

美女

○美女

佳人

漢書外戚傳曰李延年性知音善歌舞武帝愛之延年侍上起舞歌云云上漢息曰世豈有此人乎平陽主因言延年有女弟上召見之實妙麗善舞由是得幸

漢李延年

北方有佳人絕世而獨立一顧傾人城再顧傾人國
寧不知傾城與傾國佳人難再得

美女篇

魏陳思王

美女妖且閑採桑岐路間柔條紛冉冉落葉何翩翩
攘袖見素手皓腕約金環頭上金爵釵腰佩翠琅玕
明珠交玉體珊瑚間木難羅衣何飄颻輕車隨風還
顧盼遺光彩長嘯氣若蘭行徒用息駕休者以忘餐
借問女安居乃在城南端青樓臨大路高門結重關
容華耀朝日誰不希令顏媒氏何所營玉帛不時安
佳人慕高義求賢良獨難衆人徒嗷嗷安知彼所觀
盛年處房室中夜起長嘆

美女篇

晉傅玄

美人一何麗顏若芙蓉花一顧亂人國再顧亂人家
未亂猶可柰何

豔歌有女篇

晉傅玄

有女懷芬芳媞媞步東廂蛾眉分翠羽明目一作發

清揚丹唇翳皓齒秀色若瑤璋巧笑露顴靨衆媚不

可詳令儀希世出無乃古毛嬙頭安金步搖耳繫明

月璫珠環約素腕翠羽垂鮮光文袍綴藻黼玉體映

羅裳容華既已豔志節擬秋霜徽音冠青雲聲響流

四方妙哉美媛德宜配侯與王靈應萬世合日月時

相望媒氏陳束帛羔鴈鳴前堂百兩盈中路起若鸞

鳳翔凡夫徒踴躍望絕殊參商

豔歌

宋江夏王義恭

江南遊湘妃窈窕漢濱女淑問流古今蘭音媚鄭楚
瑤顏映長川善服照通滸求思望襄滋歎息對衡渚
中情未相感搔首增企予悲鴻失良匹俯仰戀儔侶
徘徊忘寢食羽翼不能舉傾首佇春燕為我津辭語

代美女篇

梁蕭子範

邯鄲一作章丹整輟舞巴姬請罷弦佳人淇洧出豔趙復
傾燕繁穠既為李照水亦成蓮朝酤成都酒暝數河
閔錢餘光幸未惜一作許借蘭膏空自煎

美女篇

梁簡文帝

佳麗盡關情風流最有名約黃能効月裁金巧作星
粉光勝玉靚衫薄擬蟬輕密態隨流臉嬌歌逐軟聲
朱顏半已醉微笑隱香屏

有女篇十八韻

一作艷歌篇

梁簡文帝

凌晨光景麗倡女鳳樓中前瞻削成小傍望卷旌空
分妝開淺靨繞臉傅斜紅張琴未調軫飲吹不全終
自知心所愛出入仕秦宮誰言連尹屈更是莫敖通
輕輶綴皂葢飛轡轢雲驄金鞍隨繫尾銜璫映纏驥
戈鏤荆山玉劔飾丹陽銅左把蘇合彈傍持大屈弓

控弦因鵲血挽繯一作用牛螭弋獵多登隴酣歌每
入豐暉暉隱落日冉冉還房櫳燈生陽燧火塵散鯉
魚風流蘇時下帳象簾復韜筒霧暗牕前柳寒疎井
上桐女蘿託松際甘瓜蔓井東拳拳恃君寵歲暮望
無窮

茱萸女

梁簡文帝

茱萸生狹斜結子復銜花
相逢織手摘濫得映鈿華
雜與鬢簪插偶逐鬢鈿斜
東西爭贈玉縱橫來問家
不無夫婿馬空駐使君車

美人原作古意

梁吳均

妾家橫塘北發艷小長干
花釵玉宛轉珠繩金絡統
一作鳳透迤搖白團誰能分見此含
恨不能言一作誰堪久見此含恨不相看

詠美人

梁庾肩吾

絳樹及西施俱是好容儀
非關能結束本自細腰肢
鏡前難並照相將映淶池
看妝畏水動斂袖避風吹
轉手齊裾亂橫簪歷鬢垂
曲中人未取誰堪白日移
不分他相識唯聽使君知

賦得胡姬年十五

漢辛延年羽林郎曰胡姬年十五春日獨當壚○樂府作

晉劉琨五言律祖作梁劉琨然

梁劉琨

虹梁照曉日，淥水泛香蓮。如何十五少，含笑酒壚前。
花將面自許，人共影相憐。回頭堪百萬，價重爲時年。

詠佳麗

梁劉孝威

可憐將可念，可念值千金。唯言有一恨，恨不遂人心。

豔歌三首

卞顧野王

夕臺行雨度，朝梁照日輝。東城採桑返，南市數錢歸。
長歌挑碧玉，羅塵笑洛妃。欲知歡未盡，棲鳥已夜飛。

二

齊倡趙女盡妖妍，珠簾玉砌併神仙。莫笑人來最落

後，能使君恩得度前。豈知洛渚羅塵步，詎減天河秋
夕渡。妖姿巧笑能傾城，那思他人不憎妬。蓮花藻井
推芰荷，採菱妙曲勝陽阿。

燕姬妍，趙女麗，出入王宮公主第。倚鳴瑟，歌未央，調
弦八九弄，度曲兩三章。唯欣春日永，詎愁秋夜長。歌
未央，倚鳴瑟，輕風飄落葉，乳燕巢蘭室。結羅帷，翫朝
日，牕開翠幔卷，妝罷金星出。爭攀四照花，競戲三

條術

大堤女

北魏王容

寶髻耀明璫，香羅鳴玉佩。大堤諸女兒，一一皆春態。
入花花不見，穿柳柳陰碎。東風拂面來，由來亦相愛。

人音 卷之六
美女篇二首

北齊魏收

楚襄遊夢去陳思朝洛歸參差結旌旆掩靄頓驂駢
變化看臺曲駭散屬川沂仍令賦神女俄聞要處妃
照梁何足豔昇霞反奮飛可言不可見言是復言非

二

我帝更朝衣擅寵無論賤入愛不嫌微
智瓊非俗物羅敷本自稀居然陋西子定可比南威
新吳何爲誤舊鄭果難依甘言誠易污得失定因機
無憎藥英妬心賞易侵違

美女篇

隋盧思道

京洛多妖艷餘香愛物華俱臨鄧渠一作水共採鄴
園花時搖五明扇聊駐七香車情疎看笑淺嬌深眄
欲斜微津染長黛新溜濕輕紗莫言人未解隨君獨
問家

美女篇

唐王珣初

東隣美女實名倡絕代容華無比方濃纖得中非短
長紅素天生誰飾妝桂樓椒閣木蘭堂繡戶雕軒文
杏梁屈曲屏風遶象牀菱蕤翠帳綴香囊玉臺龍鏡
澄徹光金爐沈煙酷烈芳遙聞行珮音鏘鏘含嬌含
笑出洞房二八三五閨心切舉簾捲幔迎春節清歌

始發詞怨咽鳴琴一弄心斷絕借問哀怨何所爲盛
年情多心自悲須臾破顏倏斂態一悲一喜併相宜
何能見此不注心惜無媒氏爲道音可憐盈盈直干
金誰家君子爲藁砧

賦得北方有佳人

唐徐賢妃

初

由來稱獨步本是號傾城柳葉眉間發桃花臉上生
腕搖金釧響步轉玉環鳴纖腰宜寶袜紅衫艷織成
懸知一顧重別覺舞腰輕

春女行

唐劉希夷

初

春女顏如玉怨歌陽春曲巫山春樹紅沅湘春草綠
自憐妖艷姿妝成獨見時愁心伴楊柳春盡亂如絲
目極千餘里悠悠春江水頻想玉關人愁臥金閨裏
尚言春花落不知秋風起嬌愛猶未終悲涼從此始
憶昔楚王宮玉樓妝粉紅纖腰弄明月長袖舞春風
榮華委西山光陰不可還桑林沒東海富貴今何在
寄言桃李容胡爲閨閣重但看楚王墓惟見數株松

春女行

唐王翰

初

紫臺穹跨連綠波紅軒鈴匝垂纖羅中有一人金作
面隔幌玲瓏遙可見忽聞黃鳥鳴且悲鏡邊含笑著
春衣羅袖嬋娟似無力行拾落花比容色落花一度

人音 卷六十六
無再春人生作樂須及晨君不見楚王臺上紅顏子
今日皆成狐兔塵

洛陽女兒行

唐王維盛

洛陽女兒對門居纔可顏容十五餘良人玉勒乘驄
馬侍女金盤膾鯉魚畫閣朱樓盡相並紅桃綠柳垂
簷向羅帷送上七香車寶扇迎歸九葉帳狂夫富貴
在青春意氣驕奢劇季倫自憐碧玉親教舞不惜珊
瑚持與人春牕曙滅九微火九微片片飛花璵戲罷
曾無理由時妝成祗是薰香坐城中相識盡繁華日
夜經過趙李家誰憐越女顏如玉貧賤江湖自浣沙

美人原作
雜詩

唐王維盛

雙燕初命子五桃初作花王昌是東舍宋玉次西家
小小能織綺時時出浣紗親勞使者問南陌駐香車

美人原作
雜詩

唐王維盛

朝因折楊柳相見洛城隅楚國無如妾秦家自有夫
對人傳玉腕映燭解羅襦人見東方騎皆言夫婿珠

麗人行

唐杜甫盛

三月三日天氣新長安水邊多麗人能濃意遠淑且
真肌理細膩骨肉勻繡羅衣裳照暮春感金孔雀銀
麒麟頭上何所有翠爲鬋葉垂鬢脣身後何所見珠

壓腰被穩稱身就中雲幕椒房親賜名大國號與秦
紫駝之峯出翠釜水精之盤行素鱗犀筋厭飫久未
下鸞刀縷切空紛綸黃門飛鞚不動塵御厨絡繹送
八珍簫鼓哀吟感鬼神賓從雜沓實要津後來鞍馬
何逡巡當軒下馬入錦茵楊花雪落覆白蘋青鳥飛
去銜紅巾炙手可熱勢絕倫慎莫近前丞相嗔

麗人曲

唐崔國輔盛

紅顏稱絕代欲並真無侶獨有鏡中人由來自相許
茱萸女

唐萬楚盛

山陰柳家女九日採茱萸復得東鄰伴雙爲陌上姝

插枝著高髻結子置長裾作性長遲緩非關詫丈夫
平明折林樾日入返城隅賈客要羅袖行人挑短書
蛾眉自有主年少莫踟躕

川上女

唐崔顥盛

川上女晚妝鮮日落青渚試輕楫汀長花滿正迴船
暮來風起浪轉緊自言此去橫塘近綠江無伴夜獨
行獨行心緒愁無盡

烏江女

唐屈同仙盛

越豔誰家女朝遊江岸傍青春猶未嫁紅粉舊來娼
錦袖盛朱橘銀鈎摘紫房見人羞不語回艇入溪藏

越女

唐王昌齡盛

越女作桂舟還將桂為楫湖上水渺漫清江不可涉
摘取芙蓉花莫摘芙蓉葉將歸問夫婿顏色何如妾

浣紗女

唐王昌齡盛

錢塘江畔是誰家江上女兒全勝花吳王在時不得
出今日公然來浣紗

越女詞四首

唐李白盛

長干吳兒女眉目艷星月屐上足如霜不著鴉頭襪
吳兒多白皙好為蕩舟劇賣眼擲春心折花調行客

二

三

耶溪採蓮女見客棹歌回笑入荷花去佯羞不出來

四

東陽素足女會稽素舸郎相看月未墮白地斷肝腸

浣沙石上女

唐李白盛

玉面耶溪女青娥紅粉妝一雙金齒屐兩足白如霜

巴女詞

唐李白盛

巴水急如箭巴船去若飛十日三千里郎行幾歲歸

題美人

唐于鵠中

秦女窺人不解羞攀花趁蝶出墻頭胸前空帶宜男

草嫁得蕭郎愛遠遊

美人原作
雜詩

唐權德輿中

淇水春正綠上宮蘭葉齊光風兩搖蕩鳴佩出中閨
一顧授黃流千金呈瓠犀徒然路傍子恍恍復悽悽

美人原作
古意

唐僧貫休

美人如游龍被服金鴛鴦手把古刀尺在彼白玉堂
文章深掣曳珂珮鳴玎璫好風吹桃花片片落銀牀
何當舉羽翰遠逐朱鳥翔

董嬌嬈以下
各姬

漢宋子侯

洛陽城東路桃李生路傍花花自相對葉葉自相當

春風東北起花葉正低昂不知誰家子提籠行採桑
纖手折其枝花落何飄颺請謝彼姝子何為見損傷
高秋八九月白露變為霜終年會飄墮安得久馨香
秋時自零落春月復芬芳何時盛年去歡愛一作永
好
相忘吾欲竟此曲此曲愁人腸歸來酌美酒挾瑟上
高堂

羅敷

古辭

日出東南隅照我秦氏樓秦氏有好女自名為羅敷
羅敷善蠶桑採桑城南隅青絲為籠係桂枝為籠鉤
頭上倭墮髻耳中明月珠紺綺為下裙紫綺為上襦

行者見羅敷下擔將髭鬚少年見羅敷脫帽著帽頭
耕者忘其犁鋤者忘其鋤來歸相怒怨但坐觀羅敷
使君從南來五馬立踟躕使君遣吏往問是誰家姝
秦氏有好女自名爲羅敷羅敷年幾何二十尚不足
十五頗有餘使君謝羅敷寧可共載不羅敷前致辭
使君一何愚使君自有婦羅敷自有夫東方千餘騎
夫婿居上頭何用識夫婿白馬從驪駒青絲繫馬尾
黃金絡馬頭腰中鹿盧劍可值千萬餘十五府小史
二十朝大夫三十侍中郎四十專城居爲人潔白哲
鬢髮頗有鬚盈盈公府步冉冉府中趨坐中數千人
皆言夫婿殊

羅敷豔歌

晉陸機

扶桑升朝暉照此高臺端高臺多妖麗滄房出清顏
淑貌耀皎日惠心清且閑美目揚玉澤蛾眉象翠翰
鮮膚一何潤秀色若可餐窈窕多容儀婉媚巧笑言
暮春春服成粲粲綺與紈金雀垂藻翹瓊佩結瑤璠
方駕揚清塵濯足洛水瀾藹藹風雲會佳人一何繁
南崖充羅幕北渚盈駟軒清川含藻景高岸被華丹
馥馥芳袖揮泠泠纖指彈悲歌吐清響雅舞播幽蘭
丹唇含九秋妍迹陵七盤赴曲迅驚鴻蹈節如集鸞

綺態隨顏變沈姿無定源俯仰紛阿那顧步咸可歡
遺芳結飛颺浮景映清湍冶容不足詠春遊良可歎

羅敷原作日出
東南隅行

梁沈約

朝日出邯鄲照我叢臺端中有傾城豔顧景織羅紈
延軀似織約遺視若回瀾瑤裝映層綺金服炫雕欒
幸有同匡好西仕服秦官寶劍垂玉貝汗馬飾金鞍
縈場類轉雪逸控寫一作騰鸞羅衣夕解帶玉釵暮
垂冠

羅敷原作日出
東南隅行

梁張率

朝日照屋梁夕月懸洞房專遽自稱豔獨口伊覽光

雖資自然色誰能棄薄妝施著見朱粉點畫示頰黃
含貝開丹吻如羽發清揚金碧既簪珥綺縠復衣裳
方領備蟲彩曲裙雜鴛鴦手操獨繭緒唇凝脂燥黃

南威原作日出
東南隅行

陳後主

重輪上瑞暉西北照南威南威年二八開牖敞重闈
當壚送客去上苑逐春歸鬢下珠勝月牕前雲帶衣
紅裙結未解綠綺自難微

羅敷原作日出
東南隅行

陳殷謀

秦樓出佳麗正值朝日光陌頭能駐馬花處復添香

羅敷原作日出
東南隅行

隋盧思道

初月正如鉤懸光入綺樓中有可憐妾如恨亦如羞
深情出艷語密意滿橫眸楚腰寧且細孫眉本未愁
青玉勿當取雙銀詎可一作肯留會待東方騎遙居最
上頭

羅敷

梁蕭子範

城南日半上微步弄妖姿含情動燕俗顧景笑齊眉
不憂桑葉盡還憶畏蠶饑春風若有顧惟願落花遲
羅敷

北魏高允

邑中有好女姓秦字羅敷巧笑笑美回盼鬢髮復凝膚
脚著花文履耳穿明月珠頭作墮馬髻倒枕象牙梳

姊妹善趨步襜褕曳長裾王侯爲之顧駟馬自踟躕

情人碧玉歌二首

碧玉歌一名千金意晉孫綽所作樂府詩集云宋汝南王

晉孫綽

碧玉小家女不敢攀貴德感郎千金意慙無傾城色

二

碧玉破瓜時郎爲情顛倒感君不羞赧迴身就郎抱

莫愁

二曲○唐書樂志曰莫愁樂者出于石城樂石城有女子名莫愁善歌謠石城樂和

中復有忘愁聲因有此歌

古辭

莫愁在何處莫愁石城西艇子打兩槳催送莫愁來

二

人音 卷之六
聞歡下揚州相送楚山頭探手抱腰看江水斷不流

莫愁原作河中
之水歌

梁武帝

河中之水向東流洛陽女兒名莫愁莫愁十三能織
綺十四採桑南陌頭十五嫁為盧家婦十六生兒字
阿侯盧家蘭室桂為梁中有鬱金蘇合香頭上金釵
十二行足下絲履五文章珊瑚掛鏡爛生光平頭奴
子擎一作履箱人生富貴何所望恨不早嫁東家王

楚明妃曲

宋湯惠休

瓊臺彩楹桂寢雕薨金閨流耀玉牖含英香芬幽藹
珠彩珍榮文羅秋翠紈綺春輕驂駕鸞鶴往來仙靈

含姿綿視微笑相迎結蘭枝送日成當年為君榮

楚妃曲

梁吳均

春妝約春黛如月復如蛾玉釵照繡領金薄厠紅羅

徐尚書座賦得阿憐

梁王樞

紅蓮披早露玉貌映朝霞飛燕啼妝罷顧插步搖花
溢匝金鈿滿參差繡領斜暮還垂瑤帳香燈照九華

舞媚娘三首

陳後主

樓上多嬌艷當牕併三五爭弄遊春陌相遊開繡戶
轉態結紅裙含嬌拾翠羽留賓乍拂絃託意時移柱

二

淇水變新臺春壚當夏開玉面含羞出金鞍排夜來

三

春日好一作多風光尋觀向市傍轉身移佩響牽袖起

不香

舞媚娘

北周庾信

朝來戶前照鏡含笑盈盈自看眉心濃黛直點額角

輕黃細安祗疑落花慢去復道春風不還少年唯有

歡樂飲酒那得留殘

西施詠

唐王維盛

艷色天下重西施寧久微朝為越溪女暮作吳宮妃

賤日豈殊衆貴來方悟稀邀人傅脂粉不自著羅衣

君寵益嬌態君憐無是非當時浣紗伴莫得同車歸

持謝隣家子數顰安可希

盧姬篇

唐崔顥盛

盧姬少小魏王家綠鬢紅唇桃李花魏王綺樓十二

重水晶簾箔繡芙蓉白玉欄杆金作柱樓上朝朝學

歌舞前堂後堂羅袖人南牕北牕花發春翠幌珠簾

鬪絲管一彈一奏雲欲斷君王日晚下朝歸鳴環佩

玉生光輝人生今日得嬌貴誰道盧姬身細微

王家少婦

唐崔顥盛

十五嫁王昌盈盈入畫堂自矜年最少復倚壻為郎
舞愛前溪淥歌憐子夜長閑來鬪百草度日不成妝

崔顥擢進士第有文無行好菹博嗜酒娶妻惟擇美者俄又棄之凡四五娶初太守李邕聞其名虛舍邀之顥至獻詩首章曰十五嫁王昌邕叱曰小兒無禮不與接而去

情人玉清歌

一作張南容詩

唐畢耀盛

洛陽城中有一人名玉清可憐玉清如其名善踏斜
柯能獨立嬋娟花艷無人及珠為裙玉為纓臨春風
吹玉笙悠悠滿天星黃金閣上晚妝成雲和曲中為
曼聲玉梯不得踏搥袂兩盈盈城頭之日復何情

贈段七娘

唐李白盛

羅襪凌波生網塵那能得計訪情親千杯綠酒何辭
醉一面紅妝惱殺人

號國夫人

唐杜甫盛

號國夫人承主恩平明上馬入宮門却嫌脂粉污顏
色淡掃蛾眉朝至尊

贈薛瑤英

唐賈至盛

舞怯銖衣重笑疑飛臉開方知漢成帝虛築避風臺

贈薛瑤英

一不賈至贈妓盛小叢

唐楊炎中

雪面淡眉天上女鳳簫鸞翅欲飛去玉山翹翠步無
塵楚腰如柳不勝春

人音
卷之十一
倫開府席上賦得美人名解愁

唐盧綸中

不敢苦相留明知不自由
頰眉乍欲語斂笑又低頭
舞態兼些醉歌聲似帶羞
今朝總見也只守解人愁

贈碧玉

唐于鵠中

新繡籠裙豈蔻花
路人笑上返金車
霓裳禁曲無人解
暗問梨園弟子家

秦娘歌

并序

唐劉禹錫中

秦娘本草尚書家主謳者
初尚書爲吳郡得之命
樂工誨之琵琶使之歌
且舞無幾何盡得其術居

一二歲攜之以歸京師
京師多新聲善工於是又
捐去故技以新聲度曲教之
又盡其妙而秦娘名
字往往見稱於貴遊之間
元和初尚書薨於東京
秦娘出居民間久之爲蘄州
刺史張繇所得其後
繇坐事謫居武陵郡
繇卒秦娘無所歸地荒且遠
無有能知其容與藝者
故日抱樂器而哭其音
噍殺以悲雜客聞之爲歌
其事以足於樂府云

秦娘家本閭門西門前
綠水環金堤有時妝成好
天氣走上高橋折花戲
風流太守韋尚書
路傍忽見停隼旗
斗量明珠烏傳意
紺幃迎入專城居
長鬢如雲

衣似霧錦茵羅薦承輕步舞學驚鴻水榭春歌撩上
客蘭堂暮從郎西入帝城中貴遊簪組香簾櫳低鬟
煖視抱明月纖指破撥生胡風繁華一旦有消歇題
劍無光履聲絕洛陽舊宅生草萊杜陵蕭蕭松柏哀
妝奩蟲網厚如蠶博山爐側傾寒灰蘄州刺史張公
子白馬新到銅駝里自言買笑擲黃金月墜雲收從
此始安知鵬鳥座隅飛寂寞旅魂招不歸秦家鏡有
前時結韓壽香銷故篋衣山城少人江水碧斷鴈哀
猿風雨夕朱絃已絕爲知音雲鬢未秋私自惜舉目
風煙非舊時夢尋歸路多參差如何將此千行淚更

灑湘江斑竹枝

洛姝真珠

唐李賀

真珠小娘下清郭洛苑香風飛綽綽寒鬢斜釵玉燕
光高樓唱月敲懸璫蘭風桂露灑幽翠紅絃裊雲咽
深思花袍白馬不歸來濃蛾疊柳香脣醉金鵝屏風
蜀山夢鸞裾鳳帶行煙重八驄籠晃臉差移日絲繁
散曛羅洞市南曲陌無秋涼楚腰衛鬢四時芳玉喉
窸窸排空光牽雲曳雪留陸郎

許公子鄭姬歌

鄭園中
請賀作

唐李賀

許史世家外親貴宮錦千端買沈醉銅駝酒熟烘明

膠古堤大柳煙中翠桂開客花名鄭袖入洛聞香鼎
門口先將芍藥獻妝臺後解黃金大如斗莫愁簾中
許合歡清絃五十爲君彈彈聲咽春弄君骨骨興牽
人馬上鞍兩馬八蹄踏蘭苑情如合竹誰能見夜光
玉枕棲鳳凰袷羅當門刺純綫長翻蜀紙卷明君轉
角含商破碧雲自從小靨來東道曲里長眉少見人
相如塚上生秋柏三春誰是言情客蛾鬢醉眼拜諸
宗爲謁皇孫請曹植

馮小憐

唐李賀

灣頭見小憐請上琵琶絃破得東風恨今朝直幾錢

裙垂竹葉帶鬢濕杏花煙玉冷紅絲重齊宮妾駕鞍

簡簡吟

唐白居易

蘇家小女名簡簡芙蓉花腮柳葉眼十一把鏡學點
妝十二抽針能繡裳十三行坐事調品不肯迷頭白
地藏玲瓏雲髻生菜樣飄颻風袖薔薇香殊姿異態
不可狀忽忽轉動如有光二月繁霜殺桃李明年欲
嫁今年死丈人阿母勿悲啼此女不是凡夫妻恐是
天仙謫人世只合人間十三歲大都好物不堅牢彩
雲易散琉璃脆

秦娥

唐劉駕

晚

秦娥十四五面白於指爪羞人夜採桑驚起戴勝鳥
比紅兒詩三十首

唐羅虬晚

青絲高綰石榴裙腸斷當筵酒半醺置向漢宮圖畫
裏入胡應不數昭君

匝匝千山與萬山碧桃花下景長閑神仙得似紅兒
貌應免劉郎憶世間

詔下人間選好花月眉雲髻盡名家紅兒若向當時
見繫臂先封第一紗

鋒鏑縱橫不敢看淚垂玉筋正沈瀾應緣近似紅兒
貌始得深宮奉五官

金縷濃薰百和香臉紅眉黛入時妝當時若向喬家
見未敢將心在窈娘

通宵甲帳散香塵漢帝精誠禮百神若見紅兒醉中
態也應休憶李夫人

輕小休誇似燕身生來占斷紫宮春漢皇若遇紅兒
貌掌上無因著別人

鸚鵡娥如裊露紅鏡前眉樣自深宮稍教得似紅兒
貌不嫁南朝沈侍中

拔得芙蓉出水新魏家公子信才人若教瞥見紅兒
貌不肯留情賦洛神

五雲高捧紫金堂花下投壺侍玉皇從道世人都不
識也應知有杜蘭香

京口喧喧百萬人競傳河鼓謝星津柰花似雪爭簪
髻今日天容是後身

薄粉輕朱取次施大都端正亦相宜只如花下紅兒
態不藉城中半額眉

妝成渾欲認前朝金鳳雙釵逐步搖未必慕容宮裏
伴舞風歌月勝纖腰

漢皇曾識許飛瓊寫向人間作畫屏昨日紅兒簾下
見大都相似更娉婷

魏帝休誇薛夜來霧綃雲縠稱身裁紅兒秀發君知
否倚檻繁花帶露開

逗玉濺盆浴殿開邀恩先賜夜明苔紅兒若是三千
數多少芳心似死灰

畫簾垂地紫金牀暗引羊車駐七香若是紅兒此中
住不勞煙篠灑宮廊

煖塘爭赴蕩舟期行唱菱歌著艷詞爲問東山謝丞
相可能諸妓勝紅兒

巫山洛浦本無情總爲佳人便得名今日雕陰有神
艷後來公子莫相輕

前代休憐事可奇後來還出有光輝爭知晝臥紗窗裏不有神人覆玉衣

鳳舞香飄繡幕風暖穿馳道百花中還緣有似紅兒貌始得迎將入漢宮

休道將軍出世才盡驅諸妓下歌臺都緣沒箇紅兒貌致使輕教後閣開

能將一貌使人迷花艷何須上大堤疎屬便同巫峽路洛川真是武陵溪

辭輦當時意可知寵深還恐寵先衰若教得似紅兒貌占却君恩自不疑

波平楚澤浸星辰臺上君王宴早春畢竟章華會中客冠纓虛絕爲何人

天碧輕紗只六銖宛風含露透肌膚便教漢曲爭明媚應沒心情更弄珠

濃艷濃香雪壓枝裊煙和露曉風吹紅兒被掩妝成後含笑無人獨立時

金粟妝成扼臂環舞腰輕轉瑞雲間紅兒生在開元末羞殺新豐謝阿蠻

君看紅兒學醉妝袴裁宮纈研裙長誰能更把閒心力比並當時武媚娘

一舸春深指鄂君好風從度水成紋越人若見紅兒
面繡被應羞徹夜薰

後魏時相州人作李波小妹歌疑其未備因補
之
唐韓偓晚

李波小妹字雍容窄衣短袖蠻錦紅未解有情夢梁
殿何曾自媚妬吳宮誰教牽引知酒味因令悵望成
春慵海棠花下鞦韆畔背人撩鬢道忽忽

贈麗人

以下贈貽

梁簡文帝

腰肢本猶絕眉眼特驚人判目無相比還來有洛神

戲贈麗人

梁簡文帝

麗姐與妖嬈共拂可憐妝同安鬟裏撥異作額間黃
羅裙宜細簡畫襪重高墻含羞來上砌微笑出長廊
取花爭問色一作寶鑑扳枝念麝香但歌聊一曲鳴絃未
肯張自矜心所愛三十侍中郎

爲人贈美人

梁劉孝綽

巫山薦枕日洛浦獻珠時一遇便如此寧關先有期
幸非使君問莫作羅敷辭夜長眠復坐誰知闈斂眉
欲寄同花燭爲照遙相思

淇上戲蕩子婦

梁劉孝綽

桑中始奕奕淇上未湯湯美人要雜佩上客誘明璫

日暗人聲靜微步出蘭房露葵不待勸鳴琴無暇張
翠釵掛已落羅衣拂更香如何嫁蕩子春夜守空牀
不見青絲騎徒勞紅粉妝

奉和賜曹美人

北周庾信

月光如粉白秋露似珠圓絡緯無機織流螢帶火寒
何年迎弄玉今朝得夢蘭訝許能含笑芙蓉宜熟看
戲贈趙使君美人

唐杜審言

初

紅粉青蛾映楚雲桃花馬上石榴裙羅敷獨向東方
去謾學他家作使君

醉戲竇子美人

唐岑參

盛

朱唇一點桃花殷宿妝嬌羞偏髻鬟細看只似陽臺
女醉著莫許歸巫山

陌上贈美人

唐李白

盛

駿馬驕行踏落花垂鞭直拂五雲車美人一笑蹙珠
箔遙指紅樓是妾家

奉勅贈康尚書美人

唐薛伯紆

中

天門喜氣曉氛氲聖主臨軒召冠軍欲令從此行霖
雨先賜巫山一片雲

贈美人

唐鄭仁表

巖吹如何下太清玉肌無疹六銖輕自知不是流霞

酌願聽雲和瑟一聲

贈美人

唐崔澹晚

怪得輕風送異香
娉婷仙子曳霓裳
惟憂錯認偷桃客
曼倩曾爲漢侍郎

贈美人二首

唐方干晚

嚴冬忽作看花日
盛暑翻爲見雪時
坐上弄嬌聲不轉
樽前掩笑意難知
含歌媚盼如桃葉
妙舞輕盈似柳枝
年紀未多猶怯在
些些私語怕人疑

昔日仙人今玉人
深冬相見亦如春
倍酬金價微含笑
纔發歌聲早動塵
昔歲曾爲蕭史伴
今朝應作宋家隣
百年別後知誰在
須遣丹青畫取真

貽美人

唐章孝標晚

諸侯帳下慣新妝
皆怯劉家薄媚娘
寶髻巧梳金翡翠
羅裙宜著繡鴛鴦
輕輕舞汗初沾袖
細細歌聲欲遶梁
何事不歸巫峽去
故來人世斷人腸

杜丞相棕筵中贈美人

唐李羣玉晚

裙拖六幅瀟湘水
鬢聳巫山一朶雲
貌態祇應天上
有歌聲豈合世間聞
胸前瑞雪燈斜照
眼底桃花酒半曛
不是相如憐賦客
肯教容易見文君

懷李夫人

原作落葉哀蟬曲○王子年拾遺記曰漢武帝思懷李夫人不可復得時

始穿昆明之池泛翔禽之舟帝自造歌曲使
女伶歌之時日已西傾涼風激水女伶歌聲
甚道因賦落葉哀蟬
之曲○以下懷憶
漢武帝

羅袂兮無聲玉墀兮塵生虛房冷而寂寞落葉依於
重扇望彼美之女兮安得感余心之未寧

憶蜀地佳人

唐駱賓王
初

東西吳蜀關山遠魚來鴈去兩難聞莫怪常有千行
淚只爲陽臺一片雲

月夜有懷

唐陳子昂
初

美人挾趙瑟微月在西軒寂寞夜何久慙慙玉指繁
清光委衾枕遙思屬湘沅空簾隔星漢猶夢感精魂

對酒有懷寄李九郎中

唐白居易
中

往年江外拋桃葉去歲樓中別柳枝寂寞春來一杯
酒此情惟有李君知吟君舊句情難忘風月何時是
盡時

獨居有懷

唐李商隱
晚

麝重愁風逼羅疎畏月侵怨魂迷恐斷嬌喘細疑沈
數急芙蓉帶頻抽翡翠簪柔情終不遠遙妬已先深
浦冷鴛鴦去園空蛺蝶尋蠟花長遞淚箏柱鎮移心
覓使嵩雲暮迴頭灞岸陰只聞涼葉院露井近寒砧

月夜重寄宋華陽姊妹

唐李商隱
晚

偷桃竊藥事難兼十二城中鎖彩蟾應共三英同夜
賞玉樓仍是水精簾

代西封侯美人

以下別

梁王環

於今辭宴語方念泣離違無因從朔鴈一向黃河飛

代別情人

唐李白

盛

水清本不動桃花發岸傍桃花弄水色波蕩搖春光
我悅子容艷子傾我文章風吹綠琴去紫鴛鴦
昔作一水魚今成兩枝鳥哀哀長鷄鳴夜
起折相思樹歸贈知寸心覆水不可收行雲難重尋
天涯有度鳥莫絕瑤華音

賦別佳人

唐崔膺

中

壠上流泉壠下分斷腸嗚咽不堪聞嫦娥一入月中
去巫峽千秋空白雲

贈別

唐杜牧

晚

娉娉裊裊十三餘荳蔻梢頭二月初春風十里揚州
路卷上珠簾總不知

苑中見美人

以下雜題

梁何遜

羅袖風中捲玉釵林下耀團扇承落花復持掩餘笑
春郊見美人

梁費昶

芳郊拾翠人迴袖捲芳春金輝起步搖紅采發吹綸

陽陽蓋項日飄飄馬足塵薄暮高樓下當知妾姓秦
南苑逢美人
梁何思澄

洛浦疑迴雪巫山似日雲傾城今始見傾國昔曾聞
媚眼隨羞合丹唇逐笑分風捲葡萄帶日照石榴裙
自有狂夫在空持勞使君

車中見美人

梁邵陵王

關情出眉眼軟媚著腰肢語笑能嬌嫉行步絕逶迤
空中自迷惑渠傍會不知懸念猶如此得時應若爲
詠美人春遊
梁江淹

江南二月春東風轉綠蘋不知誰家子看花桃李津

白雪凝瓊貌明珠點絳唇行人咸息駕爭擬洛川神
詠苑中遊人
梁蕭子範

二月春心動遊望桃花初迴身隱日扇却步斂風裾
詠美人看畫
梁簡文帝

殿上圖神女宮裏出佳人可憐俱是畫誰能辯僞真
分明淨眉眼一種細腰身所可特爲異長有好精神
詠美人看畫應令
梁庾肩吾

欲知畫能巧喚取真來映並出似分身相看如照鏡
安釵等疎密著領俱周正不解平城圍誰與丹青競
詠美人眼
梁劉孝綽

含嬌暎已合離怨動方開欲知密中意浮光逐笑廻
奉和趙王美人春日
北周庾信

直將劉碧玉來過陰麗華祗言滿屋裏併作一園花
新藤亂上格春水漫吹沙步搖釵梁動紅輪被一作
角斜今年逐春處先向石崇家

詠美人治妝

梁江洪

上車畏不妍顧盼更斜轉大恨畫眉長猶言顏色淺

美人晨妝

梁簡文帝

北牕向朝鏡錦帳復斜縈嬌羞不肯出猶言妝未成
散黛隨眉廣臙脂逐臉生試將持出衆定得可憐名

晚妝曲

北魏周南

青樓誰家女當牕啓明月拂黛雙蛾飛調脂艷桃發
舞罷鸞自羞妝成淚仍滑願託嫦娥影尋郎縱燕越

美人新妝

唐楊容華炯姪女

宿鳥驚眠罷房櫳乘曉開鳳釵金作鏤鸞鏡玉爲臺
妝似臨池出人疑月下來自憐終不見故去復徘徊

美人梳頭

唐張碧中

玉堂花院小枝紅綠牕一片春光曉玉容驚覺濃睡
醒圓蟾挂出妝臺表金盤解下叢鬟碎三尺巫雲縮
朝翠皓指高低寸黛愁水精梳滑參差墜須臾攏掠

人音 卷之六
三
蟬鬢生玉釵冷透冬冰明芙蓉拆向新開臉秋泉謾
轉眸波橫鸚鵡偷來話心曲屏風半倚遙山綠

美人梳頭歌

唐李賀

中

西施曉夢綃帳寒香鬟墮髻半沈檀輓轡呀呀轉鳴
玉驚起芙蓉睡新足雙鸞問鏡秋水光解鬟臨鏡立
象牀一編香絲雲撒地玉釵落處無聲膩纖手卻盤
老鴉色翠滑寶釵簪不得春風爛熳惱嬌慵十八鬟
多無氣力妝成髮鬢欹不斜雲裾數步踏鴈沙背人
不語向何處下階自折櫻桃花

新上頭

唐韓偓

晚

學梳鬆鬢試新裙消息佳期在此春爲要好多心轉
惑遍將宜稱問傍人

詠美人在天津橋

唐駱賓王

初

美人出東隣容與在天津動衣香滿路移步襪生塵
水下看妝影眉頭畫月新寄言曹子建箇是洛川神
美人分香

唐孟浩然

盛

艷色本傾城分香更有情髻鬟垂欲解眉黛拂能輕
舞學平陽態歌翻子夜聲春來狹斜道含笑待逢迎

觀美人臥

唐梁銍

盛

妾家巫峽陽羅帳寢銀牀曉日臨牕久春風引夢長

落釵猶骨鬢微汗欲銷黃縱使朦朧覺魂猶逐楚王
美人騎馬

唐

駿馬嬌仍穩春風灞岸晴促來金蹬短扶上玉人輕
帽束雲鬟亂鞭籠翠袖明不知從此去何處更傾城

詩雋類函卷六十七

東吳俞安期彙纂 宣城梅鼎祚增定

關中來 臨訂校

人部九

妓

傷妓附

男寵

奴婢

○妓

傷妓附

詠娼婦

梁何遜

暖暖高樓暮華燭帳前明羅帷雀釵影寶瑟鳳雛聲
庭花枝上發新月霧中生誰念當牕牖相望獨盈盈

為徐僕射妓作

梁王僧孺

日晚應歸去上客強盤桓稍知玉釵重漸見羅襦寒

石崇金谷妓

梁庾肩吾

蘭堂上客至綺席清絃撫自作明君辭還教綠珠舞

冬夜詠妓

北齊蕭放

佳麗盡時年合暝不成眠銀龍銜燭燼金鳳起爐煙

吹箎先弄曲調箏更撮絃歌還團扇後舞出妓行前

絕代終難及誰復數神仙

侯司空宅詠妓

陳陰鏗

佳人遍綺席妙曲動鷓絃樓似陽臺上池如洛水邊

鶯啼歌扇後花落舞衫前翠柳將斜日俱照晚妝鮮

侯司空宅詠妓

陳劉刪

石家金谷妓妝罷出蘭閨看花只欲笑聞瑟不勝啼

山邊歌落日池上舞前溪將人當桃李何處不成蹊

賦得妓

隋陳子良

金谷多歡宴佳麗正芳菲流霞席上滿迴雪掌中飛

明月臨歌扇行雲接舞衣何必桃將李別有待一作代

春暉

詠妓

唐王勣初

妖姬掃淨一作飾妝窈窕出蘭房日照當軒影風吹滿

路香早時歌扇薄今日舞衫長不應令曲誤持此試

周郎

人部

卷六十七

妓

倡女詞

唐張籍中

輕鬢叢梳濶掃眉為嫌風日下樓稀畫羅金縷難相稱故著尋常淡薄衣

夜聽妓

宋孝武帝

寒夜起聲管促席引靈寄深心屬悲絃遠情逐流吹勞襟憑若辰誰謂懷忘易

夜聽妓二首

宋鮑照

夜來坐幾時銀漢傾露落澄滄入閨景歲蕤被園藿絲管感暮情哀音遶梁作芳盛不可恒及歲共為樂天明坐當散琴酒駛弦酌

蘭膏消耗夜轉多亂筵雜坐更絃歌傾情逐節寧不苦特為盛年惜容華

夜聽妓二首

齊謝朓

瓊閨釧響聞瑤席芳塵滿要取洛陽人共命江南管情多舞態遲意傾歌弄緩知君密見親寸心傳玉盃

二

上客光四座佳麗直千金挂釵報纓絕隋珥荅琴心蛾眉已共笑清香復入襟歡樂夜方靜翠帳垂沈沈

聽鄰妓

齊丘巨源

披衽乏遊術憑軾寡文才蓬門長自寂虛席視生埃

貴里臨倡一作館東鄰歌吹臺雲間嬌響徹風未豔
聲來飛華瑤翠幄揚芬金碧杯久絕中州美從念尸
鄉灰遺情悲近世中山安在哉

夜聽妓

梁簡文帝

合歡蠲忿葉萱草忘憂條何如明月夜流風拂舞腰
朱唇隨吹盡一作玉釧逐絃搖留賓惜殘一作弄負
態動餘嬌

林下作妓詩

梁昭明太子

炎光向夕斂徙宴臨前池泉將影相得花與面相宜
管聲如鳥弄舞袖寫風枝歡樂不如醉千秋長若斯

和林下作妓應令

梁元帝

日斜下北閣高宴出南榮歌清隨澗響舞影向池生
輕花亂粉色風篠雜絃聲獨念陽臺下願待洛川笙
夕出通波閣下觀妓

梁元帝

蛾月漸成光燕姬戲小堂胡舞開春閣鈴盤出步廊
起龍調節奏一作却鳳點笙簧樹交臨舞席荷生夾
妓航竹密無分影花疎有異香舉杯聊轉笑歡茲樂
未央

同蕭長史看妓

梁武陵王紀

燕姬奏妙舞鄭女發清歌迴羞出曼臉送態入嚙蛾

寧殊值行雨詎減見凌波想君愁日暮應羨魯陽戈

夜出妓

梁沈君攸

簾間月色度燭定妓成行迴身釧玉動頓履珮珠鳴
低衫拂髮影舉扇起歌聲匣中曲猶奏掌上體應輕
奉和夜聽妓聲

梁鄧鏗

燭華似明月髮影勝飛橋妓兒齊鄭樂爭妍學楚腰
新歌自作曲舊瑟不須調衆中俱不笑座上莫相撩
夜聽妓賦得烏夜啼

梁劉孝綽

鷓絃且輟弄鶴操暫停徽別有啼烏曲東西相背飛
倡人怨獨守蕩子殊未歸忽聞生離唱長夜泣羅衣

隔壁聽妓

陳蕭琳

徒聞絃管切不見舞腰迴唯有歌梁共塵飛一半來

和衡陽殿下高樓看妓

陳江總

起樓侵碧漢初日照紅妝絃心豔卓女曲誤動周郎
竝歌時轉黛息舞暫分香挂纓銀燭下莫笑玉釵長
和趙王看妓

北周庾信

長思浣紗石空想

一作定憶擣衣砧臨叩若有便一作使爲

說解琴心

和趙王看妓

北周庾信

綠珠歌扇薄飛燕舞衫長琴曲隨流水簫聲逐鳳凰

細縷纏鍾格圓花釘鼓牀一作膺風蟬鬢懸知曲不

誤無事畏一作顧周郎

衡陽王齋閣奏妓

隋虞茂

金溝低御道玉管正吟一作迎風拾翠天津上迴鸞鳥

路中鏡前看月近歌處覺塵空今宵織女見言是望

仙宮

和趙郡王觀妓應教

隋僧法宣

桂山留上客蘭室命姪妖城中畫眉黛宮內束纖腰

舞袖風前舉歌聲扇後驕周郎不相顧今日管絃調

和平涼公觀趙郡王妓

隋弘執恭

小堂羅薦陳妙妓命燕秦蛾眉疑假黛紅臉自含春

合舞俱回雪分歌共落塵齊竽不可厠空願上龍津

夜聞鄰妓

隋盧思道

倡樓對三道吹臺臨九重笙隨山上鶴笛奏水中龍

怨歌聲易斷妙舞態難逢誰能暫留客解佩一相從

酬蕭侍中春園聽妓

隋李孝貞

微雨散芳菲中園照落暉絳樹搖歌扇綠珠飄舞衣

繁絃調對酒雜引動思歸愁人當此夕羞見落花飛

辛司法宅觀妓

唐盧照鄰初

南國佳人至北堂羅薦開長裙隨鳳管促柱送鸞杯

雲光身後落雪態掌中回到愁金谷晚不怪玉山頽

益州城西張超亭觀妓

唐盧照鄰

初

落日明歌席行雲逐舞人江前飛暮雨梁上遶輕塵
冶眼看疑畫妝樓望似春高車勿遽返長袖欲相親

李員外秦援宅觀妓

唐沈佺期

初

盈盈粉署郎五日宴春光選客虛前館徵聲徧後堂
玉釵翠羽飾羅袖鬱金香拂黛隨時廣挑鬟出意長
轉歌遙合態度舞暗成行巧落梅庭裏斜光映曉妝

溫泉馮劉二監客舍觀妓

唐張說

初

溫泉寒林暮羣遊樂事多佳人蹀駿馬乘月夜相過

秀色燃紅黛嬌香發綺羅鏡前鸞對舞琴裏鳳傳歌
妬寵傾新意銜恩奈老何為君留上客歡笑斂雙蛾

岐王席觀妓

唐張諤

初

半額畫雙蛾盈盈燭下歌玉杯寒意少金屋夜情多
香豔王分帖裙嬌勅賜羅平陽莫相妬喚出不如他

岐王席觀妓

唐崔顥

盛

二月春來半王家日正長柳垂金屋暖花發玉樓香
拂匣先臨鏡調笙更炙簧還將歌舞態只擬奉君王

夜觀妓

唐儲光羲

盛

白雪宜新舞清宵召楚妃嬌童攜錦薦侍女整羅衣

花映垂鬟轉香迎步履飛徐徐歛長袖雙燭送將歸

宴崔明府宅夜觀妓

唐孟浩然盛

畫堂觀妙妓長夜正留賓燭吐蓮花豔妝成桃李春
髻鬟低舞席衫袖掩歌唇汗濕偏宜粉羅輕詎著身
調移箏柱促歡會酒杯傾儻使曹王見應嫌洛浦神

同張明府碧谿觀妓作

唐孟浩然盛

別業聞新製同聲應者多還看碧谿合不羨綠珠歌
自有陽臺女朝朝拾翠過綺筵鋪錦繡妝牖閉藤蘿
秩滿休閒日春餘景色和仙鳥能作伴羅襪共凌波
別島尋花藥迴潭折芰荷更憐斜日照紅粉豔青蛾

五日觀妓前見五日

唐萬楚盛

西施謾道浣春紗碧玉今時鬪麗華
眉黛奪將萱草色紅裙妬殺石榴花
新歌一曲令人豔醉舞雙眸歛
鬢斜誰道五絲能續命却令今日死君家

揚州雨中張十七宅觀妓

唐張謂盛

夜色帶一作對寒煙燈花拂更燃
殘妝添石黛艷舞落
金鈿掩笑頻歌扇迎歌乍動絃
不知巫峽雨何事海

西邊

邯鄲南亭觀妓

唐李白盛

歌鼓燕趙兒魏姝弄鳴絲
粉色豔日彩舞袖拂花枝

把酒顧美人請歌邯鄲詞清箏何繚繞度曲綠雲垂
平原君安在科斗生古池座客三千人於今知有誰
我輩不作樂但爲後代悲

在水軍宴韋司馬樓船觀妓

唐李白

盛

搖曳帆在空清流順歸風詩因鼓吹發酒爲劍歌雄
對舞青樓妓雙環白玉童行雲且莫去留醉楚王宮
數陪李梓州泛江有女樂在諸舫戲爲艷曲二

首

唐杜甫

盛

上客迴空騎佳人滿近船江清歌扇底野曠舞衣前
玉袖凌風並金壺隱浪偏競將明媚色偷眼艷陽天

二

白日移歌袖青霄近笛牀翠眉縈度曲雲鬢儼分行
立馬千山暮迴舟一水香使君自有婦莫學野鴛鴦
陪諸貴公子丈八溝攜妓納涼晚際遇雨二首

唐杜甫

盛

落日放船好輕風生浪遲竹深留客處荷淨納涼時
公子調冰水佳人雪藕絲片雲頭上黑應是雨催詩

二

雨來沾席上風急打船頭越女紅裙濕燕姬翠黛愁
纜侵堤柳繫幔捲浪花浮歸路翻蕭颯陂塘五月秋

過李將軍南鄭林園觀妓

唐劉長卿中

郊原風日好，自古弄何頻。小婦秦家女，將軍天上人。

鴉歸長郭暮，草映大堤春。客散垂陽下，通橋車馬塵。

陪辛大夫西亭宴觀妓

唐劉長卿中

歌舞憐遲日，旌麾映早春。鶯窺隴西將，花對洛陽人。

醉罷知何事，恩深忘此身。任他行雨去，歸路裊香塵。

王郎中席歌妓

唐顧况中

柳拂青樓花滿衣，能歌宛轉世應稀。空中幾處聞清

響，欲遶行雲不遣飛。

彭州蕭使君出妓夜宴見送

唐羊士諤中

玉顏紅燭忽驚春，微步凌波暗拂塵。自是當歌歛眉

黛，不應惆悵為行人。

與牛家妓樂雨夜合宴

唐白居易中

玉管清絃聲旖旎，翠釵紅袖坐參差。兩家合奏洞房

夜，八月連陰秋雨時。歌臉有情凝睇久，舞腰無力轉

裙遲。人間歡樂無過此，上界西方即不知。

聽小妓歌原作楊柳枝

唐白居易中

楊柳枝洛下新聲也，洛之小妓有善歌之者。詞章

音韻聽可動人，故賦之。

小妓攜桃葉，新歌蹋柳枝。妝成翦燭後，醉起拂衫時。

人音 卷之二
繡履嬌行緩花筵笑上遲身輕委迴雪羅薄透凝脂
笙引簧頻暖箏催柱數移樂童翻怨調才子與妍詞
便想人如樹先將髮比絲風條搖兩帶煙葉帖雙眉
口動櫻桃破鬟低翡翠垂枝柔腰嫋娜黃嫩手葳蕤
唳鶴晴呼侶哀猿夜叫兒玉敲音歷歷珠貫字纍纍
袖爲收聲點釵因赴節遺重重遍頭別一一拍心知
塞北愁攀折江南苦別離黃遮金谷岸綠映杏園池
春惜芳華好秋憐顏色衰取來歌裏唱勝向笛中吹
唱罷那能別情多不自持纏頭無別物一首斷腸詩

觀蠻妓

唐王建

中

欲說昭君歛翠娥清聲委曲怨於歌誰家年少春風
裏拋與金錢唱好多

妓席

唐李商隱

晚

樂府聞桃葉人前道得無勸君書小字慎莫喚官奴
飲席代官奴贈兩從事

唐李商隱

晚

新人橋上著春衫舊主江邊側帽簷

隋獨孤信舉止風流曾風吹帽

簷側觀者塞路願得化爲紅綬帶許教雙鳳一時銜

觀舞妓

唐溫庭筠

晚

朔音悲嘒管瑤踏動芳塵總袖時增怨聽破復含嘖
凝腰倚風軟花題照錦春朱絃固淒緊瓊樹亦迷人

戲蕭娘

梁沈氏范靜妻

明珠翠羽帳金薄綠綃帷因風時暫舉想像見芳姿
清晨插步搖向晚解羅衣託意風流子佳情詎可私

示金陵子

一作金陵子詞

唐李白盛

金陵城東誰家子竊聽琴聲碧牕裏落花一片天上
來隨人直渡西江水楚歌吳語嬌不成似能未能最
有情謝公正要東山妓攜手林泉處處行

山遊示小妓

唐白居易中

雙鬟垂未合三十纔過半本是綺羅人今為山水伴
春前共揮弄好樹同攀翫笑容花底迷酒思風前亂

紅凝舞袖急黛慘歌聲緩莫唱楊柳枝無腸與君斷

寄李蘇州兼示楊瓊

唐白居易中

真娘墓頭春草碧心奴鬢上秋霜白為問蘇臺酒席
中使君歌笑誰與同就中猶有楊瓊在堪上東山伴
謝公

湖上醉中代諸妓寄嚴郎中

唐白居易中

笙歌杯酒正歡娛忽憶仙郎望帝都借問連宵直南
省何如盡日醉西湖蛾眉別久心知否雞舌含多口
厭無還有些些惆悵事春來山路見薜蘿

醉戲諸妓

唐白居易中

席上爭飛使君酒歌中多唱舍人詩不知明日休官
後逐我東山去是誰

寄蜀中薛濤校書

一作胡曾
詠薛濤

唐王建

中

萬里橋邊女校書枇杷花裏

一作

閉門居掃眉才子

于今

一作
知多

少管領春風總不如

贈鄭女郎古意

唐妓常浩

昨夜巫山中失却陽臺女朝來香閣裏獨伴楚王語
艷陽灼灼河洛神珠簾繡戶青樓春能彈箜篌弄纖
指愁殺門外少年子笑開一面紅粉妝東園幾處桃
花死朝理曲暮理曲獨坐牕前一片玉行也嬌坐也

嬌見之令人魂魄消堂前錦褥紅地鑪綠沈香奩傾
屠蘇解佩時時歇歇管芙蓉帳裏蘭麝滿晚起羅衣
香不斷滅燭每嫌秋夜短

贈妓人

唐孫棨

晚

綵翠鮮衣紅玉膚輕盈年在破瓜初霞杯醉喚劉郎
賭雲髻慵邀阿母梳不怕寒侵綠帶寶每憂風舉倩
持裾謾圖西子爲妝樣西子元來未得如

贈廣陵妓

唐張又新

雲雨分飛二十年當時求夢不曾眠今來頭白重相
見還上襄王玳瑁筵

贈歌妓

唐崔仲容 晚

水翦雙眸霧翦衣當筵一曲媚春輝
瀟湘夜色怨猶在巫峽曉雲愁不稀
皓齒乍分寒玉細黛眉輕感遠山微
渭城朝雨休重唱滿眼陽關客未歸

贈歌妓二首

唐李商隱 晚

水精如意玉連環下蔡城危莫破顏
紅綻櫻桃含白雪斷腸聲裏唱陽關

白日相思不奈何嚴城清夜斷經過
只知解道春來瘦不道春來獨自多

贈柳氏之妓

唐鄭還古 晚

冶豔出神仙歌聲勝管絃詞輕白紵曲歌
遏碧雲天未擬生裴秀如何乞鄭玄
不堪金谷水橫過墮樓前

倡樓戲贈

唐杜牧 晚

細柳橋邊深半春纈衣簾裏動香塵
無端有寄閑消息背插金釵笑向人

贈酒店胡姬

唐賀朝 盛

胡姬春酒店絃管夜鏘鏘紅氍鋪新月
貂裘坐薄霜玉盤初膾鯉金鼎正烹羊
上客無勞散聽歌樂世娘

獻陳陶處士

唐豫章蓮花妓

蓮花爲號玉爲腮珍重尚書遣妾來
處士不生巫峽

夢虛勞神女下陽臺

荅蓮花妓

唐陳陶晚

近來詩思清於水老大心情薄似雲
已向昇天得門戶錦衾深媿卓文君

送姪良攜二妓赴會稽戲有贈唐李白盛

攜妓東山去春光半道催遙看二桃李
雙入鏡中開

送零陵妓

唐戎昱中

寶釵香蛾翡翠裙妝成掩泣欲行雲
殷勤好取襄王意莫向陽臺夢使君

虎丘寺路宴留別諸妓

唐白居易中

銀泥裙映錦障泥畫舸停撓馬簇蹄
清管曲終鸚鵡語紅旗影動駱駝嘶
漸銷醉色朱顏淺欲語離情翠黛低
莫忘使君吟詠處女墳湖北虎丘西

見劉秀才與池州妓別

唐杜牧晚

遠風南浦萬重波未似生離恨別多
楚管能吹柳花怨吳姬爭唱竹枝歌
金釵橫處綠雲墮玉筍凝時紅粉和
待得枚臯相見日自應妝鏡笑蹉跎

見吳秀才與池州妓別

唐杜牧晚

紅燭短時羌笛怨清歌咽處蜀絃高
萬里分飛兩行淚滿江寒雨正蕭騷

別青州妓段東美

唐薛宜僚晚

阿母桃花方似錦
王孫草色亦如煙
不須更向滄溟望
惆悵歡情又一年

毆妓

唐李建勳晚

自為專房甚忽忽
有所傷當時心已悔
徹夜手猶香恨枕堆雲
髻啼襟搵月黃
起來猶忍惡
翦破繡鴛鴦

蘇小小歌

一曰錢塘蘇小小歌樂府廣題曰蘇小小錢塘名倡也蓋南齊時人西陵

在錢塘之西歌云西陵松柏下是也

古無名氏

妾乘油壁車
郎騎青驄馬
何處結同心
西陵松柏下

蘇小小歌

唐溫庭筠晚

買蓮莫破券
買酒莫解金
酒裏春容抱
離恨水中蓮
子懷芳心
吳宮女兒腰
似東家在錢塘
小江曲一自檀郎
逐便風門前
春水年年綠

出妓金陵子呈盧六四首

唐李白盛

南國新豐酒
東山小妓歌
對君君不樂
花月奈愁何

二

東道煙霞主
西江詩酒筵
相逢不覺醉
日墮歷陽川

三

安石東山三十春
傲然攜妓出風塵
樓中見我金陵子
何似陽臺雲雨人

小妓金陵歌楚聲家種丹砂學鳳鳴我亦為君飲清酒君心不肯向人傾

詠談容娘

唐常非月 盛

舉手整花鈿翻身舞錦筵馬圍行處匝人壓看場圓歌要一作索齊聲和情教細語傳不知心大小容得許多憐

賦崔娘

唐楊巨源 中

清潤潘郎玉不如中庭蕙草雪銷初風流才子多春思腸斷蕭娘一劄書

遇湖州妓宋態宜二首

唐李涉 中

長憶雲仙至小時芙蓉頭上綰青絲當時驚覺高唐夢唯有如今宋玉知
陵陽夜燕使君筵解語花枝在眼前自從明月西沈海不見嫦娥二十年

張好好詩

唐杜牧 晚

并序
牧大和三年佐故吏部沈公江西幕好好年十三始以善歌來樂籍中後一歲公移鎮宣城復置好好於宣城籍中後二歲為沈著作述師以雙鬟納之後二歲於洛陽東城重覩好好感舊傷懷故題

詩贈之

君為豫章姝十三纔有餘翠茁鳳生尾丹葉蓮含跗
高閣倚天半章江聯碧虛此地試君唱特使華筵鋪
主公顧四坐始訝來踟躕吳娃起引贊低徊映長裾
雙鬟可高下纔過青羅襦盼盼乍垂袖一聲離鳳呼
繁絃迸關細塞管裂圓蘆衆音不能逐裊裊穿雲衢
主公再三歎謂言天下殊贈之天馬錦副以水犀梳
龍沙看秋浪明月遊東湖自此每相見三日已為疎
玉質隨月滿艷態逐春舒絳脣漸輕巧雲步轉虛徐
旌旆忽東下笙歌隨舳艫霜凋謝樓樹沙暖句谿蒲

身外任塵土樽前極歡娛飄然集仙客

著作曾任
集賢校理諷

賦欺相如聘之碧瑤珮載以紫雲車洞閉水聲遠月
高蟾影孤爾來未幾歲散盡高陽徒洛陽重相見婬
婬為當壚怪我苦何事少年垂白鬚朋遊今在否落
拓更能無門館慟哭後水雲秋景初斜日挂衰柳涼
風生座隅灑盡滿衿淚短歌聊一書

悅妓行雲詩

唐鄭史

晚

最愛鉛華薄薄妝更兼衣著又鵝黃從來南國名佳
麗何事今朝在北行

題妓王福娘牆

唐孫棨

晚

移壁迴牕廢幾朝指環偷解博蘭椒無端鬪草輸鄰
女更被捻將玉步搖

題北里妓人壁

唐孫棨晚

寒繡衣裳餉阿嬌新圖香獸不禁燒東鄰起樣裙腰
闊剩感黃金一兩條

當壚曲

原作春思

唐賈至

盛

紅粉當壚弱柳垂金花臘酒解酴醾笙歌日暮能留
客醉殺長安輕薄兒

感故張僕射諸妓

唐白居易

中

黃金不惜買蛾眉揀得如花三四枝歌舞教成心力

盡一朝身去不相隨

傷曹娘

以下傷妓

唐宋之間

初

鳳飛樓伎絕鸞死鏡臺空獨憐脂粉氣猶著舞衣中

傷曹娘二首

唐宋之間

初

可憐冥冥去何之獨立丰茸無見期君看水上芙蓉
色恰似生前歌舞時

前溪妙舞今應盡子夜新聲遂不傳無復綺羅嬌白
日直將珠玉閉黃泉

河陽

唐宋之間

初

昔日河陽縣氛氲香氣多曹娘嬌態盡春樹不堪過

傷妓人董氏四首

唐張說 初

董氏嬌嬈性多為窈窕名人隨秋月落韻入擣衣聲

二

粉黛粘妝麗金花歇翠條夜臺無戲伴魂影向誰嬌

三

舊庭紅粉閣宿處白雪關春日雙飛去秋風獨不還

四

舞席沾殘粉歌梁委舊塵獨傷牕裏月不見帳中人

夔州竇員外使 一 見示悼妓詩顧余嘗識之命

同作

唐劉禹錫 中

前年曾見兩鬟時今日驚吟悼妓詩鳳管學成知有籍籠媒欲換豈無期空廊月照常行地後院花開舊折枝寂寞魚山青草裏何人更立智瓊祠

傷友人悼吹簫妓

唐杜牧 晚

玉簫聲斷沒流年滿目春愁隴樹煙豔質已隨雲雨散鳳樓空鎖月明天

和友人傷歌姬

唐温庭筠 晚

月缺花殘莫愴然花須終發月終圓更能何事銷芳念亦有濃華委逝川一曲豔歌留婉轉九原春草妬嬋娟王孫莫學多情客自古多情損少年

悼妓女

唐邵謁晚

炫耀一時間逡巡九泉裏一種為埃塵不學墮樓死

○男寵

繁華子

詠懷中
摘出

魏阮籍

昔日繁華子安陵與龍陽天天桃李花灼灼有輝光
悅懌若九春磬折似秋霜流盼發姿媚言笑吐芬芳
攜手等歡愛宿昔同衣裳願為雙飛鳥比翼共翱翔
丹青著明誓永世不相忘

周小史

晉張翰

翩翩周生婉孌幼童年十有五如日在東香膚柔澤

素質參紅團輔圓頤苗萑芙蓉爾形既淑爾服亦鮮
輕車隨風飛霧流煙轉側猗靡顧盼一作便妍和顏
善笑笑美口善言

變童

梁簡文帝

變童嬌麗質踐董復超瑕羽帳晨香滿珠簾夕漏賒
翠被含鴛色雕牀鏤象牙妙年同小史姝貌比朝霞
袖裁連壁錦牋織細種花攬袴輕紅出迴頭雙鬢斜
嬾眼時含笑玉手乍攀花懷猜非後釣密愛似前車
定使燕姬妬彌令鄭女嗟

詠武陵王左右伍高傳杯

梁簡文帝

頂分如兩髻簪長驗上頭投杯如欲轉疑殘已復留

繁華應令

梁劉遵

可憐周小童微笑摘蘭藜鮮膚勝粉白暎臉若桃紅
挾彈雕陵下垂鉤蓮葉東腕動飄香麝衣輕任好風
幸承拂枕選得奉畫堂中金屏障翠帔藍帕覆薰籠
本知傷輕薄含辭羞自通翦袖恩雖重殘桃愛未終
蛾眉詎須嫉新妝迎一作入宮

詠繁華

梁劉泓

可憐宜出眾的的最分明秀眉開雙眼風流著語聲

詠少年

梁吳均

董生唯巧笑子都信美目百萬市一言千金買相逐
不道參差菜誰論窈窕淑願言捧繡被來就越人宿

鄭櫻桃歌

晉書載記曰石季龍勒之從子也性殘忍勒為聘將軍郭榮之妹為妻季

龍寵惑優僮鄭櫻桃而殺郭氏更納清河崔氏櫻桃又諸而殺之櫻桃美麗擅寵宮掖樂府由是有鄭櫻桃歌

唐李頎盛

石季龍僭天祿擅雄豪美人姓鄭名櫻桃櫻桃美顏
香且澤娥娥侍寢專宮掖後庭卷衣三萬人翠眉清
鏡不得親官軍女妓一千匹繁花照耀漳河春織成
花映紅綸巾紅旗掣曳鹵簿新鳴輦走馬接飛鳥銅
馱琴瑟隨去塵鳳陽重門如意館百尺金梯倚銀漢

自言富貴不可量女為公主男為王赤花雙簾珊瑚
牀盤龍斗帳琥珀光淫昏偽位神所惡滅石諸陵終
不悟鄴城蒼蒼白露微世事翻覆黃雲飛

黃頭郎

唐李賀中

黃頭郎撈籠去不歸南浦芙蓉影愁紅獨自垂水弄
湘娥珮竹啼山露月玉瑟調青門石雲濕黃葛沙上
靡蕪花秋風已先發好持掃羅薦香出鴛鴦

○奴婢

馮子都

原作羽
林郎

漢辛延年

昔有霍家奴姓馮名子都依倚將軍勢調笑酒家胡

詳豪
華篇

秦宮詩

并序

唐李賀

中

漢人秦宮將軍梁冀之嬖奴也秦宮得寵內舍故
以驕名大諫於人予撫舊而作長辭以馮子都之
事相為對望又云昔有之詩

越羅衫袂迎春風玉刻麒麟腰帶紅樓頭曲宴仙人
語帳底吹笙香霧濃人間酒煖春茫茫花枝入簾白
日長飛牕複道傳籌飲十夜銅盤膩燭黃禿衿小袖
調鸚鵡紫繡麻霞踏哮虎斫桂燒金待曉筵白鹿青
蘇夜半煮桐英永巷騎新馬內屋深屏生色畫開門

爛用水衡錢卷起黃河向身瀉皇天厄運猶曾裂秦宮
一生花裏活鸞篋奪得不還人醉睡氍毹滿堂月

為薛嵩送紅線

潞州節度使薛嵩有青衣善彈阮咸琴又通經史嵩俾其掌篋

表號曰內記室以其手紋隱起如紅線因以名之一日辭去嵩知不可留乃廣為餞別悉集賓友夜宴中堂嵩以歌送

唐冷朝陽

中

採菱歌怨木蘭舟送客魂銷百尺樓還似洛妃乘霧

去碧天無際水東流

耿將軍守瑩青衣

唐故臺城妓

獨持巾櫛掩玄關小帳無人燭影殘昔日羅衣人化

盡白楊風起隴頭寒

哭死奴

唐劉夷道

初

丹籍生涯淺黃泉歸路深不及江陵樹千秋長作林

詩雋類函卷六十七

詩雋類函卷六十八

東吳俞安期彙纂

宣城梅鼎祚增定

關中梁希贊訂校

人部十

孝

省覲

扶持

迎親

宦情

○孝

思親操

古今樂錄曰舜遊歷山見鳥飛思親而作此歌

古辭

陟彼歷山兮崔嵬有鳥翔兮高飛瞻彼鳩兮徘徊河水洋洋兮清泠深谷鳥鳴兮嚶嚶設置張罟兮思我父母力耕日與月兮往如馳父母遠兮吾將安歸

南咳

晉束皙

南陔孝子相戒以養也

循彼南陔言采其蘭眷戀庭闈心不遑安彼居之子
罔或游盤馨爾夕膳潔爾晨餐循彼南陔厥草油油
彼居之子色思其柔眷戀庭闈心不遑留馨爾夕膳
潔爾晨羞有獺有獺在河之浹凌波赴汨噬魴捕鯉
嗷嗷林鳥受哺于子養隆敬薄惟禽之似最增爾虔
以介丕祉

白華

白華孝子之潔白也

白華朱萼被於幽薄粲粲門子如磨如錯終晨三省

匪惰其恪白華絳趺在陵之陬子溝切蓊蓊士子涅而

不渝竭誠盡敬覺覺忘劬白華玄足在丘之曲堂堂

處子無營無欲鮮侔晨葩莫之點玷辱

周詩 并序

晉夏侯湛

叙曰周詩者南陔白華華黍由庚崇丘由儀六篇

有其義而亡其辭湛續其亡故云周詩也

既殷斯虔仰說洪恩夕定晨省奉朝侍昏宵中告退

雞鳴在門孳孳恭誨夙夜是敦世說曰夏侯湛作周詩成示潘安仁安仁

曰此非徒溫雅乃別見孝弟之性潘因此遂作家風詩

過姚孝子廬偶書

李商隱 晚

拱木臨周道荒廬積苦苔魚因感妾出鶴爲甲陶來
兩鬢蓬常亂雙眸血不開聖朝敦爾類非獨路人哀

○省覲

送李侍御省覲

唐宋之間初

行李戀庭闈乘輶振綵衣南登指吳服北走出秦畿
去國夏雲斷還鄉秋鴈飛旋聞郡計入更有使臣歸

送常侍舒公歸覲

唐蘇頲初

朝聞講藝餘晨省拜恩初訓曹尊庠序榮親耀里閭
朱丹華轂送斑白綺筵舒江上春流滿還應薦躍魚

送李給事歸徐州覲省

唐孫逖初

位列登青瑣還鄉復彩衣共言晨省日便是晝遊歸
春水經梁宋晴山入海沂莫愁東路遠四牡正駢駢

送崔三往密州覲省

唐王維盛

南陌去悠悠東郊不少畱同懷扇枕戀獨念倚門愁
路遶天山雪家臨海樹秋魯連功未報且莫蹈滄洲

送王五昆季覲省

唐孟浩然盛

公子戀庭闈勞歌涉海涯水乘舟楫去親望老萊歸
斜日催烏鳥清江照綵衣平生急難意遙仰鶴鴿飛

洛潭送人覲省

唐儲光義盛

清洛帶芝田東流入大川舟輕水復急別望杳如仙

細草生春岸明霞散早天送君唯一曲當是白華篇

送許拾遺恩歸江寧拜親

唐岑參盛

詔書下青瑣駟馬還吳洲束帛仍賜衣恩波漲滄流
微祿將及親向家非遠遊看君五斗米不謝萬戶侯
適出西掖垣如到南徐州歸心望海日鄉夢登江樓
大江盤金陵諸山橫石頭楓樹隱茅屋橘林繫漁舟
種藥疏故畦釣魚垂舊鉤對月京口夕觀濤海門秋
天子憐諫官論事不肯休早來丹墀下高駕無淹留

送裴校書從大夫淄川覲省

唐岑參盛

尚書東出守愛子向青州一路通關樹孤城近海樓

懷中江橘熟倚處戟門秋更奉輕軒去知君無客愁

送樊侍御使丹陽便覲

唐岑參盛

卧病窮巷晚忽驚驄馬來知君京口去借問幾時回
驛舫江風引鄉書海鴈催慈親應倍喜愛子在霜臺

送張郎中赴隴右覲省卿公

唐岑參盛

中郎鳳一毛世上獨賢豪弱冠已銀印出身唯寶刀
還家卿月迴度隴將星高幕下多相識邊書醉懶操

送李明府赴睦州便拜覲太夫人

唐岑參盛

手把銅章望海雲夫人江上泣羅裙嚴灘一點舟中
月萬里煙波也夢君

送王孝廉觀省

唐李白盛

彭蠡將天合姑蘇在日邊寧親候海色欲動孝廉船
窈窕晴江轉參差遠岫連相思無晝夜東泣似長川

送許八拾遺歸江寧觀省

甫昔時嘗客遊此縣於許生處乞瓦棺寺

維摩圖樣志諸篇末

唐杜甫盛

詔許辭中禁慈顏赴北堂聖朝新孝理祖席倍輝光
內帛擊偏重宮衣著更香淮陰新夜驛京口渡江航

春隔雞人晝秋期燕子涼

一作竹引趨庭曙山添弱枕涼

賜書誇父

老壽酒樂城隍

一作十年過父老幾日賽城隍

看盡曾饑渴追蹤恨

淼茫虎頭金粟影神妙獨難忘

送韓十四江東省觀

唐杜甫盛

兵戈不見老萊衣歎息人間萬事非我已無家尋弟
妹君今何處訪庭闈黃牛峽靜灘聲轉白馬江寒樹
影稀此別應須各努力故鄉猶恐未同歸

送張七判官還京觀省

唐劉長卿中

春蘭方可採此去葉初齊函谷鶯聲裏秦山馬首西
庭闈新柏署門館舊桃蹊春色長安道相隨入禁闈
送外甥范勉赴任常州長史兼觀省

唐錢起中

憐君展驥去能解倚門愁就養仍榮祿還鄉即晝遊

橘花低客舍，尊菜繞歸舟。與報垂綸叟，知吾世網留。
送田倉曹歸覲

唐錢起

青絲絡驄馬，去府望梁城。節下趨庭處，秋來懷橘情。
別筵寒日晚，歸路碧雲生。千里相思夜，愁看新月明。
送陳供奉恩敕放歸覲省

唐錢起

得意今如此，清光不可攀。臣心堯日下，鄉思楚雲間。
楊柳依歸棹，芙蓉棲舊山。采蘭兼衣錦，何似買臣還。
送韋信愛子歸覲

唐錢起

離舟解纜到斜暉，春水東流燕北飛。才子學詩趨露冕，
冕棠花含笑，侍斑衣。稍聞江樹啼猿近，轉覺山林過
客稀。借問還珠盈合浦，何如鯉也入庭闈。

送鄂州張別駕襄陽覲省

唐司空曙

蒼蒼峴亭路，臘日漢陽春。帶雪半山寺，行沙隔水人。
王祥因就宦，萊子不違親。正恨殊鄉別，千條楚柳新。
劉侍御朝命許停官歸侍

唐皇甫冉

孟孫唯問孝，萊子復辭官。幸遂温清所，其甘稼穡難。
採芝供上藥，拾槿奉晨餐。棟裏雲藏雨，山中暑帶寒。
非時應有筍，閒地盡生蘭。賜告承優老，長筵永日歡。

送李萬州赴饒州覲省

唐皇甫冉

前程歡拜慶，舊館惜招攜。荀氏風流日，胡家清白齊。

川迴吳岫失塞闊楚雲低舉目親魚鳥驚心怯鼓鼙
人稀漁浦外灘淺定山西無限青青草王孫去不迷

送馬尚書郎君侍從歸觀太原唐盧綸中

玉人垂玉鞭百騎帶秦鞵從賞野郵靜獻新秋果鮮
塞屯豐雨雪虜帳失山川遙想稱觴後唯當共被眠

送衛司法河中觀省卽故王吏部
延昌外甥

唐盧綸中

出身因強學不以外家榮年少無遺事官閑有政聲
曉山臨野渡落日照軍營共賞高堂下連行弟與兄

送李尚書郎君昆季侍從歸觀滑州

唐盧綸中

鳳雛聯翼美王孫綵服戎裝擬塞垣金鼎對筵調野
膳玉鞭齊騎引行軒冰河一曲旌旗滿墨詔千峰雨
露繁更說務農將罷戰敢持歌頌慶晨昏

送內弟韋宗仁歸信州觀省唐盧綸中

常嗟外族弟兄稀轉覺心孤是送歸醉掩壺觴人有
淚夢驚波浪日無輝烹魚綠斲煙迷草摘橘青谿露
濕衣聞說江樓長卷幔幾迴風起望胡威

送恒操上人歸江外觀省法東唐盧綸中

依佛不違親高堂與寺鄰問安雙樹曉求膳一僧貧

持呪過龍廟翻經化海人還同慧休去儒者亦露中

送太常蕭博士棄官歸養赴東都時元兄罷相為少師仲兄

為師官並分司洛邑唐劉禹錫中

兄弟盡鴛鴦歸心切問安貪榮五綵服遂挂兩梁冠

侍膳曾調鼎循咳更握蘭從今別君後長憶德星看

送國子令狐博士赴興元觀唐劉禹錫中

相門學子高陽族才省清資五品官諫院過時榮棣

萼謝庭歸去踏芝蘭山頭花帶煙霞晚棧底江涵雪

水寒伯仲到家人盡賀柳營蓮府遞相歡

送魏廣下第揚州覲省唐李端中

遊宦今空返浮淮一鴈秋白雲陰澤國青草遶揚州

調膳過花下張筵到水頭崑山仍有玉歲晏莫淹留

送李舍人攜家歸江東覲省唐韓翃中

二十青宮吏成名似者稀承顏陸郎去攜手謝娘歸

夜月迴孤燭秋風試夾衣扁舟楚水上來徃速如飛

送盧弘本浙東覲省唐張祐中

東望故山高秋歸值小舸懷中陸續橘江上伍員濤

好去寧雞口加餐及蠓蟻知君思無倦為我續離騷

送崔端公郎君入京覲省唐權德輿中

已見風姿美仍聞藝業勤清秋上國路白晳少年人

帶月輕帆疾迎霜綵服新過庭若有問一為說漳濱
送劉式洛中觀省 唐賈島中

晴峰三十六侍立上春臺同宿別離恨共看星月迴
野鶯臨苑語河棹歷江來便寄相思札緘封花下開
送鄭大台文南觀 唐李商隱晚

黎辟灘聲五月寒南風無處附平安君懷一匹胡威
絹爭拭酬恩淚得乾

送曾德邁歸寧宜春 唐曹鄴晚
湘東山水有清輝袁水詞人得意歸幾府爭馳毛義
檄一鄉看侍老萊衣筵開灞岸臨清淺路去藍關入

翠微想到宜陽更無事併將歡慶奉庭闈

奉和送羊振文桂陽歸覲 唐顏萱晚

高挂吳帆喜動容問安歸去指湘峰懸魚庭內芝蘭
秀馭鶴門前薜荔封紅旆正憐棠影茂綵衣偏帶桂
香濃臨岐獨有霑襟戀南巷當年共化龍

送羊振文先輩往桂陽歸覲 唐陸龜蒙晚

風雅先生去一麾過庭才子趣歸期讓王門外開帆
葉義帝城中望戟枝郢路漸寒飄雪遠湘波初暖漲
雲遲靈均精魄如能問又得千年賈傅詞

奉和送羊振文先輩往桂陽歸覲 唐皮日休晚

桂陽新命下丹墀彩服行當欲雪時登第已聞傳襪
賦問安猶聽講韓詩竹人臨水迎符節風母穿雲避
信旗無限湘中悼騷恨憑君此去謝江離

○扶侍

送王十五判官扶持還黔中得開字

唐杜甫盛

大家東征逐子回風生洲渚錦帆開青青竹笋迎船
出白白江魚入饌來離別不堪無限意艱危須仗濟
時才黔陽信使應稀少莫怪頻頻勸酒杯

送張羽扶持之睦州

此公舊在建德令

唐劉長卿中

遙憶新安舊扁舟復却還淺深看水石來往逐雲山
入縣餘花在過門故柳閑東征隨子去偕隱薜蘿間

送嚴士良侍奉詹事南遊

唐錢起中

疏傳獨知止曾參善愛親江山侍行邁長幼出囂塵
握手想千古此心能幾人風光滿長陌草色傍征輪
日夕望荆楚鸞鳴芳杜新漁煙月下淺花嶼水中春
點翰遙相憶含情向白蘋

送李戎扶持往壽安

唐賈島中

二千餘里路一半是波濤未曉著衣起出城逢日高
關山多寇盜扶持帶弓刀臨別不揮淚誰知心鬱陶

送唐州崔使君侍親赴任 唐白居易中

連持使節歷專城獨賀崔侯最慶榮
烏府一拋霜簡去朱輪四從板輿行
發時正許沙鷗遠到日方乘竹馬迎
唯慮郡齋賓友少數杯春酒共誰傾

○迎親

奉送李賓客荆南迎親 唐岑參盛

迎親辭望苑恩詔下儲闈昨見雙魚去
今看四馬歸驛帆湘水闊客舍楚山稀
手把黃香扇身披萊子衣鵲隨金印喜
烏傍板輿飛勝作東征賦還家滿路輝

送李賓客荆南迎親 唐獨孤及盛

宗室劉中壘文場謝客兒當為天北斗
曾使海西陲毛節精誠著銅樓羽翼施
還申供帳別言赴倚門期恩渥霑行李
晨昏在路岐君親兩報遂不敢議傷離
送申屠正字往湖南迎親兼謁趙和州
因呈上侍郎使君并戲簡前歷陽李明府

唐盧綸中

曉月瞳朦映水關水邊因到歷陽山
千艘財貨朱橋下一曲閭闔青荻間
坦腹定逢潘令醉上樓應伴庾公閑
歡餘若問南行計知念天涯負米還

○宦情

據地歌

東方朔為郎常侍中人皆以為狂朔曰如朔所謂避世于朝廷間者也古之人

乃避世於深山中時坐席中酒酣據地歌曰

漢東方朔

陸沈於俗避世金馬門宮殿中可以避世全身何必深山之中蒿蘆之下

吳王郎中時從梁陳作

晉陸機

在昔蒙嘉運矯迹入崇賢假翼鳴鳳條濯足升龍淵
玄冕無醜士冶服使我妍輕劍拂盤厲一作長纓麗
且鮮誰謂伏事淺契闊踰三年薄言肅後命改服就
藩臣夙駕尋清軌遠遊越梁陳感物多遠念慷慨懷
古人

荅弘農故吏民

晉孫楚

昔我先侯邁德垂化康哉之詠寔出良佐惟余忝辱
弗克負荷每歷貴邦仰瞻泰華追慕先軌感想哀嗟
誥誥臣故爰及羣士皓首老成率彼邑里闡崇高義
長幼以齒

在懷縣作二首

晉潘岳

南陸迎脩景朱明送末垂初伏啓新節隆暑方赫曦
朝想慶雲興夕遲白日移揮汗辭中宇登城臨清池
涼颼自遠集輕襟隨風吹靈圃耀華果通衢列高椅
瓜瓞蔓長苞薑芋芬廣畦稻栽肅阡阡黍苗何離離

人音 卷之八
虛薄之時用位微名日卑驅役宰兩邑政績竟無施
自我違京輦四載迄於斯器非廊廟姿屢出固其宜
徒懷越鳥志眷戀想南枝

春秋代遷逝四運紛可喜寵辱易不驚戀本難爲思
我來冰未泮時暑忽隆熾感此還期淹歎彼年往駛
登城望郊甸游日歷朝寺小國寡民務終日寂無事
白水過庭激綠槐夾門植信美非吾土祇攪懷歸志
眷然顧輦洛山川邈離異願言還舊鄉畏此簡書忌
祇奉社稷守恪居處職司

河陽縣作二首

晉潘岳

微身輕蟬翼弱冠忝嘉招在疚妨賢路再升上宰朝
猥荷公叔舉連陪測王寮長嘯歸東山擁耒耨時苗
幽谷茂纖葛峻巖敷榮條落英隕林趾飛莖秀陵喬
卑高亦何常升降在一朝徒恨良時泰小人道遂消
譬如野田蓬幹流隨風飄昔倦都邑遊今掌河朔徭
登城眷南顧凱風揚微綃洪流何浩蕩脩芒鬱岩堯
誰謂晉京遠室邇身實遼誰謂邑宰輕令名患不劭
人生天地間百年孰能要頰一作如槁一作石火瞥
若截道飈齊都無遺聲桐鄉有餘謠福謙在純約害
盈由矜驕雖無君人德視民庶不怵

日夕陰雲起登城望洪河川氣冒山嶺驚湍激巖阿
歸鴈映蘭時游魚動圓波鳴蟬厲寒音時菊耀秋華
引領望京室南路在伐柯大厦緬無覲崇芒鬱嵯峨
總總都邑人擾擾俗化訛依水類浮萍寄松似懸蘿
朱博糾舒慢楚風被琅邪曲蓬何以直託身依叢麻
黔黎竟何常政成在民和位同單父邑愧無子賤歌
豈敢陋微官但恐忝所荷

擬古二首

宋鮑照

魯客事楚王懷金襲丹素既荷主人恩又蒙令尹顧

日宴罷朝歸輿

一作鞍

一作馬塞衢路宗黨生光輝

華

一作賓

賓

僕遠傾慕富貴人所欲道得亦何懼南國有儒生迷
方獨淪誤伐木清江湄設置守龜兔

十五諷詩書篇翰靡不通弱冠參多士飛步遊秦宮
側覩君子論預見古人風兩說窮舌端五車摧筆鋒
羞當白璧貺耻受聊城功晚節從世務乘障遠和戎
解珮襲犀渠卷袞奉盧弓始願力不及安知今所終

和蕭中庶直石頭

齊謝朓

九河亘積岨三巖鬱旁眺皇州總地德回江欵巖微
井幹艷蒼林雲薨蔽層嶠川霞旦上薄山光晚餘照
翔集亂歸飛虹蜺紛引曜君子奉神畧瞰迴憑重峭

彈冠已籍甚升車益英妙功存漢冊書榮並周庭燎
汲疾移偃息董園倚談笑麾旆一悠悠謙姿光且劭
讌嘉多暇日興文起淵調曰余廁鱗羽滅影從漁釣
澤渥資投分逢迎典待詔詠沼邈含毫專城空坐嘯
徒慚皇鑒揆終延曲士誚方追隱淪訣偶解金丹要
若偶巫咸招帝閭良可叫

始出尚書省

齊謝朓

惟昔逢休明十載朝雲陛既通金閨籍復酌瓊筵醴
宸景厭昭臨昏風淪繼體紛虹亂朝日濁河穢清濟
防口猶寬政餐茶更如薺英袞暢人謀文明固天啟

青精翼紫軼黃旗映朱邸還覩司隸章復見東都禮
中區咸已泰輕生諒昭洒音洗趨事辭宮闕載筆陪旌
祭邑里向疎蕪寒流自清泚衰柳尚沈沈凝露方泥
泥零落悲友朋歡娛燕兄弟既秉丹石心寧流素絲
涕因此得蕭散垂竿深澗底

宣城郡內登望

齊謝朓

借問下車日匪直望舒圓寒城一以眺平楚正蒼然
山積陵陽阻谿流春穀泉威紆距遙甸巉岳帶遠天
切切陰風暮桑柘起寒煙悵望心已極恟怳魂屢遷
結髮倦爲旅平生早事邊誰規鼎食盛寧要狐白鮮

方棄汝南諾言稅遼東田

冬日晚郡事隙

齊謝朓

案牘時閒暇偶坐觀卉木颯颯滿池荷
條條蔭牕竹簷隙自周流房櫳閑且肅
蒼翠望寒山崢嶸瞰平陸已惕慕歸心
復傷千里日風霜旦夕甚蕙草無芬馥
云誰美笙簧孰是厭適軸願言稅逸駕
臨潭餌秋菊

示吏民

梁元帝

闕里尚撫謙厲鄉裁知足咨余再分陝
少思宜寡欲霞出浦流紅苔生岍泉綠
方知江漢士變爲鄒魯俗擬陸平原機
羈宦

梁江淹

儲后降嘉命恩紀被微身明發眷桑梓
永歎懷密親流念辭南澨銜怨別西津
驅馬遵淮泗旦夕見梁陳服義追上列
矯迹厠宮臣朱黻咸髦士長纓皆俊民
契濶承華內綢繆踰歲年日暮聊總駕
逍遙觀洛川殂歿多拱木宿草凌寒煙
遊子易感慨躑躅還自憐願言寄三鳥
離思非徒然

上虞鄉亭觀濤津渚學潘安仁河陽縣作

梁劉孝綽

昔余筮賓始衣冠仕洛陽無貴徒有任一命
忝爲郎再踐神仙側三入崇賢旁東朝禮髦俊
虛薄厠才良

遊談侍名理，擗管創文章。引籍陪下膳，橫經參上庠。
誰謂服事淺，契闊變炎涼。一朝謬為吏，結綬去承光。
烹鮮徒可習，一作惜治民終未長。化雞仰季智，馴雉推
仲康。魯恭字仲康此城鄰夏穴，櫛蠹茂筠篁。孝碑黃絹語，
神濤白鷺翔。遨遊佳可望，釋事上川梁。秋江凍雨絕，
反景照移塘。織羅殊未動，駭水忽如湯。乍出連山合，
時如高蓋張。漂沙黃沫聚，礪石素波揚。榜人不敢唱，
舟子詎能航。離家復臨水，眷然思故鄉。中來不可絕，
奕奕苦人腸。汧洄若無阻，謝病反清漳。

古意

北齊顏之推

十五好詩書，二十彈冠仕。楚王賜顏色，出入章華裏。
作賦凌屈原，讀書誇左史。數從明月讌，或侍朝雲祀。
登山摘紫芝，泛江採綠芷。歌舞未終曲，風塵暗天起。
吳師破九龍，秦兵割千里。狐兔穴宗廟，霜露沾朝市。
壁入邯鄲宮，劒去襄城水。未獲殉陵墓，獨生良足耻。
憫憫思舊都，惻惻懷君子。白髮闕明鏡，憂傷沒余齒。

擬古

唐徐彥伯初

讀書三十載，馳騫周六經。儒衣干時主，忠策獻闕庭。
一朝奉休盼，從容廁羣英。束身趨建章，秉筆坐承明。
解署相填噎，寮吏紛縱橫。五日休澣時，屠蘇繞玉屏。

橘花覆北沼桂樹交西榮樹棲兩鴛鴦含春向我鳴
皎潔綺羅艷便娟絲管清擾擾天地間出處各有情
何必巖石下枯槁閑此生

荊州作二首

唐張九齡初

先達志其大求意不約文士伸在知己已况仕於君
微誠夙所尚細故不足云時來忽易失事往良難分
顧念凡近姿焉欲殊常勲亦以行則是豈必素有聞
千慮且猶跌萬緒何其紛進士苟非黨免相安得羣
衆口金可鑠孤心絲共焚意忠仗朋信語勇同敗軍
古劍徒有氣幽蘭祇自薰高秩向所忝於義如浮雲

二

千載一遭遇徃賢所至難問余奚爲者無階忽上搏
明聖不世出翼亮非苟安崇高自有配孤陋何足干
遇恩一時來竊位三歲寒誰謂誠不盡知窮力亦殫
雖致召乘寇初無挾術鑽浩蕩出江湖翻覆如波瀾
心傷不材樹自念獨飛翰狗義在匹夫報恩猶一餐
况乃山海澤效無毫髮端內訟已慙沮積毀今摧殘
胡爲復惕息傷鳥畏虛彈

在郡秋懷二首

唐張九齡初

秋風入前林蕭瑟鳴高枝寂寞遊子思寤歎何人知

宦成名不立志存歲已馳五十而無聞古人深所疵
平生去外飾直道如不羈未得操割效忽復寒暑移
物情自古然身退毀亦隨悠悠滄江渚望望白雲涯
露下霜且降澤中草離披蘭艾若不分安用馨香爲
二
庭蕪生白露歲候感遐心策蹇慙遠途巢枝思故林
小人恐致寇終日如臨深魚鳥好自逸池籠安所欽
挂冠東都門採蕨南山岑議道誠愧昔覽分還慙今
憮然憂成老空爾白頭吟

爲郡

并序

唐張九齡

初

忝官二十年盡在內職及爲郡嘗積戀因賦詩焉
江流去朝宗晝夜茲不舍仲尼在川上子牟存闕下
聖達有由然孰是無心者一郡苟能化百城豈云寡
愛禮誰爲羊戀主吾猶馬感初時不載思奮翼無假
閑宇嘗自閉沈心何用寫攬衣步前庭登陴臨曠野
白水出迢遞清風寄瀟灑願言采芳澤終朝不盈把
在洪州荅綦母學士

唐張九齡

初

旬雨不愆期由來自若時爾無言郡政吾豈欲天欺
常念涓塵益惟歡草樹滋課成非所擬人望在東菑

岳州作二首

說爲文屬思精壯世所不逮旣謫岳州而詩益凄惋人謂得江山助

唐張說初

水國生秋草離居再及瓜山川臨洞穴風日望長沙
物土南州異關山北信賒日昏聞怪鳥地熱見脩蛇
遠人夢歸路瘦馬嘶去家正有江潭月徘徊戀九華
夜夢雲闕間從容簪履列朝遊洞庭上緬望京華絕
潦收江未清火退山更熱重欵視欲醉憎滿氣如噎
器留魚鱉腥衣點蚊蚋血髮白思益壯心玄用彌拙
冠劍日苔蘚琴書坐廢撤唯有報恩字刻意長不滅

岳州行郡竹籬

唐張說初

山郡不溝郭荒居無繫壅愛人忠主利善守閉為勇
苟非小勤瘁安得其逸寵板築恐土疎襲城嫌役重
藩柵聊可固筠篁近易奉差池截浦沙繚繞緣隈隴
矗似長雲亘森如高戟聳預絕豺狼憂知免牛羊恐
閭里寬矯步榛藂恣踏踵始果遊處心終日成閑拱

相州冬日早衙

唐張說初

城外宵鐘斂閨中曙火殘朝光曜庭雪宿凍聚池寒
正色臨廳事疑詞定筆端除苛囹圄息伐枳吏人寬
河內功猶淺淮陽疾未安鏡中星髮變頓使世情闌
陪燕公行郡竹籬

唐趙冬曦初

良臣乃國楨麾守去承明外戶人無閉浮江獸已行
隨來晉盜逸民化蜀風清郭郭從彝典州閣荷德聲
小人被天渥流宅巴丘城所賴中和正優游鑿與耕

至桃林塞作

唐崔湜 初

去國未千里離家已再旬丹心恒戀闕白首更辭親
懷璧嘗貽訓捐金詎得鄰抱冤非忤物罹謗豈尤人
不濫辭終辨無瑕理竟申黻還中省舊符與外臺新
塞上同遷客江潭異逐臣淚垂非屬峴腸斷固由秦
歲月行道盡山川難重陳始知亭伯去還是拙謀身

翰林讀書言懷呈集賢院內諸學士

唐李白 盛

晨起紫禁中夕待金門詔觀書散遺帙探古窮至妙
片言苟會心掩卷忽而笑青蠅易相點白雪難同調
本是疎散人屢貽福促誚雲天屬清朗林壑憶遊眺
或時清風來閒倚闌干嘯嚴光桐廬谿謝客臨海嶠
功成謝人間從此一投釣

效古

唐李白 盛

朝入天苑中謁帝蓬萊宮青山映輦道碧樹搖煙空
謬題金閨籍得與銀臺通待詔奉明王抽毫頌清風
歸時落日晚躑躅浮雲馳人馬本無意飛馳自豪雄

入門紫鴛鴦金井雙梧桐清歌絃古曲美酒沽新豐
快意且爲樂列筵坐羣公光景不可留生世如轉蓬
早達勝晚遇羞比垂釣翁

官定後戲贈

唐杜甫盛

不作西河尉淒涼爲折腰老夫怕趨走率府且逍遙
耽酒須微祿狂歌託聖朝故山歸興盡回首向風颺

封丘縣

唐高適盛

我本漁樵孟諸野一生自是悠悠者乍可狂歌草澤
中寧堪作吏風塵下祗言小邑無所爲公門百事皆
有期拜迎官長心欲碎鞭撻黎庶令人悲歸來向家
問妻子舉家盡笑今如此生事應須南畝田世情付
與東流水夢想舊山安在哉爲銜君命日遲迴乃知
梅福徒爲爾轉憶陶潛歸去來

封丘作

唐高適盛

州縣才難適雲山道欲窮揣摩慙黠吏棲隱謝愚公

衙郡守還

唐岑參盛

世事何反覆一身難可料頭白翻折腰歸家私自笑
所嗟無產業妻子嫌不調五斗米留人東谿憶垂釣
初至犍爲作

唐岑參盛

山色軒檻內灘聲枕席間草生公府靜花落訟庭閑

唐岑參盛

雲雨連三峽風塵接百蠻到來能幾日不覺鬢毛斑
初授官題高冠草堂

唐岑參盛

三十始一命宦情都欲闌自憐無舊業不敢耻微官
澗水吞樵路山花醉藥欄祗緣五斗米辜負一漁竿
題虢州西樓

唐岑參盛

錯料一生事蹉跎今白頭縱橫皆失計妻子也堪羞
明主雖然棄丹心亦未休愁來無去處祗上郡西樓
永嘉作

唐張子容盛

拙宦從江左投荒更海邊山將孤嶼近水共惡谿連
地濕梅多雨潭蒸竹起煙未應悲晚髮炎瘴苦華年

涼風原上作

唐王昌齡盛

陰岑宿雲歸煙霧濕松柏風淒日初晚下嶺望川澤
遠山無遺明秋水千里白佳氣盤未央聖人在凝碧
關門阻天下信是帝王宅海內方晏然廟堂有奇策
時貞守全運罷去游說客余忝蘭臺人幽尋免貽責

忝官引

唐元結盛

天下昔無事僻居養愚鈍山野性所安熙然自全順
忽逢暴兵起問巷見軍陣將家瀛海濱自棄同芻糞
往在乾元初聖人啓休運公車詣魏闕天子垂清問
敢誦王者箴亦獻當時論朝廷愛方直明主嘉忠信

屢授不次官曾與專征印兵家未曾學榮利非所徇
偶得兇醜降功勞愧分寸爾來將四歲慙耻言可盡
請取寃者辭爲吾忝官引寃辭何者苦萬邑餘灰燼
寃辭何者悲生人盡鋒刃寃辭何者甚力役遇勞困
寃辭何者深孤弱亦哀恨無謀救寃者祿位安可近
而可愛軒裳其心又干進此言非所戒此言敢貽訓
實欲辭無能歸耕守吾分

和大夫秋夜書情卽事

唐獨孤及

上畧當分閫高情善閉關忘機羣動息無戰五兵閑
鈴閣風傳漏書牕月滿山方知秋興作非惜二毛斑

縣中池竹言懷

唐錢起

官小志已足時清免負薪卑棲且得地榮耀不關身
自愛賞心處叢篁流水濱荷香度高枕春色滿南鄰
道在卽爲樂機忘寧厭貧却愁丹鳳詔來訪漆園人

題張藍田訟堂

唐錢起

角中高枕向晴山訟簡庭空不用關秋風牕下琴書
靜夜一作落景門前人吏閑稍覺淵明歸思遠東臯月
出片雲還

新昌里言懷

唐錢起

性拙偶從宦心閑多掩扉雖看北堂草不忘舊山薇

花月霽來好雲泉堪夢歸如何建章漏催著早朝衣

縣齋

唐韋應物中

仲春時景好草木漸舒榮公門且無事微雨園林清
泱泱水泉動欣欣衆鳥鳴閑齋始延矚東作興庶旡
卽事翫文墨抱冲披道經於焉日澹泊徒使芳樽盈

郡內閑居

唐韋應物中

棲息絕塵侶孱鈍得自怡腰懸竹使符心與一作廬
山緇永日一酣寢起坐兀無思長廊獨看雨衆藥發
幽姿今夕已云罷明晨復如斯何事能爲累寵辱豈
要辭

晚出府舍與獨孤兵曹令狐士曹南尋朱雀街

歸里第

唐韋應物中

分曹幸同簡聯騎方愜素還從廣陌歸不覺青山暮
翻翻鳥未沒杳杳鐘猶度尋草遠無人望山多枉路
聊參世士跡嘗得靜者顧出入雖見牽忘身緣所一作

明晤

高陵書情寄三原盧少府

唐韋應物中

直方難爲進守此微賤班開卷不及顧沈埋案牘間
兵凶久一作互相踐徭賦豈得閑促戚下可哀寬政身
致患日夕思自退出門望故山君心儻如此攜手相

與還

歲日寄京師諸李端武等

唐韋應物中

獻歲抱深惻僑居念歸緣常患親愛離始覺世務牽
少事河陽府晚守淮南壩平生幾會散已及蹉跎年
昨日罷符竹家貧遂留連部曲多已去車馬不復全
閑將酒爲偶默以道自詮聽松南巖寺見月西澗泉
爲政無異術當責豈望遷終理來時裝歸鑿杜陵田
登郡寄京師諸李淮南子弟 唐韋應物中
始罷永陽守復卧潯陽樓懸檻飄寒雨危堞侵江流
迨茲聞鴈夜重憶別離秋徒有盈樽酒鎮此百端憂

郡齋贈王卿

唐韋應物中

無術謬稱簡素餐空自嗟秋齋雨成滯山藥寒始華
溲落人皆笑幽獨歲逾賒唯君出塵意賞愛似山一作
僧家

縣內閑居贈溫公

唐韋應物中

滿郭春風嵐已昏鷓鴣散吏掩重門雖居世網常清
淨夜對高僧無一言

任洛陽丞荅前長安由少府問

唐韋應物中

相逢且對酒相問欲何如數歲猶卑吏家人笑著書
告歸應一作未得榮宦又知疎日日生春草空令憶

舊居

示從子河南尉班

并序

唐韋應物

中

永泰中余任洛陽丞以撲扶軍騎時從子河南尉班亦以剛直為政俱見訟於居守因詩示意府縣好我者豈曠斯文

拙直余恒守公方爾所存同占朱雀尅俱起小人言立政思懸棒謀身類觸藩不能林下去祇戀府庭恩

諷古

唐劉禹錫

中

簿領乃俗士清談信古風吾觀蘇令綽朱墨一何工

郡齋讀經

唐羊士諤

中

壯齡非濟物柔翰誤為儒及此齋心暇翛然與道俱散材誠獨善正覺豈無徒半偈蓮生水幽香桂滿爐息陰慙蔽芾講義得醍醐跡似桃源客身嬰竹使符華夷參吏事巴漢混州圖偃草懷君子移風念嗇夫翳桑俄有績宿麥復盈租圓寂期超詣凋殘幸已蘇解空囊不智滅景谷何愚幾日遵歸轍東菑始欲蕪

資陽郡中詠懷

唐羊士諤

中

慶章非達士閉閣是潛夫匣劍寧求試籠禽但自拘江清牛渚鎮酒熟步兵廚唯此前賢意風流似不孤在郡三年今秋見白髮聊以

書事唐羊士諤

中

二毛非騎省朝鏡忽秋風
絲縷寒衣上霜華舊簡中
承明那足厭車服愧無功
日日山城守淹留豈桂叢

守郡累年俄及知命聊以言

志

唐羊士諤

中

南國疑逋客東山作老夫
登朝非大隱出谷是真愚
氣直慙龍劍心清愛玉壺
聊持循吏傳早晚口爲徒

郡中言懷寄西川蕭員外

唐羊士諤

功名無力愧勤王已近終
南得草堂身外盡歸天竺
偈腰間惟有會稽章何時
臈酒逢山客可惜梅枝亞
石牀歲晚我知仙客意懸
心應在白雲鄉

新移北廳因貽同院諸公兼呈暢博士

唐盧綸

中

華軒邇台座顧影忝時倫
弱質偃彌曠清風來亦頻
恩輝坐凌邁景物恣芳新
終乃愧吾友無容私此身

和孟處州間居卽事

唐包何

中

古郡鄰江嶺公庭半薜蘿
府寮閒不入山鳥靜偏過
睥睨臨花柳欄杆枕芰荷
麥秋今欲至君聽兩岐歌

初領郡政衙退登東樓作

唐白居易

中

鰥惇心所念簡牘手自操
何言符竹貴未免州縣勞
賴是餘杭郡臺榭遶官曹
凌晨親政事向晚恣遊遨
山冷微有雪波平未生濤
水心如鏡面千里無纖毫

直下江最闊近東樓更高煩襟與滯念一望皆遁逃

除官去未間

唐白居易中

除官去未間半月恣遊討朝尋霞外寺暮宿波上島
新樹少於松平湖半連草躋攀有次第賞翫無昏早
有時騎馬醉兀兀冥天造窮通與生死其奈吾懷抱
江山信為美齒髮行將老在郡誠未厭歸鄉去亦好

七年春題府聽

唐白居易中

潦倒守三川因循涉四年推誠廢鉤距示耻用蒲鞭
以此稱公事將何銷俸錢雖非好官職歲久亦妨賢

晚歸早出

唐白居易中

筋力年年減風光日日新退衙歸逼夜拜表出侵晨
何處臺無月誰家池不春莫言無勝地自是少閑人

初到江州寄翰林張李杜三學士唐白居易中

早攀霄漢上天衢晚落風波委世途雨露施恩無厚
薄蓬蒿隨分有榮枯傷禽側翅驚弓箭老婦低顏事
舅姑碧落三仙曾識面年深記得姓名無

昔與微之在朝日同蓄休退之心迨今十年淪

落老大追尋前約且結後唐白居易中

往子為御史伊余忝拾遺皆逢盛明代俱登清近司
予繫玉為珮子曳繡為衣從容香煙下同侍白玉墀

朝見寵者辱暮見安者危紛紛無退者相顧令人悲
宦情君早厭世事我深知常於榮顯日已約林泉期
况今各流落身病齒髮衰不作卧雲計攜手欲何之
待君女嫁後及我官滿時稍無骨肉累粗有漁樵資
歲晚青山路白首期同歸

東臺去

僕每為崔白二學士話陶先生喜不遇之事且曰僕得分司東臺即足以買山

家

唐元稹

中

陶君喜不遇予每為君言今日東臺去澄心在陸渾
旋抽隨日俸併買近山園千萬崔兼白殷勤承主恩

酬樂天得微之詩知通州事

因

唐元稹

中

平地才應一頃餘閣欄都大似巢居

已大多在山坡架木為居自號

閣欄頭也

入衙官吏聲疑鳥下峽舟船腹似魚市井無錢

論尺丈田疇付火罷耘鋤此中愁殺須甘分惟惜平

生舊著書

本句云努力安心過三考已曾愁殺李尚書又予病甚將平生所為文自題云異日

送白二十

二郎也

初入集賢院贈李獻仁曾於常山聯官

唐崔峒

中

燕代官初罷江湖路便分九遷從命薄四十幸人聞
跡愧趨丹禁身曾繫白雲何由返滄海昨日謁明君
蘇州元日郡齋感懷寄越州元相公杭州白舍

八

唐李諒

中

稱慶還鄉郡吏歸端憂明發儼朝衣首開三百六旬
曆新知四十九年非當官補拙猶勤慮遊宦量才已
息機舉族共資隨月俸一身唯憶故山薇舊交邂逅
封疆近老牧蕭條宴賞稀書札每來同笑語篇章時
到借光輝絲綸暫厭分符竹舟楫初登擁羽旗未知
今日情何似應與幽人事有違

武功縣中作

唐姚合

中

縣去帝城遠為官與隱齊馬隨山鹿放雞雜野禽棲
遶舍惟藤架侵堦是藥畦更師嵇叔夜不擬作書題

二

微官如馬足祗是在泥塵到處貧隨我終年老趣人
簿書銷眼力杯酒耗心神早作歸休計深居養一作
此身

三

簿書多不會薄俸亦難消醉卧慵開眼閑行懶繫腰
移花兼蝶至買石得雲饒且自心中樂從他笑寂寥

四

曉鐘驚睡覺事事便相關小市柴薪貴貧家砧杵閑
讀書多旋忘賒酒數空還長羨劉伶輩高眠出世間

五

性疎常愛卧親故笑悠悠縱出多攜枕因衙始裹頭
上山彌覺老過寺暫忘愁三考千餘日低腰不擬休

六

客至皆相笑詩書滿卧牀愛閑求病假因醉棄官方
鬢髮寒唯短衣衫瘦漸長自嫌多檢束不似舊來狂

七

一日看除日終年損道心山宜衝雪上詩好帶風吟
野客嫌知印家人笑買琴只應隨分過一作是錯
彌深

八

窮達天應與人間事莫論微官從似客遠縣豈勝村
竟日多無食連宵不閉門齋心調筆硯唯寫五千言

九

縣僻仍牢落遊人到便迴路當邊地去村入郭門來
酒戶愁偏長詩情病不開可曾衙小吏恐謂踏蒼苔

十

自下青山路三年著綠衣官卑食肉僭才短事人非
野客教長醉高僧勸却歸不知何計是免與本心違

十一

野客教長醉高僧勸却歸不知何計是免與本心違

日出方能起庭前看種莎吏來山鳥散酒熟野人過
岐路荒城少煙霞遠縣多同官數相引下馬上西坡

十二

作吏荒城裏窮愁欲不勝病多唯識藥年老漸親僧
夢覺空堂月詩成滿硯冰故人多得路寂寞不相稱

十三

朝朝眉不展多病怕逢迎引水遠通澗疊山高過城
秋燈照樹色寒雨落池聲好是吟詩夜披衣坐到明

十四

簿籍誰能問風寒趁早眠每旬常乞假隔月探支錢

一作請
官錢

還往嫌詩癖親情恠酒顛謀身須上計終久

是歸田

十五

腥羶都不食稍稍覺神清夜犬因風吠鄰雞帶雨鳴
守官常卧病學道別稱名小有洞中路誰能引我行

十六

假日多無事誰知我獨忙移山入縣宅種竹上城墻
驚蝶遺花蘂遊蜂帶蜜香唯愁明早出端坐吏人傍

十七

門外青山路因循自不歸養生宜縣僻說品喜官微

淨愛山僧飯閑披野客衣唯憐幽谷鳥不解入城飛

十八

一官無限日愁悶欲何如掃舍驚巢燕尋方落壁魚

十九

朝朝門不閉長似在山時賓旅抽書讀兒童斫竹騎
久貧還易老多病懶能醫道友應相恠休官日已遲

二十

主印三年坐山家百事休焚香開敕庫踏月上城樓
飲酒多成病吟詩易長愁殷勤問漁者暫借手中鉤

二十一

自知狂僻性吏事固相疎祗自看山立無因出縣居
印朱沾墨硯戶籍雜經書月俸尋常請無妨乏斗儲

二十二

作吏無能事為文舊致功詩標八病外心落百憂中
拜別登朝客歸依鍊藥翁不知還往內誰與此心同

結綬鄆郊廩攝府署偶有

白詠

唐鄭谷

晚

鶯離寒谷士逢春釋褐來年暫種芸自笑老為梅少
府可堪貧攝鮑參軍酒醒往事多興念吟苦鄰居必
厭聞推却簿書搔短髮落花飛絮正紛紛

春日隱居官舍感懷

唐李洞

晚

人音 卷之十八
風吹燒燼雜汀沙還似青谿舊寄家
入戶竹生牀下
葉隔牕蓮謝鏡中花
苔房毳客論三學
雪嶺巢禽看
兩衙銷得人間無限事
江亭月白誦南華

登郡樓書懷

唐劉兼晚

莫嗔阮氏哭途窮
萬代深沈恨亦同
瑞玉豈知將抵
鵠鉛刀何事却屠龍
九夷欲適嗟吾道
五柳終歸効
古風獨倚郡樓無限意
滿江煙雨正冥濛

冬暮城西晚眺

唐羅隱晚

謬忝蓮華幕
虛沾柏署官
歎危長抱疾
衰老不禁寒
時事已日過
世途行轉難
千崖兼萬壑
只向望中看

和諫議罷郡叙懷六韻

唐陸龜蒙晚

已報東吳政
初捐左契歸
天應酬苦節
人不犯寒威
江上思重借
朝端望載饑
紫泥封夜詔
金殿賜春衣
對酒情何遠
裁詩思極微
待升鎔造日
江海問漁扉

詩雋類函卷六十八

詩雋類函卷六十九

東吳俞安期彙纂 宣城梅鼎祚增定

關中梁應基訂校

人部十一

棄官 遭讒 貶謫 流徙 奔亡

○棄官

不調歸東川別業

唐李頎盛

寸祿言可取託身將見遺
慙無匹夫志悔與名山辭
綬冕謝知己林園多後時
葛巾方濯足蔬食但垂帷
卜室對河岬漁樵祗在茲
青郊香杜若白水映茅茨
晝景徹雲樹夕陰澄古逵
渚花獨開晚田鶴靜飛遲

且復樂生事前賢為我師清歌聊鼓楫永日望佳期

初去郡齋書情

唐薛據盛

肅徒辭汝潁懷古獨凄然尚想文王化猶思巢父賢
時移多讒巧大道竟誰傳况見疾風起悠悠旌旆懸
征鴻無返翼歸流不停川已經霜雪下仍驗柏松堅
回首望城邑迢迢間雲煙志士不傷物小人皆自妍
感時唯責已在道非怨天從此適樂土東歸得幾年

送綦母校書棄官還江東

唐王維盛

明時久不達棄置與君同天命無怨色人生有素風
念君拂衣去四海將安窮秋天萬里淨日暮澄江空

清夜何悠悠扣舷明月中和光魚鳥際澹爾蒹葭叢
無庸客昭世衰鬢日如蓬頑疎暗人事僻陋遠天聰
微物縱可採其誰為至公余亦從此去歸耕為老農
送孔巢父謝病歸遊江東兼呈李白

唐杜甫盛

巢父掉頭不肯住東將入海隨煙霧詩卷長留天地
間釣竿欲拂珊瑚樹深山大澤龍蛇遠春寒野陰風
景暮蓬萊織女同雲車指點虛無引歸路自是君身
有仙骨世人那得知其故惜君只欲苦死留富貴何
如草頭露蔡侯靜者意有餘清夜置酒臨前除罷琴

惆悵月照席幾歲寄我空中書南尋禹穴見李白道甫問訊今何如

酬陶六辭秩歸舊居見柬

唐錢起

靖節昔高尚令孫嗣清微舊廬雲峰下獻歲車騎歸去俗因解綬憶山得採薇田疇春事起里巷相尋稀淵明醉乘興閑門祇掩扉花禽驚曙月鄰女上鳴機畢娶願已果養恬志寧違吾當挂朝服同爾緝荷衣

謝櫟陽令歸西郊贈別諸友

唐韋應物

結髮仕

一作事

州縣蹉跎在文墨徒有排雲心何由生

羽翼幸遭明盛日萬物蒙生植獨此抱微痾頽然謝

斯職

大歷十四年六月二十三日自鄆縣制除櫟陽令以疾辭歸善福精舍七月二十日賦此詩

世道方荏苒郊園思偃息為歡日已延君子情未極

馳觴

一作驅馳

忽云晏高論良難測遊步清都宮迎風嘉

樹側晨起西郊道原野分黍稷自樂陶唐人服勤在微力佇君列丹陛出處兩為得

歸田

時三十七

唐元稹

中

陶君三十七挂綬出都門我亦今年去商山浙岸村冬修方丈室春種桔槔園千萬人間事從茲不復言

送友人棄官遊江左

唐賈島

中

羨君休作尉萬事具全身寰海多虞日江湖獨往人

姓名何處變鷗鳥幾時親別後吳中使應須訪子真

李給事二首

唐杜牧晚

一章緘拜皂囊中慄慄朝廷有古風元禮去歸緱氏

學

李膺退罷歸緱氏教授生徒給事論鄭注告滿歸潁陽

江充來見大臺宮注鄭

對於浴室

紛紛白晝驚千古鐵鎖朱殷幾一空曲突徙薪

人不會海邊今作釣魚翁

晚髮悶還梳憶君秋醉餘可憐劉校尉曾訟石中書

給事因忤仇軍容棄官東歸

消長雖殊事仁賢每見如因看魯褒

論何處是吾廬

許七侍御棄官東歸瀟灑江南頗聞自適高崧

企望題詩寄贈十韻

唐杜牧晚

天子繡衣吏東吳美退居有園同庾信避事學相如

蘭畹晴香嫩筠谿翠影踈江山九秋後風月六朝餘

錦笥開詩軸青囊結道書霜巖紅薜荔露沼白芙蓉

睡雨高梧密碁燈小閣虛凍醪元亮秫寒鱸季鷹魚

塵意迷今古雲情識卷舒他年雪中棹陽羨訪吾廬

於義興縣近有水榭

李生棄官入道因寄

唐許渾晚

西巖一徑通

一作千巖路不窮

知學

一作訪

採芝翁寒暑丹心

外光陰白髮中水深魚避釣雲迴鶴辭籠坐想還家

日人非井邑空

○遭讒

樂府歌

魏陳思王

膠漆至堅浸之則離皎皎素絲隨染色移君不我棄
讒人所為

隴右途中遭非語

唐員半千初

趙有兩毛遂魯聞二曾參慈母猶且惑况在行路心
冠冕無醜士賄賂成知己名利我所無清濁誰見理
弊服空庭春緩帶不著身出遊非懷璧何憂乎忌人
正須自保愛振衣出世塵

被彈

唐沈佺期初

知人昔不易舉非貴易失爾何按國章無罪見呵叱
平生守直道遂為衆所嫉少以文作吏手不曾開律
一旦法相持荒忙意如漆幼子雙囟圍老夫一念室
昆弟兩三人相次俱囚桎萬樂當衆怒千謗無片實
庶以白黑讒顯此涇渭質劾吏何咆哮晨夜聞撲扶
事間拾虛證理外存枉筆懷痛不見申抱冤竟難息
窮囚多垢膩愁坐饒蟻蝨三日唯一飯兩旬不再櫛
是時盛夏中暎赫多瘵疾瞪目眠欲閉喑鳴氣不出
有風自扶搖鼓蕩無倫匹安得吹浮雲令我見白日

上崔相百憂章

時在薛陽獄

唐李白

盛

共工赫怒天維中摧鯤鯨噴蕩揚濤起雷魚龍陷人
 成此禍胎火焚崑山玉石相礮仰希霖雨灑寶炎煨
 箭發石開戈揮日迴鄒衍慟哭燕霜颯來微誠不感
 猶繫夏臺蒼鷹搏攫丹棘崔嵬豪聖凋枯王風傷哀
 斯文未喪東嶽豈頽穆逃楚難鄒脫吳災見機苦遲
 二公所哈驥不驟進麟何來哉星離一門草擲二孩
 萬憤結緝憂從中催金瑟玉壺盡為愁媒舉酒太息
 泣血盈杯台星再朗天網重恢屈法申恩棄瑕取材
 治長非罪尼父無猜覆盆儻舉應照寒灰

懼讒

唐李白

盛

二桃殺三士詎假劔如霜眾女妬蛾眉雙花競春芳
 魏姝信鄭袖掩袂對懷王一惑巧言子朱顏成死傷
 行將泣團扇戚戚愁人腸

萬憤辭投魏郎中

唐李白

盛

海水渤潏人罹鯨鯢蒼胡沙而四塞始滔天於燕齊
 何六龍之浩蕩遷白日於秦西九土星分磬磬棲棲
 南冠君子呼天而啼戀高堂而掩泣血地而成泥
 獄戶春而不草獨幽怨而沈迷兄九江兮弟三峽悲
 羽化之難齊穆陵關北愁愛子豫章天南隔老妻一

門骨肉散百草遇難不復相提攜樹榛拔桂囚鸞寵
雞舜昔授禹伯成耕犁德自此衰吾將安栖好我者
恤我不好我者何忍臨危而相擠子胥鴟夷彭越醢
醢自古豪烈胡爲此繫蒼蒼之天高乎視低如其聽
卑脫我牢狴儻辨美玉君收白珪

雪讒詩贈友人

唐李白盛

嗟余沈迷猖獗已久五十知非古人常有立言補過
庶存不朽包荒匿瑕蓄此頑醜月出致譏貽愧皓首
感悟遂晚事往日遷白壁何辜青蠅屢前羣輕折軸
下沈黃泉衆毛飛骨上陵青天萋菲暗成貝錦粲然

泥沙聚埃珠玉不鮮洪燄爍山發自織煙滄波蕩日
起乎微涓交亂四國播於八埏拾塵掇蜂疑聖猜賢
哀哉悲夫誰察余之貞堅彼婦人之猖狂不如鵲之
疆疆彼婦人之淫昏不如鶉之奔奔坦蕩君子母悅
簧言擢髮贖罪罪乃孔多傾海流惡惡無以過人生
實難逢此織羅積毀銷金沈憂作歌天未喪文其如
余何妲已滅紂褒女惑周天維蕩覆職此之由漢祖
呂氏食其在傍秦皇太后毒亦淫荒蠅蝮作昏遂掩
太陽萬乘尚爾匹夫何傷辭殫意窮心切理直如或
妄談昊天是殛子野善聽離婁至明神靡遁響鬼無

逃形不我遐棄庶昭忠誠

送薛九被讒去魯

唐李白盛

宋人不辨玉魯賤東家丘我笑薛夫子胡爲兩地遊
黃金銷衆口白璧竟難投梧桐生蒺藜綠竹乏佳實
鳳皇宿誰家送與羣雞匹田家養老馬窮士歸其門
蛾眉笑蹙者賓客去平原却斬美人首三千還駿奔
毛公一挺劍楚趙兩相存孟嘗悅狡兔三窟賴馮諼
信陵奪兵符爲用侯生言春申一何愚刎首爲李園
賢哉四公子撫掌黃泉裏借問笑何人笑人不好士
爾去且勿誼桃李竟何言沙丘無漂母誰肯飯王孫

寄崔列中丞

唐王建中

火山無冷地濁流無清源人生在艱世何處避讒言
諸侯鎮九州天子開四門尚有忠義士不得申其冤
嘉木移遠植爲我當行軒君子居要途易失主人恩
我愛古人道師君直且溫貪泉誓不飲邪路誓不奔
如何非岡坂故使車輪翻妓妾隨他人家事幸獲存
當時門前客默默空冤煩從今遇明代善惡亦須論
莫以曾見疑直道遂不敦

士有謗毀者作詩以贈之

唐孟郊中

君子勿鬱鬱聽我青蠅歌人間少平地森聳山岳多

折輪不在道覆舟不在河須知一尺水日夜增高波
叔孫毀仲尼臧倉掩孟軻蘭艾不同香自然難為和
良玉燒不熱直竹文不頗自古皆如此其如道在何

答晝上人止讒作

唐孟郊中

烈烈鸞鷲吟鏗鏗琅玕音梟摧明月嘯鶴起清風心
渭水不可渾涇流徒相侵俗侶唱桃葉隱仙一作鳴
桂琴子野真遺却浮淺藏淵深

寄浙右幕中

遲陳商門生為浙西掌書記以讒罷至淮南崔相國奏掌書記後以

詩寄浙右幕中

唐孟遲晚

由來惡舌駟難追自古無媒謗所歸句踐豈能容范

蠡李斯何暇救韓非巨拳豈為雞揮肋強弩那因鼠
發機慚愧故人同鮑叔此心江柳尚依依

誠是非

唐劉兼晚

巧舌如簧總莫聽是非多自愛憎生三人告母雖投
杼百犬聞風只吠聲辨玉且寬和氏罪誣金須認不
疑情因思疇昔遊談者六國交馳亦受烹

○貶謫

貶降至汝州廣城驛

唐鄭愔初

近郊憑汝海遐服指江干尚憶趨朝貴方知失路難
曙宮平樂遠秋澤廣城寒岍葦新花白山梨晚葉丹

鄉關千里暮歲序四時闌函塞雲間別旋門霧裏看
 夙年追駮驥暮節仰鷓鴣疲駕勞垂耳騫騰詎矯翰
 將調梅鉉實不正李園冠荆玉終無玷隋珠忽已彈
 曉裝違輦洛夕夢在長安北上頻傷阮西征未學潘
 傾車無共轍同派有殊瀾去去懷知己何由報一餐
 被出濟州別城中故人

唐王維盛

微官易得罪謫去濟川陰執政方持法明君照此心
 閭閻河潤上井邑海雲深縱有歸來日各愁年鬢侵
 貶樂城尉

唐張子容盛

竄謫邊窮海川原近惡谿有時聞虎嘯無夜不猿啼

地暖花常發巖高日易低故鄉可憶處遙指斗牛西

貶岳州司馬巴陵寄朝中友人

唐賈至盛

江南春草初纂纂愁殺江南獨愁客秦中楊柳也應
 新轉憶秦中相憶人萬里鶯花不相見登高一望淚
 沾巾

贈房侍御

唐陶翰盛

志人固不羈與道常周旋進則天下仰已之能晏然
 褐衣東府召執簡南臺先雄義每特立犯顏豈圖全
 謫居東南遠逸氣吟芳荃適會寥廓趣清波更黃緣
 扁舟入五湖發纜洞庭前浩蕩臨海曲迢遞濟江壖

徵竒忽忘返遇興將彌年乃悟范生智足明漁父賢
郡臨新安渚佳氣此城偏日夕對層岫雲霞映晴川
閑居戀秋色偃卧含貞堅倚伏自相化行藏亦推遷
君其振羽翮歲晏將冲天

貽袁三拾遺謫作

唐儲光羲盛

傾蓋洛之濱依然心事親龍門何以峻曾是好詞人
珥筆朝丹陛含章諷紫宸帝城多壯觀被服長如春
天子儉為德而能清約身公卿盡虛位天下自趣塵
□□□望美令德聲何已高帝黜儒生文皇謫才子
朝廷非不盛遣謫良難恃路出大江陰川行碧峰裏

斯言徒自玷白玉豈為滓希聲盡眾人深識唯知己
知己怨生離悠悠天一涯寸心因夢斷孤憤為年移
花滿芙蓉闕春深朝夕池空令千萬里長望白雲垂

寄穆侍御出幽州

唐王昌齡盛

一從恩譴度瀟湘塞北江南萬里長莫道薊門書信
少鴈飛猶得到衡陽

寄陶副使

唐王昌齡盛

聞道將軍破海門如何遠謫渡湘沅春來明主封西
嶽自有還君紫綬恩

聞王昌齡左遷龍標尉遙有寄此唐李白盛

楊花落盡子規啼聞道龍標過五谿我寄愁心與明月隨君直到夜郎西

巴陵贈賈舍人

唐李白盛

賈生西望憶京華湘浦南遷莫怨嗟聖主恩深漢文帝憐君不遣到長沙

酬皇甫十六侍御曾見寄此公時貶舒州司馬

唐李嘉祐中

自顧衰容累玉除忽承優詔赴銅魚江頭鳥避青旄節城裏人迎露網車長沙地近悲才子古郡山多憶舊廬更枉新詩思何苦離騷愁處亦無如

貶南巴至鄱陽題李嘉祐

唐劉長卿中

巴嶠南行遠一作南出長江萬里隨不才甘謫去流

水亦何之地遠明君棄一作瘴近天高酷吏欺青山

獨往路芳草未歸時流落還相見悲歡話所思猜嫌

一作傷蕙苳愁暮向江離柳色迎高塢荷衣照下帷

水雲初起重暮鳥遠來遲白首一作看長劔滄洲一作

寄釣絲沙鷗驚小吏湖月上高枝稚子能吳語新

文怨楚辭憐君不得意川谷自逶迤一作容髮

負謫後登于越亭作又作十唐劉長卿中

天南愁望絕亭上柳條新落日獨歸鳥孤舟何處人

生涯投越嶺一作微世業陷胡邊一作塵杳杳鍾陵暮悠

悠鄙水春一作江入千峰秦臺悲白首楚澤怨青蘋

草色迷征路鶯聲傷逐臣獨醒空一作離翻取笑直道不

容身得罪風霜苦全生天地仁青山數行淚滄海一

窮鱗牢落機心盡惟憐鷗鳥親

謫居巴州

唐劉長卿中

何事長沙謫相逢楚水秋暮帆歸夏口寒雨對巴丘

帝子椒漿奠騷人木葉愁誰憐萬里外離別洞庭頭

赴南巴書情寄故人

唐劉長卿中

南過三湘去巴人此路偏謫居秋瘴裏歸處夕陽邊

直道天何在愁容鏡亦憐裁書欲誰訴無淚可潸然

謫居後卧病官舍簡賀蘭郎侍

唐劉長卿中

青春衣繡共稱一作繡服正相宜白首垂一作髮如絲恨不遺江

上幾回今夜月鏡中無復少年時生還北闕誰相一作

將一作能引老向南邦衆所悲歲歲任他芳草綠長沙未

有定歸期

離東都平泉詩

唐李德裕中

十年紫殿掌洪鈞出入三朝一品身文帝寵深陪雉

尾武皇恩重讌龍津黑山永破和親虜烏嶺全口跋

扈臣自是功高臨盡處禍來名滅不由人

唐李德裕中

肉視具寮忘七箸氣吞同列削寒温當時誰是承恩
者肯有餘波達鬼村
畫閣不開梁燕去朱門罷掃乳烏歸千巖萬壑應惆
悵流水斜傾出武闈

謫江表久未歸

唐竇參中

一自經放逐徘徊無所從便為出山雲不隨飛去龍
名豈不欲保歸豈不欲早苟無三月資難適千里道
離心與羈思終日常草草人生年幾齊憂苦則先老
誰能假羽翼使我暢懷抱

謫官辰州冬至日懷

唐戎昱中

去年長至在長安策杖曾簪獬豸冠此歲長安逢至
日下堦遙想雪霜寒夢隨行伍朝天去身寄窮荒報
國難北望南郊消息斷江頭唯有淚闌干
量移袁州張韶州端公以詩相賀因酬之

唐韓愈中

明時遠逐事何如遇赦移官罪未除北望詎今隨塞
鴈南遷纔免葬江魚將經貴郡煩留客先惠高文謝
起予暫欲繫船韶石下上賓虞舜整冠裾

左遷至藍關示姪孫湘

唐韓愈中

音
一
一封朝奏九重天夕貶潮陽路八千欲爲聖明除弊
事肯將衰朽惜殘年雲橫秦嶺家何在雪擁藍關馬
不前知汝遠來應有意好收吾骨瘴江邊

謫居悼往二首

唐劉禹錫中

邑邑何邑邑長沙地卑濕樓上見春多花前恨風急
猿愁腸斷叫鶴病翹趾立牛衣獨自眠誰哀仲卿泣

二

鬱鬱何鬱鬱長安遠於日終日念鄉關燕來鴻復還
潘岳歲寒思屈平顛顛顏殷勤望歸路無雨卽登山

寄遷客

唐張祐中

萬里南邊路辛勤嶺路遙谿行逢水弩野店避山魃
瘴海須求藥貪泉莫舉瓢

繼三使君詩

唐劉太真中

顧十二左遷過韋蘇州房杭州韋睦州三使君皆
有郡中燕集詩因亦成篇

寵至乃不驚罪得非無由奔迸歷畏途緬邈赴偏陬
牧此彫弊旰屬當賦歛秋夙興諒無補旬暇焉敢休
前日懷友生獨登城上樓迢迢西北望遠思不可收
今日車騎來曠然銷人憂晨迎東齋飯晚度南谿遊
以我碧流水泊君青翰舟莫將遷客程不爲勝景留

飛札謝三守斯篇希見酬

江南謫居十韻

唐白居易中

自哂沈冥客曾爲獻納臣壯心徒許國薄命不如人
纔展凌雲翅俄成失水鱗葵枯猶向日蓬斷卽辭春
澤畔長愁地天邊欲老身蕭條殘活計冷落舊交親
草合門無徑煙消甑有塵憂方知酒聖貧始覺錢神
虎尾難容足羊腸易覆輪行藏與通塞一切任陶鈞

惻惻吟

唐白居易中

惻惻復惻惻逐臣返鄉國前事難重論少年不再得
泥塗絳老頭斑白炎瘴靈均面黧黑六年不死却歸

來道著姓名人不識

聞樂天授江州司馬

唐元稹中

殘燈無焰影幢幢此夕聞君謫九江垂死病中仍悵
望暗風吹雨入寒牕

俱來海上歎煙波君佩銀魚我觸羅經國才微甘放
蕩專城年少豈蹉跎應憐旅夢千重思共愴離心一
曲歌唯有管絃知客意分明吹出感恩多

遷客

唐鄭谷晚

離夜聞橫笛可堪吹鷓鴣雪冤知早晚雨泣渡江湖

秋樹吹黃葉臘煙垂綠蕪虞翻歸有日莫便哭窮途

寄南浦謫官

唐鄭谷 晚

多才翻得罪天末抱窮憂白首為遷客青山遶萬州
醉欹梅障曉歌厭竹枝秋望闕懷鄉淚荆江水共流

謫居海上

唐熊皦 晚

家臨涇水隔秦川來往關河路八千堪恨此身何處
老始皇橋畔又經年

郴江遷客

唐羅隱 晚

不是逢清世何由見皂囊事雖危虎尾名勝泊駕行
毒霧郴江闊愁雲楚驛長歸時有詞賦一為弔沈湘

寄瓊州楊舍人

唐皮日休 晚

德星芒彩瘴天涯酒樹堪消謫宦嗟行遇竹王因設
奠居逢木客又遷家清齋淨漉枕榔麪遠信閑封豈
蕊花清切會須歸有日莫貪勾漏足丹砂

奉和寄瓊州楊舍人

唐陸龜蒙 晚

明時非罪謫何偏鵬鳥巢南更數千酒滿椰杯消毒
霧風隨蕉扇下瀧船人多藥戶行狂蠱吏有珠官出
俸錢祗以直誠天自信不勞詩句詠貪泉

送楊少府貶郴州

唐王維 盛

明到衡山與洞庭若為秋月聽猿聲愁看北渚三湘

遠惡說南風五兩輕青草瘴時過夏口白頭浪裏出
湓城長沙不久留才子賈誼何須弔屈平

送王昌齡之嶺南

唐孟浩然盛

洞庭去遠近楓葉早驚秋峴首羊公愛長沙賈誼愁
土風無縞紵鄉味有查頭已抱沈痾疾更貽魑魅憂
數年同筆硯茲夕間衾裯意氣今何在相思望斗牛

送任五之桂林

唐王昌齡盛

楚客醉孤舟越水將引棹山爲兩鄉別月帶千里貌
羈譴同繒綸僻幽聞虎豹桂林寒色在苦節知所效

送吳十九往沅陵

唐王昌齡盛

沅江流水到辰陽谿口逢君驛路長遠謫誰知望雷
雨明年春水共還鄉

送崔參軍往龍谿

唐王昌齡盛

龍谿只在龍標上秋月孤山兩相向譴謫離心是丈
夫鴻恩共待春江漲

送田少府貶蒼梧

唐高適盛

沈吟對遷客惆悵西南天昔爲一官未得意今向萬
里令人憐念茲斗酒成睽間停舟歎君日將晏遠樹
應憐北地春行人却羨南歸鴈丈夫窮達未可知看
君不合長數竒江山到處堪乘興楊柳青青那足悲

送張瑤貶五谿尉

唐高適盛

他日維楨幹明時懸鏡鄒江山遙去國妻子獨還家
離別無嫌遠沈浮勿強嗟南登有詞賦知爾弔長沙

送鄭侍御謫閩中

唐高適盛

謫去君無恨閩中我舊過大都秋鴈少只是夜猿多
東路雲山合南天瘴癘和自當逢雨露行矣慎風波

送李少府貶峽中王少府貶長沙唐高適盛

嗟君此別意何如駐馬銜杯問謫居巫峽啼猿數行
淚衡陽歸鴈幾封書青楓江上秋天遠白帝城邊古
木踈聖代卽今多雨露暫時分手莫躊躇

送南給事貶崖州

唐賈至盛

疇昔丹墀與鳳池卽今相見兩相悲朱崖重夢二千
里欲別俱爲慟哭時

岳陽樓重宴別王八員外貶長沙唐賈至盛

江路東連千里潮青雲北望紫微遙莫道巴陵湖水
闊長沙南畔更蕭條

送郝昂謫巴中

唐李白盛

瑤草寒不死移值滄江濱東風灑雨露會入天地春
余若洞庭葉隨波送逐臣思歸未可得書此謝情人

送竇司馬貶宜春

唐李白盛

天馬白銀鞍親承明主歡鬪雞金閨裏射鴈碧雲端
堂上羅中貴歌鐘清夜闌何言謫南國拂劍坐長歎
趙璧爲誰點隋珠枉被彈聖朝多雨露莫厭此行難

送賈閣老出汝州

唐杜甫盛

西掖梧桐樹空留一院陰艱難歸故里去住損春心
宮殿青門隔雲山紫邏深人生五馬貴莫受二毛侵
送鄭十八虔貶台州司戶參軍傷其臨老陷賊

之故闕爲面別情見於詩

唐杜甫盛

鄭公樗散鬢如絲酒後常稱老畫師萬里傷心嚴譴
日百年垂死中興時愴惶已就長途往邂逅無端出

餞遲便與先生應永訣九重泉路盡交期

送男彥輔左貶

唐林氏韓彥輔母

他日初投杼勤王在隱兵有辭期不罰積意許相仍
謫宦今何在銜冤猶未勝天涯分越徼驟騎速毘陵
腸斷腹非苦書傳寫豈能淚添江水遠心劇海雲蒸
明月珠難識甘泉賦可稱但將忠報主何懼點青蠅

送從弟貶袁州

唐劉長卿中

何事成遷客思歸不見鄉遊吳經萬里弔屈向三湘
水與荆巫接山通鄢郢長名差黃綬繫身是白眉郎
獨結南枝恨應思北鴈行憂來沽楚酒左鬢莫疑霜

送裴郎中貶吉州

唐劉長卿中

亂軍交白刃一騎出黃塵漢節同歸闕江帆共逐臣
猿愁岐路晚梅作異方春知己鄴侯在應憐脫粟人

送李侍御貶郴州

唐劉長卿中

洞庭波渺渺君去弔靈均幾路三湘水全家萬里人
聽猿明月夜看柳故年春憶想汀州畔傷心向白蘋

送李使君貶連州

唐劉長卿中

獨過長沙去誰憑此路愁秋風散千騎寒雨泊孤舟
賈誼辭明主蕭何識故侯漢廷當自召湘水但空流

送李侍御貶鄱陽

此公近由
此州使迴

唐劉長卿中

迴車仍昨日謫去已秋風于越知何處雲山只向東
暮天江色裏田鶴稻花中却見鄱陽吏猶應舊馬驄

重送裴郎中貶吉州

唐劉長卿中

猿啼客散暮江頭人自傷心水自流同作逐臣君更
遠青山萬里一孤舟

送畢侍御謫居

唐錢起中

崇蘭香死玉簪折志士吞聲甘狗節忠盡不為明主
知悲來莫向時人說滄浪之水見心清楚客辭天淚
滿纓百鳥喧喧噪一鸚上林高枝亦難托寧嗟人世
棄虞翻且喜江山得康樂自憐黃綬老嬰身妻子朝

來勸隱淪桃花洞裏舉家去此別相思復幾春

送薛八謫居

唐錢起中

東水將孤客南行路幾千虹翻潮上雨鳥落瘴中天
謫去寧留恨思歸豈待年銜杯且一醉別淚莫潸然

送李九貶南陽

唐錢起中

玉柱金罍醉不歡雲山驛道向東看鴻聲斷續暮天
遠柳影蕭疎秋日寒霜降幽林露蕙若弦驚翰苑失
鴛鸞秋來回首君門阻馬上應歌行路難

送南遷客

唐張籍中

去去遠遷客瘴中衰病身青山無限路白首不歸人

海國戰騎象蠻州市用銀一家分幾處誰見日南春

送徐彥夫南遷

唐張祐中

萬里客南遷孤城漲海邊瘴雲秋不斷陰火夜長然
月上行虛市風迴望船舶知君還自潔更為酌貪泉

送辰州鄭使君

唐戎昱中

誰人不譴謫君去獨堪傷長子家無弟慈親老在堂
驚魂隨驛吏冒暑向炎方未到猿啼處參差已斷腸

送友貶嶺南

唐耿湜中

暮年從遠謫落日別交親湖上北飛鴈天涯南去人
夢成湘浦夜淚盡桂陽春歲月茫茫意何時雨露新

音 卷之九
嶽祠送薛近貶官

唐耿漳中

枯松老柏仙山下白帝祠堂枕古逵
遷客無辜祝史告神明有喜女巫知
遙思桂浦人空去遠過衡陽鴈不隨
度嶺梅花翻向北回看不見樹南枝

送烏城王明府貶巴江

唐包何中

一片孤帆無四鄰北風吹過五湖濱
相看盡是江南客獨有君爲嶺外人

送遷客

唐于鵠中

得罪誰人送來時不到家白頭無侍子
多病向天涯蒼莽凌江水黃昏見塞花
如今賈誼賦不漫說長沙

送人貶信州判官

唐白居易中

地僻山深古上饒土風貧薄道程遙
不唯遷客須恓屑見說居人也寂寥
谿畔毒沙藏水弩城頭枯樹下山魑
若於此郡爲卑吏刺史廳前又折腰

送韋侍御量移金州司馬

唐白居易中

春歡雨露同霑澤冬歎風霜獨滿衣
留滯多時如我少遷移好處似君稀
卧龍雲到須先起蟄燕雷驚尚未飛
莫恨東西溝水別滄溟長短擬同歸

送客南遷

唐白居易中

我說南中事君應不願聽曾經身困苦
不覺語叮嚀

燒處愁雲夢波時憶洞庭春
雷煙勃勃秋瘴霧冥冥
蚊蚋經冬活魚龍欲雨腥
水蟲能射影山鬼解藏形
穴掉巴蛇尾林飄鶴鳥翎
颶風千里黑蕪草四時青
客似驚弦鴈舟如委浪萍
誰人勸言笑何計慰漂零
慎勿琴離膝常須酒滿瓶
大都從此去宜醉不宜醒

送韋覲謫潘州司馬

唐李明遠

晚

北鳥飛不到南人誰去遊
天涯浮瘴水嶺外向潘州
草木春秋暮猿猱日夜愁
定知遷客淚應只對君流

別謫者

唐李昌符

曉

此地聞猶惡人言是所之一
家書絕久孤驛夢成遲

八月三湘道聞猿冒雨時
不須祠楚相臣節轉堪疑

○流徙

入鬼門關

唐沈佺期

初

昔傳瘴江路今到鬼門關
土地無人老流移幾客還
自從到京洛顏鬢與衰顏
夕宿舍沙裏晨行岡路間
馬危千仞谷舟險萬重灣
問我投何地西南盡百蠻

赦到不得歸題江上石

唐沈佺期

初

家住東京裏身投南海西
風煙萬里隔朝夕幾行啼
聖主謳歌洽賢臣法令齊
忽聞銅柱使走馬報金雞
棄市沾皇渥投荒漏紫泥
魂疲山鶴路心醉站鳶谿

天鑿誅元惡宸慈恤遠黎五方思寄刃萬姓喜燃臍
自幼輸丹懇何嘗玷白圭承言竄遐魅雪枉間深狴
墳壠無由謁京華豈重躋炎方誰謂廣地盡覺天低
百卉雜殊怪昆蟲理賴睽閉藏元不螫搖落反生莢
瘡瘡因茲苦窮愁益復迷火雲蒸毒霧陽雨濯陰霓
周乘安交趾王恭輯畫題少寬窮涸鮒猶愍觸藩羝
配宅鄰州解斑苗接野畦山空聞鬪象江靜見游犀
翰墨思諸季裁縫憶老妻小兒應離襍幼女未攀筓
夢蝶翻無定著龜詎有倪誰能竟此曲曲盡氣酸嘶

從驩州解移住山間水亭贈蘇使君

唐沈佺期
初

遇坎卽乘流西南到火洲鬼門應苦夜瘴浦不宜秋
歲貸胸穿老朝飛鼻飲頭死生離骨肉榮辱間朋遊
棄置一身在平生萬事休鷹鷂遭誤逐豹虎怯真投
憶昨京華子傷今邊地囚願陪鸚鵡樂希並鷓鴣留
日月渝鄉思煙花換客愁幸逢蘇伯玉回借水亭幽
山柏張青蓋江蕉卷綠油乘閑無火宅因放有漁舟
適越心當是居夷迹可求古來堯禪舜何必罪驩兜

荅魑魅代書寄家人

唐沈佺期
初

魑魅來相問君何失帝鄉龍鍾辭北闕蹭蹬守南荒

八音 卷之十九 三五
覽鏡憐雙鬢沾衣惜萬行抱愁那去國將老更垂堂
影荅余他歲恩思宦洛陽三春給事省五載尚書郎
黃閣遊鸞署青縑御史香扈巡行太液陪宴坐明光
渭北昇高苑河南夜襖場煙花恒獻賦泉石每稱觴
暇日從休澣高車映道旁迎賓就丞相選士謁昭王
侍寵言猶得承歡謂不忘一朝貽厚譴五宅竟同防
兇豎曾驅策權豪豈易當欵顏因侍從接武在文章
且懼威非贖寧知心是狼身猶納履誤情爲覆盆傷
可歎緣成業非關行昧藏喜逢今改旦正朔復歸唐
河讖隨龍馬天書逐鳳皇朝容欣舊則宸化美初綱

告善雕旌建收寃錦旆張宰臣更獻納守郡各明揚
禮樂移三統舟車會八方雲沙降白遂秦隴獻燒當
三赦重天造千推極國祥大招思復楚于役限維桑
漲海緣真臘崇山壓古棠雕題飛棟宇儋耳間衣裳
伏枕神餘劣加餐力未強空庭遊翡翠窮巷倚枕榔
緣體分殊昔回眸宛異常吉凶恒委鄭年壽會詢唐
家本傳清白官移重挂牀上京無薄產故里絕窮莊
碧玉先時費蒼頭此自將興言歎家口何處待贏糧
計吏從都出傳聞大小康降除沾二弟離拆已三房
劍外懸銷骨荆南預斷腸音塵黃耳間夢想白眉良

復此單棲鶴銜雛願遠翔何堪萬里外雲海已冥茫
戚屬甘胡越聲名任粃糠由來休憤命命也信蒼蒼
獨坐尋周易清晨詠老莊此中因悟道無問入猖狂

贈高六戢

唐張說初

北極辭明代南溟宅放臣丹誠由義盡白髮帶愁新
鳥墜炎洲氣花飛洛水春平生歌舞席誰憶不歸人

留贈張御史張判官

唐張說初

旅竄南方遠傳聞北使來舊庭知玉樹合浦識珠胎
白髮因愁改丹誠託夢迴皇恩若再造爲憶不然灰

南中別蔣五向青州

唐張說初

老親依北海賤子棄南荒有淚皆成血無聲不斷腸
此中逢故友彼地送還鄉願作楓林葉隨君度洛陽

南中送北使二首

唐張說初

傳聞合浦葉曾向洛陽飛何日南風至還隨北使歸
紅顏渡嶺歇白首對秋衰高歌何由見層堂不可違
誰憐炎海曲淚盡血霑衣

待罪居重譯窮愁暮雨秋山臨鬼門路城繞瘴江流
人事今如此生涯尚可求逢君入鄉縣傳我念京周
別恨歸途遠離言暮景道夷歌翻下淚蘆酒未消愁
聞有胡兵急深懷漢國羞和親先是詐欵塞果爲讐

釋繫應分爵蠲徒幾復侯廉頗誠未老孫叔且無謀
若道馮唐事皇恩尚可收

嶺南送使

唐張說初

秋鴈逢春返流人何日歸將予去國淚灑子入鄉衣
饑狄啼相聚愁猿喘更飛南中不可問書此示京畿

嶺南送使二首

唐張說初

獄中生白髮嶺外罷紅顏古來相送處凡得幾人還

二

萬里投荒裔來時不見親一朝成白首看取報家人

流合浦嶺外

唐張均盛

瘴江西去火爲山炎徼南窮鬼作關從此更投入境
外生涯應在有無間

江上別流人

唐孟浩然盛

以我越鄉客逢君適居者分飛黃鶴樓流落蒼梧野
驛使乘雲去征帆沿溜下不知從此分還袂何時把

流夜郎永華寺寄潯陽郡官

唐李白盛

朝別凌煙樓賢豪滿行舟暝投永華寺賓散予獨醉
願結九江流添成萬行淚寫意寄廬嶽何當來此地
天命有所懸安得苦愁思

流夜郎至西塞驛寄裴隱

唐李白盛

揚帆借天風水驛苦不緩平明及西塞已先投沙伴
迴巒引羣峰橫感楚山斷砮衝萬壑會震沓百川滿
龍怪潛溟波候時救炎旱我行望雷雨安得霑枯散
鳥去天路長人悲春光短空將澤畔吟寄爾江南管
竄夜郎於烏江留別宗十六唐李白盛
君家全盛日台鼎何陸離斬鼉翼媧皇鍊石補天維
一迴日月顧三入鳳凰池失勢青門傍種瓜復幾時
猶會舊賓客三千光路岐皇恩雪憤懣松柏含榮滋
我非東牀人令姊忝齊眉浪跡未出世空名動京師
適遭雲羅解翻謫夜郎悲拙妻莫邪劍及比二龍隨

慙君湍波苦千里遠從之白帝曉猿斷黃牛過客遲
遙瞻明月峽西去益相思

流夜郎贈辛判官

唐李白盛

昔在長安醉花柳五侯七貴同杯酒氣岍遙凌豪士
前風流肯落他人後夫子紅顏我少年章臺走馬著
金鞭文章獻納麒麟殿歌舞淹留玳瑁筵與君自謂
長如此寧知草動風塵起函谷忽驚胡馬來秦宮桃
李向明開我愁遠謫夜郎去何日金雞放赦回

放後遇恩不霑

唐李白盛

天作雲與雷霈然德澤開東風日本至白雉越裳來

獨棄長沙國三年未許回何時入宣室更問洛陽才

送侯中丞流康州

唐劉長卿中

長江極目帶楓林匹馬孤雲不可尋
遷播共知臣道枉猜讒却為主恩深
轅門畫角三軍思驛路青山萬里心
北闕九重誰許屈獨看湘水淚沾襟

送林宗配雷州

唐郎士元中

昨日三峰尉今朝萬里人平生任孤直豈是不防身
海霧多為瘴山雷乍作鄰遙憐北戶月與子獨相親

送流人

唐司空曙中

聞說南中事悲君重竄身山村楓子鬼江廟石郎神

童稚留荒宅圖書託故人青門好風景為爾一沾巾

送流人

唐張籍中

獨向長城北黃雲暗塞天流名屬邊將舊業作公田
擁雪添軍壘收冰當井泉知君住應老須記別鄉年

贈李司議

唐張籍中

漢庭誰問投荒客十載天南著白衣秋草茫茫惡谿
路嶺頭遙送北人歸

送人流貶

唐李益中

漢章雖約法秦律已除名謗遠人多惑官微不自明
霜風先獨樹瘴雨失荒城疇昔長沙事三年召賈生

流崖州至鬼門關作

唐楊炎中

一去一萬里千知千不還崖州何處在生度鬼門關

武關西逢配流吐蕃

唐韓愈中

嗟爾戎人莫慘然湖南地近保生全我今罪重無歸

望直去長安路八千

寄流人

唐項斯晚

毒草不曾枯長添客健無霧開蠻市合船散海城孤

象跡頻藏齒龍涎遠蔽珠家人秦地老泣對日南圖

○奔亡

斷句

南史曰昶兵敗奔魏棄母妻惟攜妾一人騎馬自隨在道慷慨為斷句

北魏劉昶

白雲滿鄆來黃塵暗天起關山四面絕故鄉幾千里

從周入齊夜渡砥柱

一作犯虜將逃惠慕道士作○北史本傳曰荊州為

周軍所破大將軍李穆送之推往弘農令掌其兄陽平公遠書翰遇河水暴長具船將妻

北齊顏之推

俠客重艱辛夜出小平津馬色迷關吏雞鳴起戍人

露鮮華劍彩月照寶刀新問我將何去北海就孫賓

奔亡道中五首

唐李白盛

蘇武天山上田橫海島邊萬重關塞斷何日是歸年

二

亭伯去安在李陵尚未歸愁容變海色短服改胡衣

三

談笑三軍却交游七貴疎仍留一隻箭未射魯連書

四

函谷如玉關幾時可生還洛川為易水嵩岳是燕山

俗變羌胡語人多沙塞顏申包唯慟哭七日鬢毛斑

五

淼淼望湖水青青蘆葉齊歸心落何處日没大江西

歇馬傍春草欲行遠道迷誰忍子規鳥連聲向我啼

南奔書懷

一作自丹陽南奔道中作

唐李白

盛

遙夜何漫漫空歌白石爛甯戚未匡齊陳平終佐漢

攙槍掃河洛直割鴻溝半歷數方未遷雲雷屢多難

天人秉旄鉞虎竹光藩翰侍筆黃金臺傳觴青玉案

不因秋風起自有思歸歎主將動讒疑王師忽離叛

自來白沙上鼓噪丹陽岬賓御如浮雲從風各消散

舟中指可掬城上骸爭爨草草出近關行行昧前算

南奔劇星火北寇無涯畔顧之七寶鞭留連道邊翫

太白夜食昴長虹日中貫秦趙興天兵茫茫九州亂

感遇明主恩頗高祖述言過江誓流水志在清中原

拔劍擊前柱悲歌難重論

音 卷之九
彭衙行

按漢有彭衙縣其故城在同州白水縣北

唐杜甫

盛

惜昔避賊初北走經險艱夜深彭衙道月照白水山
盡室久徒步逢人多厚顏參差谷鳥鳴不見遊子還
癡女饑咬我啼畏虎狼聞懷中掩其口反側聲愈嗔
小兒強解事故索苦李餐一旬半雷雨泥濘相攀牽
既無禦濕備徑滑衣又寒有時經契闊竟日數里間
野果充餽糧卑枝成屋椽早行石上水暮宿天邊煙
少留同家窪欲出蘆子關故人有孫宰高義薄曾雲
延客已曛黑張燈啓重門暖湯濯我足翦紙招我魂
從此出妻孥相視涕闌干衆雛爛熳睡喚起露盤餐

誓將與夫子永結爲弟昆遂空所坐堂安居奉我歡
誰肯艱難際豁達露心肝別來歲月周胡羯仍構患
何當有翅翎飛去隨爾前

逃難

唐杜甫

盛

五十白頭翁南北逃世難疎布纏枯骨奔走苦不暖
已衰病方入四海一塗炭乾坤萬里內莫見容身畔
妻孥復隨我回首共悲歎故國莽丘墟鄰里各分散
歸路從此迷涕盡湘江畔

奔避

唐鄭谷

晚

奔避投入遠漂離易感恩愁髯霜颯颯病眼淚昏昏

孤館秋聲樹寒江落照村更聞歸路絕新寒截荆門

全錄

曹漢谷

孤館秋聲樹寒江落照村更聞歸路絕新寒截荆門

孤館秋聲樹寒江落照村更聞歸路絕新寒截荆門

孤館秋聲樹寒江落照村更聞歸路絕新寒截荆門

孤館秋聲樹寒江落照村更聞歸路絕新寒截荆門

孤館秋聲樹寒江落照村更聞歸路絕新寒截荆門

孤館秋聲樹寒江落照村更聞歸路絕新寒截荆門

孤館秋聲樹寒江落照村更聞歸路絕新寒截荆門

孤館秋聲樹寒江落照村更聞歸路絕新寒截荆門

